

U skladu s članom 8 Zakona o Službenom glasniku Brčko distrikta BiH (Službeni glasnik Brčko distrikta BiH, brojevi 1/00 i 17/04) i Odlukom o davanju ovlaštenja Zakonodavnoj komisiji Skupštine Brčko distrikta BiH broj: 01-02-140/09 od 28. oktobra 2009. godine, Zakonodavna komisija Skupštine Brčko distrikta BiH na 64. sjednici održanoj 29. novembra 2011. godine utvrdila je prečišćeni tekst Zakona o izvršnom postupku Brčko distrikta BiH (Službeni glasnik Brčko distrikta BiH, broj 8/00) sa izmjenama i dopunama Zakona o izvršnom postupku Brčko distrikta BiH (Službeni glasnik Brčko distrikta Bosne i Hercegovine, brojevi 1/01, 5/02, 8/03, 19/07 i 2/08)

Broj:01.3-05-1184/11  
Brčko, 29. novembra 2011. godine

PREDSJEDNIK  
ZAKONODAVNE KOMISIJE

Ilija Marić, s.r.

**ZAKON O IZVRŠNOM POSTUPKU  
BRČKO DISTRIKTA BiH  
(prečišćeni tekst)**

**Dio prvi**

**I - OSNOVNE ODREDBE**

**Sadržaj zakona**

**Član 1**

- (1) Ovim zakonom uređuje se postupak po kojem sudovi Brčko distrikta Bosne i Hercegovine (u daljnjem tekstu: Distrikt) provode prinudno ostvarenje potraživanja na osnovu izvršnih i vjerodostojnih isprava (u daljnjem tekstu: izvršni postupak) te obezbjeđenje potraživanja (u daljnjem tekstu: postupak obezbjeđenja), ako posebnim zakonom nije drukčije određeno.
- (2) Odredbe ovog zakona ne primjenjuju se na postupke izvršenja propisane posebnim zakonom.

**Značenje pojedinih izraza**

**Član 2**

Pojedini izrazi upotrijebljeni u ovom zakonu imaju ova značenja:

1. izraz "potraživanje" označava pravo na neko davanje, činjenje, nečinjenje ili trpljenje,
2. izraz "tražilac izvršenja" označava lice koje je pokrenulo postupak radi izvršenja nekog potraživanja tog lica u čiju je korist taj postupak pokrenut po službenoj dužnosti,

3. izraz "predlagač obezbjeđenja" označava lice koje je pokrenulo postupak radi obezbjeđenja nekog potraživanja tog lica u čiju je korist taj postupak pokrenut po službenoj dužnosti,
4. izraz "izvršenik" označava lice protiv kojeg se potraživanje ostvaruje,
5. izraz "protivnik obezbjeđenja" označava lice protiv kojeg se potraživanje obezbjeđuje,
6. izraz "stranka" označava tražioca izvršenja i izvršenika te predlagača obezbjeđenja i protivnika obezbjeđenja,
7. izraz "učesnik" označava lice koje u postupku izvršenja ili obezbjeđenja nije stranka, a u postupku učestvuje zbog toga što se u njemu odlučuje o nekom njegovom pravu ili zbog toga što za to ima pravni interes,
8. izraz "rješenje o izvršenju" označava rješenje kojim je u cijelosti ili djelimično prihvaćen prijedlog za izvršenje ili kojim se izvršenje određuje po službenoj dužnosti,
9. izraz "rješenje o obezbjeđenju" označava rješenje kojim je u cijelosti ili djelimično prihvaćen prijedlog za obezbjeđenje ili kojim se po službenoj dužnosti određuje obezbjeđenje,
10. izraz "sudski izvršilac" označava sudskog službenika koji po nalogu suda neposredno preduzima pojedine radnje u izvršnom postupku ili postupku obezbjeđenja,
11. izraz "zemljoradnik" označava lice kojem je poljoprivredna proizvodnja pretežni izvor prihoda.

### **Pokretanje postupka**

#### **Član 3**

- (1) Izvršni postupak pokreće se prijedlogom tražioca izvršenja, a postupak obezbjeđenja prijedlogom predlagača obezbjeđenja.
- (2) Izvršni postupak i postupak obezbjeđenja pokreću se i po službenoj dužnosti kad je to zakonom izričito određeno.

### **Stvarna nadležnost**

#### **Član 4**

Izvršenje i obezbjeđenje određuje i sprovodi Osnovni sud Brčko distrikta Bosne i Hercegovine (u daljnjem tekstu: Osnovni sud).

## Mjesna nadležnost

### Član 5

Osnovni sud je mjesno nadležan:

1. za odlučivanje o prijedlogu za izvršenje na nepokretnim i pokretnim stvarima i za sprovođenje tog izvršenja, ako se na području Distrikta te stvari nalaze,
2. za odlučivanje o prijedlogu za izvršenje na novčanom potraživanju i za sprovođenje tog izvršenja, ako se na području Distrikta nalazi prebivalište, odnosno boravište izvršenika, a ako izvršenik nema prebivalište ili boravište na području Distrikta onda ako se na području Distrikta nalazi prebivalište ili boravište izvršenikovog dužnika. Ove odredbe na odgovarajući se način primjenjuju i na sjedište pravnog lica,
3. za odlučivanje o izvršnom prijedlogu na izvršenikovom potraživanju da mu se preda određena pokretna ili nepokretna stvar ili da mu se isporuči određena količina pokretnih stvari i za sprovođenje tog izvršenja, ako se na području Distrikta te stvari nalaze,
4. za odlučivanje o prijedlogu za izvršenje na dionici za koju nije izdata isprava o dionici te osnivačkom ili drugom udjelu u pravnom licu i za sprovođenje tog izvršenja, ako se na području Distrikta nalazi sjedište dioničkog društva, odnosno drugog pravnog lica,
5. za odlučivanje o prijedlogu za izvršenje na drugim imovinskim pravima (patentu, tehničkom unapređenju, plodouživanju ili nekom sličnom izvršenikovom pravu) i za sprovođenje tog izvršenja, ako se na području Distrikta nalazi prebivalište ili boravište izvršenika,
6. za odlučivanje o prijedlogu za izvršenje i za sprovođenje izvršenja na novčanim sredstvima koja se vode na računu izvršenika kod pravnog lica koje obavlja poslove platnog prometa, ako se na području Distrikta nalazi sjedište pravnog lica ili njegova jedinica kod koje se vodi račun izvršenika,
7. za odlučivanje o prijedlogu za izvršenje radi predaje jedne ili više određenih stvari ili radi isporuke određene količine zamjenljivih stvari te za sprovođenje izvršenja, ako se na području Distrikta nalaze stvari,
8. za odlučivanje o prijedlogu za izvršenje radi ispražnjenja i predaje nepokretne stvari i za sprovođenje tog izvršenja, ako se na području Distrikta nepokretnost nalazi,
9. za izvršenje radi ostvarivanja potraživanja na radnju, trpljenje ili nečinjenje ako na području Distrikta dužnik treba ispuniti obavezu po izvršnoj ispravi,
10. za odlučivanje o prijedlogu za izvršenje odluke suda kojom se naređuje predaja djeteta roditelju ili drugom licu, odnosno organizaciji kojoj je dijete povjereno na čuvanje i vaspitanje, ako se na području Distrikta zatekne dijete,

11. za odlučivanje o prijedlogu za izvršenje radi vraćanja zaposlenog na rad, odnosno službu i za sprovođenje izvršenja, ako se na području Distrikta nalazi sjedište poslodavca,
12. za odlučivanje o prijedlogu za izvršenje radi zasnivanja prava na nekretnini uknjižbom u zemljišnu knjigu, a i radi prenosa, ograničenja ili ukidanja prava upisanog u zemljišnu knjigu, ako se na području Distrikta vodi zemljišna knjiga u koju treba obaviti upis,
13. za odlučivanje o prijedlogu za izvršenje diobom zajedničke stvari i za sprovođenje tog izvršenja, ako se na području Distrikta stvar nalazi,
14. za odlučivanje o prijedlogu za obezbjeđenje novčanog potraživanja prinudnim zasnivanjem založnog prava na nepokretnosti, ako se na području Distrikta vodi zemljišna knjiga u kojoj treba provesti upis,
15. za odlučivanje o prijedlogu za obezbjeđenje novčanog potraživanja predlagača obezbjeđenja zasnivanjem založnog prava na osnovu sporazuma stranaka na stvarima i pravima protivnika obezbjeđenja te za sprovođenje obezbjeđenja, određuje se odgovarajućom primjenom odredaba tački od 1 do 6 ovog člana o mjesnoj nadležnosti suda u izvršnim postupcima radi naplate novčanog potraživanja na pojedinim vrstama predmeta izvršenja,
16. za odlučivanje o prijedlogu za prethodno izvršenje i za sprovođenje tog izvršenja, ako bi bio nadležan za izvršenje na osnovu izvršne isprave,
17. za odlučivanje o prijedlogu za obezbjeđenje prethodnom mjerom i za sprovođenje takve mjere, ako bi bio nadležan za izvršenje na osnovu izvršne isprave na osnovu koje je obezbjeđenje predloženo,
18. za odlučivanje o prijedlogu za obezbjeđenje privremenom mjerom, ako bi bio nadležan za odlučivanje o prijedlogu za izvršenje, a za sprovođenje privremene mjere, ako bi bio mjesno nadležan za sprovođenje izvršenja.

### **Hitnost i redoslijed postupanja**

#### **Član 6**

- (1) U postupku izvršenja i obezbjeđenja sud je dužan da postupa hitno.
- (2) Sud je dužan da predmete uzima u rad redom kako ih je primio, osim ako priroda potraživanja ili posebne okolnosti zahtijevaju da se postupi drugačije.

### **Sredstva i predmet izvršenja i obezbjeđenja**

#### **Član 7**

- (1) Sredstva izvršenja i obezbjeđenja su izvršne radnje, odnosno radnje obezbjeđenja ili sistem takvih radnji kojim se po zakonu potraživanje prinudno ostvaruje ili obezbjeđuje.

- (2) Kao sredstvo izvršenja radi ostvarenja novčanog potraživanja mogu se odrediti samo: izvršenje na nepokretnosti, izvršenje na pokretnim stvarima, izvršenje na novčanom potraživanju izvršenika i izvršenje na novčanim sredstvima na računu izvršenika kod pravnog lica koje obavlja poslove platnog prometa.
- (3) Predmet izvršenja i obezbjeđenja su stvari i prava na kojima se po zakonu može provesti izvršenje radi ostvarenja potraživanja ili njegovog obezbjeđenja.
- (4) Izvršne radnje ili radnje obezbjeđenja mogu se neposredno sprovesti protiv izvršenika, protivnika obezbjeđenja i drugih lica u skladu sa ovim zakonom.
- (5) Predmet izvršenja ne mogu biti stvari izvan prometa, kao ni druge stvari za koje je to posebnim zakonom određeno.
- (6) Predmet izvršenja ne mogu biti potraživanja po osnovu poreza i drugih taksi.
- (7) Može li neka stvar ili neko pravo biti predmet izvršenja, odnosno da li je izvršenje na nekoj stvari ili pravu ograničeno, ocjenjuje se s obzirom na okolnosti koje su postojale u vrijeme podnošenja izvršnog prijedloga, ako ovim zakonom nije drukčije izričito određeno.

### **Ograničenje sredstava i predmeta izvršenja i obezbjeđenja**

#### **Član 8**

- (1) Sud određuje izvršenje, odnosno obezbjeđenje onim sredstvom i na onim predmetima koji su navedeni u izvršnom prijedlogu odnosno prijedlogu za obezbjeđenje.
- (2) Ako je predloženo više sredstava ili više predmeta izvršenja, odnosno obezbjeđenja, sud će, na prijedlog izvršenika, odnosno protivnika obezbjeđenja, ograničiti izvršenje, odnosno obezbjeđenje samo na neke od tih sredstava, odnosno predmeta, ako su dovoljni za ostvarenje ili obezbjeđenje potraživanja.
- (3) Sud može, na prijedlog izvršenika, odnosno protivnika obezbjeđenja, u skladu sa ovim zakonom, odrediti drugo sredstvo izvršenja odnosno obezbjeđenja umjesto onog koje je predloženo.
- (4) Ako se pravosnažno rješenje o izvršenju na određenom predmetu ili sredstvu ne može provesti, tražilac izvršenja može radi namirenja istog potraživanja predložiti novo sredstvo ili predmet izvršenja. U tom slučaju, sud će nastaviti sa izvršenjem na osnovu istog rješenja o izvršenju, o čemu će zaključkom obavijestiti tražioca izvršenja i izvršenika.

### **Zaštita dostojanstva izvršenika odnosno protivnika obezbjeđenja**

#### **Član 9**

Pri izvršnom postupku i obezbjeđenju pazit će se na dostojanstvo izvršenika odnosno protivnika obezbjeđenja te na to da izvršenje odnosno obezbjeđenje za njega budu što manje nepovoljni.

## **Podnesci, ročišta i spisi**

### **Član 10**

- (1) U izvršnom postupku i postupku obezbjeđenja sud postupa na osnovu podnesaka i drugih pismena.
- (2) Sud održava ročište kad je to ovim zakonom određeno ili kad smatra da je održavanje cjelishodno.
- (3) O ročištu, umjesto zapisnika, sudija može sastaviti službenu zabilješku.
- (4) Sud će izvan ročišta saslušati stranku ili učesnika u postupku ako je to predviđeno ovim zakonom, ili ako smatra da je to potrebno radi razjašnjenja pojedinih pitanja ili izjašnjavanja o nekom prijedlogu stranke.
- (5) Izostanak jedne ili obiju stranaka, kao i učesnika sa ročišta, ili njihovo neodazivanje pozivu suda radi saslušanja, ne sprečava sud da daljnje postupa.
- (6) Podnesci u izvršnom postupku podnose se u dovoljnom broju primjeraka za sud i protivnu stranku.

## **D o s t a v l j a n j e**

### **Član 11**

- (1) Po pravilima o ličnom dostavljanju iz Zakona o parničnom postupku dostavlja se samo rješenje po prijedlogu za izvršenje i rješenje po prigovoru na rješenje o izvršenju.
- (2) Dostavljanja iz stava 1 ovog člana vrši se preko lica zaposlenog u sudu.

## **Sastav suda i odluke**

### **Član 12**

- (1) Izvršni postupak i postupak obezbjeđenja u prvom stepenu vodi i odluke donosi sudija Osnovnog suda, a o prigovoru odlučuje Apelacioni sud Brčko distrikta Bosne i Hercegovine (u daljnjem tekstu: Apelacioni sud).
- (2) Ako se o prinudnom ispunjenju ili obezbjeđenju nekih potraživanja odlučuje u parničnom, krivičnom ili nekom drugom sudskom postupku, takve odluke sud donosi u sastavu u kojem vodi taj sudski postupak.
- (3) Odluke u izvršnom postupku i postupku obezbjeđenja sud donosi u obliku rješenja ili zaključka.
- (4) Zaključkom se izdaje nalog sudskom izvršiocu za sprovođenje pojedinih radnji te odlučuje o upravljanju postupkom i o drugim pitanjima kad je to izričito predviđeno ovim zakonom.

## **Pravni lijekovi**

### **Član 13**

- (1) Protiv rješenja donesenog u prvom stepenu može se izjaviti prigovor, osim ako u ovom zakonu nije određeno da prigovor nije dozvoljen.
- (2) Prigovor se izjavljuje u roku od tri dana od dana dostavljanja rješenja, ako ovim zakonom nije drukčije određeno.
- (3) Prigovor ne odlaže izvršenje, ako ovim zakonom nije drukčije određeno.
- (4) Odluka donesena po prigovoru pravosnažna je.
- (5) Protiv zaključka nije dozvoljen pravni lijek.

### **Revizija, ponavljanje postupka i povraćaj u pređašnje stanje**

#### **Član 14**

- (1) Protiv pravosnažnog rješenja donesenog u postupku izvršenja i obezbjeđenja nije dozvoljena revizija niti ponavljanje postupka.
- (2) Povraćaj u pređašnje stanje dozvoljen je samo zbog propuštanja roka za prigovor.

### **Rokovi za postupanje**

#### **Član 15**

- (1) O prijedlogu za izvršenje Osnovni sud je dužan da odluči u roku od tri dana od dana podnošenja prijedloga.
- (2) O prigovoru Apelacioni sud je dužan odlučiti u roku od 15 dana od dana podnošenja prigovora.

### **Troškovi postupka**

#### **Član 16**

- (1) Troškove postupka u vezi sa određivanjem i provođenjem izvršenja i obezbjeđenja prethodno snosi tražilac izvršenja odnosno predlagač obezbjeđenja.
- (2) Tražilac izvršenja odnosno predlagač obezbjeđenja dužan je troškove postupka predujmiti u roku koji sud odredi. Sud će obustaviti izvršenje, odnosno obezbjeđenje ako troškovi ne budu predujmljeni u tom roku, a bez toga se izvršenje ili obezbjeđenje ne može provesti. Ako u roku ne budu predujmljeni troškovi o kojima zavisi preduzimanje samo neke radnje, ta se radnja neće provesti.
- (3) Troškove postupka koji je pokrenut po službenoj dužnosti prethodno podmiruje sud iz svojih sredstava.

- (4) Izvršenik, odnosno protivnik obezbjeđenja dužni su tražiocu izvršenja odnosno predlagaču obezbjeđenja nadoknaditi troškove koji su bili potrebni za izvršenje ili obezbjeđenje.
- (5) Tražitelj izvršenja, odnosno predlagač obezbjeđenja dužni su izvršeniku odnosno protivniku obezbjeđenja nadoknaditi troškove koje su im neosnovano prouzrokovali.
- (6) Zahtjev za naknadu troškova podnosi se najkasnije u roku od petnaest dana od dana završetka postupka.
- (7) O troškovima postupka odlučuje sud u izvršnom postupku i u tom postupku određuje, na prijedlog stranke, izvršenje radi njihova ostvarenja.
- (8) Tražitelj izvršenja, odnosno predlagač obezbjeđenja mogu već u izvršnom prijedlogu za izvršenje ili prijedlogu za obezbjeđenje zatražiti da se, radi naplate predvidivih troškova postupka, odredi izvršenje protiv izvršenika odnosno protivnika obezbjeđenja. Na osnovu takvog rješenja o izvršenju sud će provesti mjere kojima se u korist tražitelja izvršenja, odnosno predlagača obezbjeđenja na dijelovima imovine izvršenika, odnosno protivnika obezbjeđenja zasnivaju prava koja obezbjeđuju buduće namirenje troškova postupka.

## **O b e z b j e đ e n j e**

### **Član 17**

- (1) Kad ovaj zakon propisuje davanje obezbjeđenja, obezbjeđenje se daje u gotovini. Izuzetno, sud može odobriti davanje obezbjeđenja u obliku bankarske garancije, vrijednosnih papira te dragocjenosti čiju je vrijednost lako utvrditi na tržištu i koje se mogu brzo i jednostavno unovčiti.
- (2) Distrikt i njegovi organi nisu dužni dati obezbjeđenje kad u postupku učestvuju kao stranke.
- (3) Na datom obezbjeđenju protivna stranka stiče zakonsko založno pravo.
- (4) Ako sud u izvršnom postupku ili postupku obezbjeđenja odluči o pravu protivne stranke na naknadu štete ili troškova postupka u vezi sa radnjom zbog preduzimanja koje je osiguranje dato, na njezin će prijedlog istim rješenjem odlučiti i o naplati utvrđenog potraživanja iz tog obezbjeđenja.

## **Izvršenje odluke stranog suda**

### **Član 18**

- (1) Izvršenje odluke stranog suda može se odrediti i sprovesti u Distriktu ako odluka ispunjava zakonom propisane uslove za priznanje.
- (2) Sudovi entiteta Bosne i Hercegovine u smislu stava 1 ovog člana ne smatraju se stranim sudovima.

## **Izvršenje na imovini strane države**

### **Član 19**

Na imovini strane države u Distriktu ne može se odrediti izvršenje ili osiguranje bez prethodne saglasnosti Pravosudne komisije, osim ako je strana država pristala na izvršenje odnosno obezbjeđenje.

## **Primjena odredaba drugih zakona**

### **Član 20**

- (1) U izvršnom postupku i postupku obezbjeđenja na odgovarajući se način primjenjuju odredbe Zakona o parničnom postupku, ako ovim ili drugim zakonom nije drukčije određeno.
- (2) Na materijalnopravne pretpostavke i posljedice provođenja izvršnog postupka i postupka obezbjeđenja na odgovarajući se način primjenjuju odredbe zakona kojima se uređuju stvarna prava, odnosno obligacioni odnosi.

## **Dio drugi**

### **IZVRŠNI POSTUPAK**

#### **Poddio prvi**

### **ZAJEDNIČKE ODREDBE**

## **II - IZVRŠNA I VJERODOSTOJNA ISPRAVA**

### **Osnove za određivanje izvršenja**

### **Član 21**

Sud određuje izvršenje samo na osnovu izvršne ili vjerodostojne isprave, ako ovim zakonom nije drukčije određeno.

### **Izvršna isprava**

### **Član 22**

*Izvršne isprave su:*

1. izvršna odluka sudova i izvršno sudsko poravnanje,
2. *izvršna odluka donesena u upravnom postupku i poravnanje u upravnom postupku, ako glasi na ispunjenje novčane obaveze, ukoliko zakonom nije drukčije određeno,*
3. *druga isprava koja je zakonom određena kao izvršna isprava.*

### **Odluka i poravnanje**

## **Član 23**

- (1) Sudskom odlukom, prema ovom zakonu, smatra se presuda, rješenje, te druga odluka donesena u postupku pred sudom i arbitražom, a sudskim poravnanjem smatra se poravnanje zaključeno u postupku pred sudovima i arbitražama.
- (2) Odlukom u upravnom postupku, prema ovom zakonu, smatra se rješenje i zaključak koji su u upravnom postupku donijeli organi Distrikta ili pravno lice sa javnim ovlaštenjima, a upravnim poravnanjem smatra se poravnanje zaključeno u smislu Zakona o upravnom postupku.

### **Izvršnost odluke**

## **Član 24**

- (1) Sudska odluka kojom je naloženo ispunjenje potraživanja na neko davanje ili činjenje izvršna je ako je postala pravosnažna i ako je protekao rok za dobrovoljno ispunjenje. Rok za dobrovoljno ispunjenje teče od dana dostave odluke izvršeniku ako zakonom nije drukčije određeno.
- (2) Sudska odluka kojom je naloženo ispunjenje potraživanja na neko trpljenje ili nečinjenje (propuštanje) izvršna je ako je postala pravosnažna, osim ako je u izvršnoj ispravi određen poseban rok za usklađivanje ponašanja izvršenika s njegovom obavezom.
- (3) Odluka donesena u upravnom postupku izvršna je ako je postala izvršna po pravilima koja uređuju taj postupak.
- (4) Na osnovu izvršne odluke koja je postala izvršna u jednom dijelu, izvršenje se može odrediti samo u odnosu na taj dio.
- (5) Izvršenje će se odrediti na osnovu sudske odluke koja nije postala pravosnažna i odluke donesene u upravnom postupku koja nije postala konačna ako je zakonom propisano da žalba ili koji drugi pravni lijek ne zadržava izvršenje odluke.

### **Izvršnost poravnanja**

## **Član 25**

- (1) Sudsko, odnosno upravno poravnanje izvršno je ako je potraživanje koje se prema njemu treba ispuniti dospjelo.
- (2) Dospjelost potraživanja dokazuje se zapisnikom o poravnanju ili javnom ispravom ili po zakonu ovjerenom ispravom.
- (3) Dospjelost koja se ne može dokazati na način iz stava 2 ovog člana dokazuje se pravosnažnom odlukom donesenom u parničnom postupku kojom se utvrđuje dospjelost.
- (4) Na osnovu poravnanja koje je postalo izvršno u jednom dijelu izvršenje se može odrediti samo u odnosu na taj dio.

## **Podobnost izvršne isprave za izvršenje**

### **Član 26**

- (1) Izvršna isprava podobna je za izvršenje ako su u njoj naznačeni tražilac izvršenja i izvršenik te predmet, vrsta, obim i vrijeme ispunjenja obaveze.
- (2) Ako u izvršnoj ispravi nije određen rok za dobrovoljno ispunjenje obaveze, taj rok određuje se rješenjem o izvršenju.
- (3) U slučaju iz stava 2 ovog člana sud će predloženo izvršenje odrediti uz uslov da izvršenik u roku koji mu je određen ne ispuni svoju obavezu.

## **Naplata zatezних kamata**

### **Član 27**

- (1) Ako se nakon donošenja odluke ili zaključenja poravnania izmijenila zatezna kamata, sud će, na prijedlog tražioca izvršenja, rješenjem o izvršenju odrediti naplatu zatezne kamate po izmijenjenoj stopi za vrijeme na koje se ta izmjena odnosi.
- (2) Ako plaćanje zatezne kamate na troškove postupka nije određeno već u izvršnoj ispravi, sud će, na prijedlog tražioca izvršenja, u rješenju o izvršenju odrediti naplatu tih kamata po propisanoj stopi od dana donošenja odluke odnosno zaključenja poravnania do naplate.

## **Vjerodostojna isprava**

### **Član 28**

- (1) Izvršenje radi ostvarivanja novčanog potraživanja pravnog lica i preduzetnika određuje se i na osnovu vjerodostojne isprave.
- (2) Vjerodostojna isprava je, prema ovom zakonu, račun, mjenica i ček s protestom i povratnim računom kad je to potrebno za zasnivanje potraživanja, javna isprava, izvod iz ovjerenih poslovnih knjiga, isprava sačinjena u zakonom propisanoj formi, po zakonu ovjerena privatna isprava te isprava koja se po posebnim propisima smatra javnom ispravom. Računom se smatra i obračun kamata.
- (3) Vjerodostojna isprava je podobna za izvršenje ako su u njoj naznačeni tražilac izvršenja i izvršenik te predmet, vrsta, obim i vrijeme ispunjenja obaveze.
- (4) Kad se iz vjerodostojne isprave ne vidi dospelost potraživanja, izvršenje će se odrediti ako tražilac izvršenja uz tu ispravu podnese i pismenu izjavu o tome da je potraživanje dospjelo, te ako je označio dan dospelosti potraživanja.

## **Prelaz potraživanja ili obaveze**

### **Član 29**

- (1) Izvršenje se određuje i na prijedlog i u korist lica koje u izvršnoj ispravi nije označeno kao tražilac izvršenja ako ono javnom ili ovjerenom privatnom ispravom dokaže da je potraživanje na njega preneseno ili da je na njega na drugi način prešlo. Ako se prenos ne može dokazati na taj način, prijenos potraživanja dokazuje se pravosnažnom odlukom donesenom u parničnom postupku.
- (2) Odredba stava 1 ovog člana na odgovarajući se način primjenjuje i na izvršenje protiv lica koje u izvršnoj ispravi nije označeno kao dužnik.

### **Uslovna i uzajamna obaveza**

#### **Član 30**

- (1) Izvršenje koje zavisi od prethodnog ispunjenja neke obaveze tražioca izvršenja ili od nastupanja nekog uslova, određuje se ako tražilac izvršenja javnom ili po zakonu ovjerenom privatnom ispravom dokaže da je obavezu ispunio, odnosno da je uslov nastupio.
- (2) Ispunjenje obaveze, odnosno nastupanje uslova dokazuje se pravosnažnom odlukom donesenom u parničnom postupku, ako tražilac izvršenja, nije u mogućnosti da to dokaže na način određen u stavu 1 ovog člana.
- (3) Ako je izvršenik po izvršnoj ispravi dužan da ispuni obavezu, uz uslov da se istovremeno ispuni obaveza prema njemu, sud će odrediti izvršenje ako tražilac izvršenja podnese dokaz da je obezbijedio ispunjenje svoje obaveze.
- (4) Smatra se da je tražilac izvršenja obezbijedio ispunjenje svoje obaveze, u smislu stava 3 ovog člana, ako je predmet obaveze položio kod suda ili u istom cilju postupio na drugi pogodan način.
- (5) Tražilac izvršenja koji tvrdi da je svoju obavezu već ispunio treba to i da dokaže na način predviđen u stavovima 1 i 2 ovog člana.

### **Alternativna obaveza po izboru izvršenika**

#### **Član 31**

Ako izvršenik ima pravo na osnovu izvršne isprave birati između više predmeta svoje obaveze i u roku za dobrovoljno ispunjenje sam ne obavi izbor između tih predmeta i ne ispuni dužnu obavezu, predmet kojim obaveza treba biti ispunjena određuje tražilac izvršenja u prijedlogu za izvršenje.

### **Fakultativno ovlaštenje izvršenika**

#### **Član 32**

- (1) Izvršenik kojem je izvršnom ispravom naloženo ispunjenje određene obaveze uz pravo da se od ispunjenja te obaveze može osloboditi ispunjenjem nekog drugog činjenja određenog u izvršnoj ispravi može to činjenje ispuniti sve dok tražilac izvršenja nije makar i djelimično primio ispunjenje obaveze.

- (2) Tražilac izvršenja ima pravo na naknadu troškova izvršnog postupka koji je obustavljen zato što je izvršenik nakon njegovog pokretanja umjesto dužne obaveze ispunio drugo činjenje određeno u izvršnoj ispravi.

### **Smrt stranke**

#### **Član 33**

- (1) O prekidu izvršnog postupka koji je nastao usljed smrti stranke ili njenog zakonskog zastupnika, sud će obavijestiti nasljednike te stranke, ako su mu poznati i ako je poznato njihovo boravište, kao i protivnu stranku.
- (2) Ako nasljednici nisu poznati ili nije poznato njihovo boravište, sud će im bez odlaganja postaviti privremenog zastupnika.

### **Potvrda o izvršnosti**

#### **Član 34**

- (1) Ako se prijedlog za izvršenje podnosi Osnovnom sudu, a on o potraživanju nije odlučivao u prvom stepenu, uz prijedlog se podnosi izvršna isprava, u originalu ili ovjerenom prepisu, na koji je stavljena potvrda o izvršnosti.
- (2) Potvrdu o izvršnosti daje sud, odnosno organ koji je odlučivao o potraživanju u prvom stepenu.
- (3) Neosnovanu potvrdu o izvršnosti ukinut će rješenjem isti sud, odnosno organ, na prijedlog ili po službenoj dužnosti.
- (4) Ako se prijedlog za izvršenje podnosi na osnovu vjerodostojne isprave, prilaže se ta isprava u originalu ili ovjerenom prepisu.

## **III - PREDLAGANJE I ODREĐIVANJE IZVRŠENJA**

### **Prijedlog za izvršenje**

#### **Član 35**

- (1) Prijedlog za izvršenje mora sadržavati zahtjev za izvršenje u kojem će biti naznačena izvršna ili vjerodostojna isprava na osnovu koje se traži izvršenje, tražilac izvršenja i izvršenik, potraživanje čije se ostvarenje traži te sredstvo kojim izvršenje treba provesti, i po potrebi, predmet u odnosu na koji ga treba provesti. Prijedlog mora sadržavati i druge podatke koji su potrebni za provođenje izvršenja.
- (2) Prijedlog za izvršenje na osnovu vjerodostojne isprave mora sadržavati:
1. zahtjev da sud utvrdi postojanje dospjelog potraživanja zajedno sa odmjerenim troškovima,
  2. izvršni zahtjev iz stava 1 ovog člana, i

3. zahtjev da sud obaveže izvršenika da u roku od osam dana, a u mjeničnim i čekovnim sporovima u roku od tri dana po dostavi rješenja, namiri potraživanja, zajedno sa odmjerenim troškovima.
- (3) Ako se traži izvršenje na pokretnim stvarima, u prijedlogu za izvršenje ne moraju biti bliže naznačene te stvari.
- (4) Tražilac izvršenja može zahtijevati da sud prije donošenja rješenja o izvršenju pribavi podatke o imovini izvršenika od pravnih lica, te fondova i upravnih i drugih organa koja raspolažu takvim podacima i na osnovu tih podataka dopuniti prijedlog za izvršenje.
- (5) Tražilac izvršenja može u toku izvršnog postupka zahtijevati od suda da pribavi podatke iz prethodnog stava da bi proširio prijedlog za izvršenje.
- (6) Pravna lica i tijela iz stava 4 ovog člana dužna su u roku od osam dana od dana prijema zahtjeva suda, postupiti po zahtjevu, pod prijetnjom primjene sankcija iz člana 200 ovog zakona prema odgovornim licima u pravnom licu, fondu ili drugom organu. Nepostupanje po zahtjevu ne može se pravdati pozivom na službenu ili poslovnu tajnu, a ne smije se o traženju i davanju podataka izvijestiti izvršenik.

### **Povlačenje i ograničenje prijedloga**

#### **Član 36**

- (1) Tražilac izvršenja može tokom postupka, bez pristanka izvršenika, povući u cijelosti ili djelomično prijedlog za izvršenje.
- (2) U slučaju iz stava 1 ovog člana sud će obustaviti izvršenje u cjelini ili djelimično.
- (3) Tražilac izvršenja može nakon povlačenja prijedloga podnijeti novi prijedlog za izvršenje.

### **Rješenje o izvršenju**

#### **Član 37**

- (1) U rješenju o izvršenju moraju biti naznačeni izvršna, odnosno vjerodostojna isprava na osnovu koje se izvršenje određuje, tražilac izvršenja i izvršenik, potraživanje koje se ostvaruje, sredstvo i predmet izvršenja te drugi podaci potrebni za provođenje izvršenja.
- (2) Rješenjem o izvršenju na osnovu vjerodostojne isprave sud će:
  1. utvrditi postojanje dospjelog potraživanja zajedno s odmjerenim troškovima,
  2. odrediti izvršenje radi ostvarenja tih potraživanja, i
  3. obavezati izvršenika da u roku od osam dana, a u mjeničnim i čekovnim sporovima u roku od tri dana po prijemu rješenja, namiri potraživanja, zajedno sa odmjerenim troškovima.

- (3) Rješenje o izvršenju ne mora biti obrazloženo i može se izdati stavljanjem pečata na prijedlog za izvršenje.
- (4) Rješenje o izvršenju mora sadržavati uputu o pravnom lijeku.
- (5) Sud neće po službenoj dužnosti odbiti izvršni zahtjev zasnovan na pravosnažnoj sudskoj odluci ili sudskom poravnanju zato što te isprave u vrijeme odlučivanja o izvršnom prijedlogu nisu stekle svojstvo izvršnosti, ako su to svojstvo stekle naknadno.
- (6) Rješenje kojim se prijedlog za izvršenje potpuno ili djelimično odbacuje ili odbija mora biti obrazloženo.

### **Dostavljanje rješenja o izvršenju**

#### **Član 38**

- (1) Rješenje o izvršenju dostavlja se tražiocu izvršenja i izvršeniku.
- (2) Rješenje kojim se odbacuje ili odbija prijedlog za izvršenje doneseno prije nego što je izvršeniku bilo omogućeno da se o njemu izjasni dostavlja se samo tražiocu izvršenja.
- (3) Rješenje o izvršenju na novčanom potraživanju dostavlja se i izvršenikovom dužniku, a rješenje o izvršenju na sredstvima na računu izvršenika dostavlja se i pravnom licu koje za izvršenika obavlja poslove platnog prometa.
- (4) Rješenje o izvršenju, doneseno na osnovu vjerodostojne isprave, dostavlja se pravnom licu koje za izvršenika obavlja poslove platnog prometa tek pošto postane pravosnažno, osim ako je izvršenje određeno na osnovu mjenice i čeka sa protestom i povratnim računom, a oni su potrebni za zasnivanje zahtjeva.
- (5) Rješenje o izvršenju na pokretnim stvarima dostavlja se izvršeniku prije preduzimanja prve izvršne radnje.

### **IV - SPROVOĐENJE IZVRŠENJA**

#### **Izvršenje na osnovu nepravosnažnog rješenja o izvršenju**

#### **Član 39**

- (1) Izvršenje se sprovodi i prije pravosnažnosti rješenja o izvršenju ako za pojedine izvršne radnje ovim zakonom nije drukčije određeno.
- (2) Izvršenje određeno na osnovu vjerodostojne isprave ne može se sprovesti prije pravosnažnosti rješenja o izvršenju, osim ako je izvršenje određeno na osnovu mjenice i čeka sa protestom i povratnim računom, ako su oni potrebni za zasnivanje zahtjeva.
- (3) Prije pravosnažnosti rješenja o izvršenju potraživanje ne može biti prinudno ispunjeno.

#### **Granice izvršenja**

#### **Član 40**

Izvršenje se sprovodi u granicama određenim u rješenju o izvršenju.

### **Vrijeme izvršenja**

#### **Član 41**

- (1) Izvršenje se sprovodi radnim danom, i to danju.
- (2) Sud može odrediti da se izvršenje sprovede i neradnim danom ili noću ako za to postoji opravdan razlog.

### **Rad sudskog izvršitelja**

#### **Član 42**

- (1) Sudski izvršitelj je dužan prilikom pretresa izvršenikovog stana ili odjeće koju on nosi na sebi i preduzimanja drugih izvršnih radnji postupati s dužnim obzirom prema ličnosti izvršenika i članova njegovog domaćinstva.
- (2) Izvršnim radnjama u izvršenikovom stanu kojima ne prisustvuje izvršenik, njegov zakonski zastupnik, opunomoćenik ili odrasli član njegovog domaćinstva, moraju prisustvovati dva punoljetna svjedoka.
- (3) Izvršenje u prostoriji pravnog lica sprovodi se tako da sudski izvršitelj prije obavljanja izvršne radnje zatraži od zastupnika pravnog lica da on sam ili lice koje on odredi bude prisutno njenom obavljanju. Ako zastupnik pravnog lica odbije postupiti u skladu sa zahtjevom sudskog izvršitelja ili ako ga sudski izvršitelj ne zatekne u prostoriji pravnog lica prilikom preduzimanja izvršne radnje, radnju će sprovesti u prisustvu dva punoljetna svjedoka.
- (4) Ako izvršenikovu radnju treba sprovesti u prostoriji koja je zaključana, a izvršenik ili njegov zastupnik nije prisutan ili neće prostoriju otvoriti, sudski izvršitelj otvorit će prostoriju u prisustvu dva punoljetna svjedoka.
- (5) O obavljanju izvršnih radnji prema odredbama stavova od 2 do 4 ovog člana sudski izvršitelj sastavit će poseban zapisnik koji će potpisati pozvani svjedoci.

### **Ometanje sudskog izvršitelja u radu**

#### **Član 43**

- (1) Sudski izvršitelj je ovlašten da udalji lice koje ometa sprovođenje izvršenja, a prema okolnostima slučaja i da zatraži pomoć policije. Policija je dužna postupati po nalogu sudskog izvršitelja. Sudski izvršitelj može, po potrebi, naložiti i upotrebu sile prema licu koje ometa izvršenje.
- (2) Pri postupanju policije po nalogu sudskog izvršitelja na odgovarajući se način primjenjuju propisi o policiji.

- (3) U slučaju nepostupanja policije po zahtjevu sudskog izvršitelja za pružanje pomoći u sprovođenju izvršenja, sud je dužan o tome obavijestiti šefa Policije Distrikta, gradonačelnika Distrikta ili nadležno tijelo Skupštine Distrikta.

### **Nepravilnosti pri sprovođenju izvršenja**

#### **Član 44**

- (1) Stranka ili učesnik mogu podneskom tražiti od suda da otkloni nepravilnost koju je sudski izvršitelj učinio u sprovođenju izvršenja.
- (2) Sud može zaključkom ukinuti nezakonite i nepravilne radnje sudskog izvršitelja.

### **V – PRIGOVOR**

#### **Prigovor**

#### **Član 45**

- (1) Rješenje o izvršenju izvršenik može pobijati prigovorom.
- (2) Rješenje kojim je odbijen prijedlog za izvršenje tražilac izvršenja može pobijati prigovorom.
- (3) Na rješenje doneseno u sprovođenju izvršenja može se uložiti prigovor, ako ovim zakonom nije određeno da prigovor nije dozvoljen.

#### **Razlozi za prigovor**

#### **Član 46**

- (1) Prigovor protiv rješenja o izvršenju može se podnijeti iz razloga koji sprečavaju izvršenje, a naročito:
1. ako isprava na osnovu koje je doneseno rješenje o izvršenju nije izvršna isprava,
  2. ako izvršna isprava nije stekla svojstvo izvršnosti,
  3. ako je izvršna isprava na osnovu koje je doneseno rješenje o izvršenju ukinuta, poništena, preinačena ili na drugi način stavljena van snage, odnosno ako je na drugi način izgubila svoju djelotvornost ili je utvrđeno da je bez učinka,
  4. ako su se stranke, javnom ili po zakonu ovjerenom ispravom sastavljenom nakon nastanka izvršne isprave, sporazumjele da neće na osnovu izvršne isprave, trajno ili za određeno vrijeme, tražiti izvršenje,
  5. ako je protekao rok u kojem se po zakonu može tražiti izvršenje,
  6. ako je izvršenje određeno na predmetu koji je izuzet od izvršenja, odnosno na kom je mogućnost izvršenja ograničena,

7. ako tražilac izvršenja nije ovlašten tražiti izvršenje na osnovu izvršne isprave odnosno ako nije ovlašten tražiti izvršenje protiv izvršenika,
  8. ako nije ispunjen uslov koji je određen izvršnom ispravom, osim ako zakonom nije drukčije propisano,
  9. ako je potraživanje prestalo na osnovu činjenice koja je nastala u vrijeme kad je izvršenik nije više mogao uspješno istaći u postupku iz kojeg potiče odluka, odnosno ako je potraživanje prestalo na osnovu činjenice koja je nastala nakon zaključenja sudskog ili upravnog poravnanja,
  10. ako je na osnovu činjenice koja je nastala u vrijeme kad je dužnik nije više mogao istaći u postupku iz kojeg potiče odluka, odnosno ako je na osnovu činjenice koja je nastala nakon zaključenja sudskog ili upravnog poravnanja, trajno ili za određeno vrijeme, odgođeno, zabranjeno, izmijenjeno ili na drugi način onemogućeno ispunjenje potraživanja.
- (2) Prigovor iz člana 45 stavova 2 i 3 može se podnijeti zbog bitne povrede odredaba postupka, pogrešno ili nepotpuno utvrđenog činjeničnog stanja i pogrešne primjene materijalnog prava.

### **Odgovor na prigovor**

#### **Član 47**

- (1) Prigovor protiv rješenja o izvršenju dostavlja se tražiocu izvršenja.
- (2) Tražilac izvršenja može u roku od tri dana od dana dostavljanja prigovora podnijeti odgovor na prigovor.
- (3) Po prijemu odgovora na prigovor ili po isteku roka za odgovor sud će, prema okolnostima slučaja zakazati ročište za raspravljanje o prigovoru ili će donijeti rješenje bez određivanja ročišta.

### **Rješenje o prigovoru**

#### **Član 48**

- (1) Rješenjem donesenim po prigovoru, prigovor se usvaja ili odbija ili se odbacuje kao neblagovremen, nepotpun ili nedozvoljen.
- (2) Ako usvoji prigovor, sud će, prema okolnostima slučaja, obustaviti izvršenje u cijelosti ili djelimično i ukinuti sprovedene radnje.

### **Postupak povodom prigovora protiv rješenja o izvršenju na osnovu vjerodostojne isprave**

#### **Član 49**

- (1) Izvršenik će u prigovoru protiv rješenja o izvršenju na osnovu vjerodostojne isprave odrediti u kom dijelu pobija to rješenje. Prigovor mora biti obrazložen.
- (2) Ako u prigovoru nije određeno u kom dijelu se pobija, obim pobijanja će se cijeniti na osnovu obrazloženja.
- (3) Neobrazložen prigovor sud će odbaciti.
- (4) Ako se rješenje o izvršenju pobija u potpunosti ili samo u dijelu kojim je utvrđeno postojanje potraživanja, prijedlog za izvršenje smatrat će se tužbom i u tom slučaju sud će postupati po odredbama parničnog postupka.
- (5) Kada je podnesen prigovor iz prethodnog stava, sud će odgoditi izvršenje i nastaviti će ga, na prijedlog tražioca izvršenja, nakon pravosnažnosti odluke parničnog suda, ako tražilac izvršenja uspije sa tužbom.
- (6) Ako prvostepeni parnični sud odbije tužbeni zahtjev i ukine rješenje o izvršenju u pobijanom dijelu, naložit će i obustavu izvršnog postupka. Nakon pravosnažnosti ove odluke parničnog suda, izvršni sud će rješenjem konstatovati da je izvršni postupak obustavljen i ukinut će provedene radnje u izvršnom postupku.
- (7) Ako se rješenje o izvršenju pobija samo u dijelu kojim je određeno izvršenje, daljnji postupak nastaviti će se kao postupak po prigovoru protiv rješenja o izvršenju donesenog na osnovu izvršne isprave.
- (8) Ako se prigovor iz stava 7 ovog člana prihvati, dio rješenja o izvršenju kojim je izvršeniku naloženo da namiri potraživanje ima svojstvo izvršne isprave na osnovu koje se može ponovo tražiti izvršenje.

## **VI - PROTIVIZVRŠENJE**

### **Razlozi za protivizvršenje**

#### **Član 50**

- (1) Nakon što je izvršenje već sprovedeno, izvršenik može u istom izvršnom postupku zatražiti od suda da naloži tražiocu izvršenja da mu vrati ono što je izvršenjem dobio:
  1. ako je izvršna isprava pravosnažno ukinuta, preinačena, poništena, stavljena van snage ili je na drugi način utvrđeno da je bez dejstva,
  2. ako je rješenje o izvršenju pravosnažno ukinuto ili preinačeno,
  3. ako je tokom izvršnog postupka namirio tražiocu izvršenja potraživanje mimo suda tako da je tražilac izvršenja dvostruko namiren.
- (2) Ako je tražilac izvršenja izvršenjem naplatio određeni novčani iznos, izvršenik u prijedlogu za protivizvršenje može tražiti plaćanje zakonskih zatezних kamata od dana naplate tog iznosa.

- (3) Prijedlog za protivizvršenje iz stava 1 ovog člana može se podnijeti u roku od 30 dana od dana kad je izvršenik saznao za razlog za protivizvršenje, a najkasnije u roku od jedne godine od dana okončanja izvršnog postupka.

### **Postupak po prijedlogu za protivizvršenje**

#### **Član 51**

- (1) Prijedlog iz člana 50 ovog zakona sud će dostaviti tražiocu izvršenja i pozvati ga da se u roku od tri dana izjasni o tom prijedlogu.
- (2) Ako se u roku iz stava 1 ovog člana tražilac izvršenja usprotivi prijedlogu, sud će o njemu odlučiti nakon održanog ročišta. Ako se tražilac izvršenja u tom roku ne izjasni o prijedlogu, sud će ocijeniti hoće li o njemu odlučiti bez održavanja ročišta.
- (3) Rješenjem kojim prihvati prijedlog sud će naložiti tražiocu izvršenja da u roku od osam dana vrati izvršeniku ono što je izvršenjem dobio.

### **Rješenje o protivizvršenju**

#### **Član 52**

- (1) Na osnovu pravosnažnog i izvršnog rješenja kojim je tražiocu izvršenja naloženo da izvršeniku vrati ono što je izvršenjem dobio, sud će, na prijedlog izvršenika, rješenjem odrediti protivizvršenje.
- (2) Protivizvršenje se provodi po odredbama ovog zakona o izvršenju.

### **Nemogućnost protivizvršenja**

#### **Član 53**

Prijedlog za protivizvršenje neće se prihvatiti ako su u pogledu onoga što je tražilac izvršenja dobio izvršenjem nastupile takve stvarne i pravne promjene da vraćanje više nije moguće.

## **VII - ODLAGANJE, OBUSTAVA I OKONČANJE IZVRŠENJA**

### **1. Odlaganje izvršenja na prijedlog tražioca izvršenja**

#### **Član 54**

- (1) Na prijedlog tražioca izvršenja sud će, potpuno ili djelimično, odgoditi izvršenje ako sprovođenje izvršenja nije otpočelo.
- (2) Ako je sprovođenje izvršenja otpočelo, a izvršenik se, u roku koji mu je sud odredio, izjasnio protiv odlaganja, sud će odbiti prijedlog za odlaganje.
- (3) Ako je zakonom predviđeno da se izvršenje mora tražiti u određenom roku, tražilac izvršenja može podnijeti prijedlog za odlaganje u tom roku.

## **Vrijeme za koje se izvršenje odlaže**

### **Član 55**

- (1) Sud će odložiti izvršenje za vrijeme koje je tražilac izvršenja odredio.
- (2) Ako je tražilac izvršenja podnio prijedlog za odlaganje izvršenja u slučaju u kome je zakonom predviđeno da se izvršenje ima tražiti u određenom roku, izvršenje se ne može odložiti za vrijeme duže od tog roka.

## **Nastavljanje odloženog postupka**

### **Član 56**

- (1) Odloženo izvršenje nastaviti će se, po službenoj dužnosti, po isteku vremena za koje je odloženo.
- (2) Na prijedlog tražioca izvršenja sud može nastaviti izvršenje i prije isteka roka za koji je odloženo.

## **2. Obustava i okončanje izvršenja**

### **Obustava izvršenja**

#### **Član 57**

- (1) Ako ovim zakonom nije drukčije određeno, izvršenje će se obustaviti po službenoj dužnosti, ako je izvršna isprava pravosnažno ukinuta, preinačena, poništena, stavljena van snage ili je na drugi način određeno da je bez dejstva, odnosno ako potvrda o izvršnosti bude ukinuta.
- (2) Izvršenje će se obustaviti ako je postalo nemoguće ili se iz drugih razloga ne može provesti.
- (3) Prije donošenja rješenja o obustavi izvršenja iz prethodnog stava sud će pozvati tražioca izvršenja da podnese prijedlog iz člana 8 stava 4 ovog zakona u roku od osam dana od dana prijema poziva. Rješenje o obustavi izvršenja sud će donijeti ako prijedlog ne bude u roku podnesen ili ako je prijedlog neosnovan.
- (4) Izvršenje na pojedinim predmetima će se na prijedlog izvršenika obustaviti ako sud utvrdi da su nakon isteka roka za prigovor sprovođenjem izvršenja zahvaćeni predmeti koji nisu određeni u rješenju o izvršenju, a izuzeti su od izvršenja ili je na njima mogućnost izvršenja ograničena.
- (5) Rok za prigovor zbog razloga iz stava 4 ovog člana iznosi osam dana i počinje teći od dana kada je izvršenik saznao da je izvršenjem zahvaćen predmet koji je izuzet od izvršenja, odnosno na kojem je mogućnost izvršenja ograničena. Nakon isteka roka od trideset dana od preuzimanja radnje kojom su zahvaćeni predmeti iz stava 4 ovog člana prijedlog iz te odredbe više se ne može podnijeti.

- (6) Rješenjem o obustavi izvršenja ukinut će se sve sprovedene izvršne radnje ako se time ne dira u stečena prava trećih lica.

### **Dovršenje izvršenja**

#### **Član 58**

- (1) Postupak izvršenja smatra se završenim pravosnažnošću odluke o odbacivanju ili odbijanju izvršnog prijedloga, sprovođenjem izvršne radnje kojom se izvršenje dovršava ili obustavom izvršenja.
- (2) Ako je izvršenje završeno sprovođenjem radnje kojom je dovršeno, sud će to utvrditi posebnim rješenjem.

### **Poddio drugi**

## **B. IZVRŠENJE RADI NAPLATE NOVČANOG POTRAŽIVANJA**

### **VIII - OPĆE ODREDBE**

#### **Obim izvršenja novčanih potraživanja**

#### **Član 59**

Izvršenje radi ostvarenja novčanog potraživanja određuje se i provodi u obimu koji je potreban za namirenje tog potraživanja.

#### **Redosljed namirenja više tražilaca izvršenja**

#### **Član 60**

Više tražilaca izvršenja koji ostvaruju svoja potraživanja prema istom izvršeniku na istom predmetu izvršenja, namiruju se onim redom kojim su stekli pravo da se iz tog predmeta namire, ako zakonom nije drukčije određeno.

## **IX – IZVRŠENJE NA NEPOKRETNOSTI**

### **1. Opće odredbe**

#### **Izvršne radnje**

#### **Član 61**

Izvršenje na nepokretnosti sprovodi se zabilježbom izvršenja u zemljišnoj knjizi, utvrđivanjem vrijednosti nepokretnosti, prodajom nepokretnosti i namirenje tražioca izvršenja iz iznosa dobijenog prodajom.

#### **Nepokretnost kao predmet izvršenja**

## **Član 62**

- (1) Ukoliko nije drukčije određeno, predmet izvršenja može biti samo nepokretnost kao cjelina određena propisima koji uređuju vlasništvo i druga stvarna prava upisana u zemljišne knjige.
- (2) Ako je u vezi s nekom nepokretnosti uspostavljeno suvlasništvo (idealni suvlasnički dio nepokretnosti), taj dio nepokretnosti može biti samostalan predmet izvršenja u pogledu kojeg se na odgovarajući način primjenjuju pravila ovog zakona o izvršenju na nepokretnostima.
- (3) Ako je u vezi s nekom nepokretnosti ili njenog idealnog dijela osnovano pravo plodouživanja, ono može biti samostalni predmet izvršenja s tim da izvršenik može namiriti svoje potraživanje iz plodova koje to pravo daje na osnovu nekog pravnog odnosa (najamnina, zakupnina), u pogledu čega se na odgovarajući način primjenjuju pravila ovog zakona o izvršenju na pravima.

### **Dokaz o svojini izvršenika**

## **Član 63**

- (1) Uz prijedlog za izvršenje na nepokretnosti tražilac izvršenja je dužan podnijeti izvod iz zemljišne knjige kao dokaz o tome da je nepokretnost upisana kao svojina izvršenika.
- (2) Ako je pravo na nepokretnosti iz stava 1 ovog člana upisano u zemljišnoj knjizi na drugo lice, a ne na izvršenika, prijedlogu se može udovoljiti samo ako tražilac izvršenja podnese ispravu koja je odgovarajuća za upis izvršenikova prava.

### **Promjena predmeta izvršenja**

## **Član 64**

- (1) Izvršenik može u roku od tri dana od dana dostavljanja rješenja o izvršenju predložiti da se izvršenje odredi na drugom predmetu izvršenja. Uz prijedlog izvršenik je dužan podnijeti dokaz o svom pravu na drugom predmetu izvršenja na osnovu kojeg je na tom predmetu moguće odrediti izvršenje protiv izvršenika.
- (2) Sud će prijedlog dostaviti tražiocu izvršenja koji se o njemu može izjasniti u roku od tri dana od dana dostave. U tom roku tražilac izvršenja može postaviti zahtjev za naknadu troškova započetog postupka izvršenja na nepokretnosti te zatražiti davanje obezbjeđenja za naknadu štete koju bi mogao trpjeti zbog promjene predmeta izvršenja.
- (3) Nakon izjašnjavanja tražioca izvršenja ili nakon proteka roka za davanje izjave sud će donijeti rješenje o prijedlogu.
- (4) Sud može prihvatiti prijedlog ako izvršenik učini vjerovatnim:
  1. da bi izvršenje na nepokretnosti na kojoj je ono predloženo za njega bilo naročito nepovoljno,

2. da iz opravdanih razloga nije sam mogao unovčiti predmet koji predlaže kao novi predmet izvršenja i dobijenim sredstvima namiriti tražioca izvršenja, te
3. da bi se potraživanje tražioca izvršenja moglo u potpunosti namiriti iz drugog predloženog predmeta izvršenja.
- (5) Sud neće prihvatiti prijedlog za promjenu predmeta izvršenja ako ocijeni da bi se zbog toga izvršenje znatnije odužilo ili otežalo odnosno ako bi tražilac izvršenja zbog toga mogao trpiti znatniju štetu.
- (6) Ako je tražilac izvršenja na nepokretnosti na kojoj je zatražio izvršenje prije pokretanja izvršnog postupka stekao založno pravo radi obezbjeđenja svog potraživanja, bez njegova se pristanka izvršenje ne može odrediti na drugom predmetu izvršenja.
- (7) Ako je izvršenik kao drugo sredstvo izvršenja predložio izvršenje na plati, penziji, invalidnini ili drugom stalnom novčanom primanju, sud može prihvatiti prijedlog uz uslov da izvršenik učini vjerovatnim da će potraživanje biti namireno u roku od jedne godine od donošenja rješenja o njegovom prijedlogu i da se tražilac izvršenja saglasi s tim. I u slučaju iz ovog stava moraju biti ispunjeni uslovi iz stava 4 tačke 1 i stava 6 ovog člana.
- (8) Ako je tražilac izvršenja to zatražio, sud će prihvatanje prijedloga izvršenika usloviti davanjem obezbjeđenja da će troškovi tražioca izvršenja u pokrenutom postupku izvršenja na nepokretnosti koji su nastali do donošenja rješenja o promjeni predmeta izvršenja biti u potpunosti namireni odmah po donošenju tog rješenja, te davanjem obezbjeđenja na naknadu štete koju bi tražilac izvršenja mogao pretrpiti zbog promjene predmeta izvršenja. O visini obezbjeđenja te roku u kom ono mora biti dato odlučuje sud u rješenju o promjeni predmeta izvršenja. Ako izvršenik ne da obezbjeđenje u roku koji sud odredi, smatrat će se da je odustao od prijedloga za promjenu predmeta izvršenja.
- (9) U rješenju o promjeni predmeta izvršenja sud će odrediti izvršenje na drugom predloženom predmetu izvršenja.
- (10) Protiv rješenja kojim se odbija prijedlog izvršenika za promjenu predmeta izvršenja prigovor nije dozvoljen.
- (11) Ako je određeno drugo sredstvo izvršenja, zabilježba izvršenja na nepokretnosti ostaje na snazi sve do namirenja potraživanja tražioca izvršenja.

### **Zabilježba izvršenja**

#### **Član 65**

- (1) Čim donese rješenje o izvršenju, sud će po službenoj dužnosti odrediti da se u zemljišnoj knjizi upiše zabilježba izvršenja.
- (2) Tom zabilježbom tražilac izvršenja stiče pravo da svoje potraživanje namiri iz nepokretnosti (pravo na namirenje) i u slučaju da treće lice kasnije stekne vlasništvo te nepokretnosti.

- (3) Nakon zabilježbe izvršenja nije dopušten upis promjene prava vlasništva zasnovan na raspolaganju izvršenika bez obzira na to kad je to raspolaganje preduzeto.
- (4) Promjena vlasnika nekretnine tokom izvršnog postupka ne sprečava da se taj postupak nastavi protiv novog vlasnika kao izvršenika do visine vrijednosti nepokretnosti. Sve radnje preduzete prije toga ostaju na snazi i novi vlasnik ne može u postupku preduzimati one radnje koje ne bi mogao preduzeti prijašnji vlasnik da do promjene vlasništva nije došlo.
- (5) Na prijedlog tražioca izvršenja sud će donijeti rješenje o nastavljanju izvršnog postupka protiv novog vlasnika kao izvršenika u tom postupku. Protiv tog rješenja novi vlasnik nema pravo na prigovor.
- (6) Tražilac izvršenja koji je predložio izvršenje, a nije prije stekao založno pravo, stiće zabilježbom izvršenja pravo da se iz nekretnine namiri prije lica koje na toj nepokretnosti kasnije stekne založno pravo ili pravo na namirenje.

### **Pristupanje izvršenju**

#### **Član 66**

- (1) Nakon upisa zabilježbe izvršenja u zemljišne knjige ne može se za namirenje drugog potraživanja istog ili drugog tražioca izvršenja na toj nekretnini provesti poseban izvršni postupak.
- (2) Tražilac izvršenja za čije je potraživanje kasnije određeno izvršenje na istoj nepokretnosti stupa u već pokrenuti izvršni postupak.
- (3) Pokrenutom izvršnom postupku može se pristupiti do pravosnažnosti rješenja o dosuđivanju nekretnine kupcu.
- (4) O pristupanju postupku sud će obavijestiti tražioca izvršenja u čiju je korist prije obavljena zabilježba.
- (5) Razlozi zbog kojih izvršenje nije dopušteno u korist pojedinih od više tražilaca izvršenja u čiju se korist izvršenje provodi na istoj nekretnini, odnosno razlozi za obustavu izvršenja u odnosu na pojedine od tražilaca izvršenja, bez uticaja su na sprovođenje postupka u korist drugih tražilaca izvršenja.
- (6) Ako se razlog za odlaganje izvršenja tiče samo jednog od više tražilaca izvršenja, izvršenje se neće odgoditi, već će sud prilikom donošenja rješenja o namirenju odrediti odlaganje namirenja tog tražioca izvršenja sve dok se postupak u odnosu na njega ne nastavi. Sredstva namijenjena namirenju tog tražioca izvršenja sud će pohraniti do nastavka postupka. Ako postupak ne bude nastavljen, ta će se sredstva upotrijebiti za namirenje drugih tražilaca izvršenja odnosno predat će se izvršeniku.

### **Založna prava**

#### **Član 67**

- (1) U postupku izvršenja na nepokretnosti namiruju se i založni povjerioci koji nisu predložili izvršenje.
- (2) Založna prava uknjižena na nekretnini prestaju danom pravosnažnosti rješenja o dosudi nepokretnosti kupcu i ako založni povjerioci nisu potpuno namireni.
- (3) Kupac nekretnine i založni povjerilac mogu se sporazumjeti, najkasnije na ročištu za prodaju, da založno pravo ostane na nepokretnosti i nakon pravosnažnosti rješenja o dosudi nepokretnosti, a da kupac preuzme izvršenikov dug prema tom povjeriocu u iznosu koji bi mu pripadao u izvršnom postupku. U tom se slučaju kupovna cijena umanjuje za iznos preuzetog duga.
- (4) Kupac i založni povjerilac sklapaju sporazum iz stava 3 ovog člana u obliku sudskog poravnanja u izvršnom postupku.

### **Služnosti i stvarni tereti**

#### **Član 68**

- (1) Stvarne služnosti i stvarni tereti na nekretnini ne prestaju prodajom nekretnine.
- (2) Prodajom nekretnine ne prestaju ni lične služnosti koje su u zemljišnoj knjizi upisane prije prava radi čijeg se namirenja izvršenje sprovodi.
- (3) Ostale lične služnosti prestaju pravosnažnošću rješenja o dosuđivanju nekretnine.
- (4) Na lične služnosti iz stava 3 ovog člana na odgovarajući način se primjenjuju odredbe člana 67 stavova 3 i 4 ovog zakona.

### **Razgledanje nepokretnosti**

#### **Član 69**

- (1) U zaključku o prodaji sud će odrediti vrijeme kada lica zainteresovana za kupovinu nepokretnosti mogu razgledati nekretninu i obezbijediti putem sudskog izvršioca nesmetano razgledanje nekretnine.
- (2) Iz opravdanih razloga sud će licu zainteresovanom za kupovinu nekretnine dati, na njegov zahtjev, odobrenje da nekretninu razgleda i van vremena iz stava 1 ovog člana, po potrebi i uz učešće sudskog izvršitelja. Troškove vanrednog razgledanja nekretnine snosi to lice.
- (3) Ako izvršenik ili druga lica sprečavaju ili ometaju razgledanje nepokretnosti, sud će odrediti da se izvršenik i ta lica udalje s nekretnine za vrijeme razgledanja. Rješenje o udaljavanju sprovodi sudski izvršitelj, po potrebi, uz pomoć policije.

### **Obezbjeđenje nepokretnosti**

#### **Član 70**

- (1) Sud može, radi sprečavanja oštećenja nepokretnosti, omogućavanja njezine procjene, razgledavanja, zaštite i sl. na prijedlog tražioca izvršenja:
1. odrediti da se izvršenik i druga lica privremeno ili trajno udalje s nepokretnosti,
  2. povjeriti nepokretnost na čuvanje tražiocu izvršenja ili trećem licu,
  3. odrediti druge mjere potrebne radi njezine zaštite odnosno omogućavanja nesmetanog sprovođenja izvršenja.
- (2) Sredstva potrebna radi sprovođenja mjera iz stava 1 ovog člana dužan je unaprijed obezbijediti tražilac izvršenja.

## **2. Izuzimanje od izvršenja**

### **Član 71**

- (1) Ne može biti predmet izvršenja poljoprivredno zemljište zemljoradnika u površini 10 ari.
- (2) Odredba stava 1 ovog člana ne odnosi se na izvršenje radi ostvarenja novčanih potraživanja obezbijedenih ugovornim založnim pravom na nepokretnostima (hipotekom).

## **3. Utvrđivanje vrijednosti nepokretnosti**

### **Način utvrđivanja vrijednosti**

### **Član 72**

- (1) O načinu utvrđivanja vrijednosti nepokretnosti sud će odlučiti zaključkom odmah nakon što donese rješenje o izvršenju. Ako je to potrebno, sud će prije donošenja zaključka održati ročište sa strankama.
- (2) Utvrđivanju vrijednosti nepokretnosti pristupit će se nakon što rješenje o izvršenju postane pravosnažno, ali i prije toga ako tražilac izvršenja to predloži, unaprijed obezbijedi za to potrebna sredstva i izjavi da će snositi troškove utvrđivanja vrijednosti i ako izvršenje bude obustavljeno.
- (3) Vrijednost nepokretnosti utvrđuje se na osnovu procjene vještaka i drugih činjenica u visini njene tržišne cijene na dan procjene. Pri utvrđivanju vrijednosti nekretnine vodit će se računa i o tome koliko ona manje vrijedi zbog toga što na njoj ostaju određena prava i poslije prodaje.
- (4) Umjesto procjene na način predviđen u stavu 3 ovog člana, sud može utvrđivanje vrijednosti nepokretnosti zatražiti od nadležnog organa porezne uprave Direkcije za finansije Distrikta.
- (5) Sud će na prijedlog stranke koji mora biti podnesen najkasnije osam dana prije ročišta za prodaju, na ročištu za prodaju zaključkom ponovo utvrditi vrijednost nepokretnosti ako stranka učini vjerovatnim da se ta vrijednost izmijenila za više od jedne trećine od dana prethodnog utvrđivanja vrijednosti do dana podnošenja prijedloga.

## **Zaključak o utvrđivanju vrijednosti**

### **Član 73**

Vrijednost nepokretnosti sud utvrđuje zaključkom o prodaji.

### **Prigovor nedostatka pokrića**

### **Član 74**

- (1) Svako lice koje ima pravo da bude namireno iz prodajne cijene nepokretnosti, a koja po redu prvenstva dolazi ispred tražioca izvršenja, može predložiti da se izvršenje obustavi ako utvrđena vrijednost nekretnine ne pokriva ni djelimično iznos potraživanja tražioca izvršenja.
- (2) Prijedlog za obustavu izvršenja može se podnijeti u roku od osam dana od dana dostavljanja zaključka o prodaji.
- (3) Sud će prema okolnostima slučaja, ocijeniti da li je prodaja cjelishodna s obzirom na vjerovatnu visinu iznosa djelimičnog namirenja tražioca izvršenja koji je predložio izvršenje.
- (4) U slučaju obustave izvršenja iz stava 1 ovog člana troškove postupka snosi tražilac izvršenja koji je pokrenuo izvršenje.

## **4. Prodaja nepokretnosti**

### **Zaključak o prodaji**

### **Član 75**

- (1) Nakon sprovođenja postupka za utvrđivanje vrijednosti nepokretnosti sud donosi zaključak o prodaji nepokretnosti kojim se utvrđuje vrijednost nepokretnosti i određuju način i uslovi prodaje te vrijeme i mjesto prodaje ako se prodaja vrši putem javnog nadmetanja.
- (2) U zaključku o prodaji istaknut će se posebno mogućnost da se vrijednost konačno utvrdi na ročištu za prodaju.
- (3) Zaključak o prodaji objavljuje se na sudskoj oglasnoj tabli i na drugi uobičajen način.
- (4) Zaključak o prodaji objavit će se, na prijedlog stranke, u sredstvima javnog informisanja ako ona predujmi za to potrebna sredstva.
- (5) Sud može ovlastiti stranku da o svom trošku objavi zaključak o prodaji u sredstvima javnog informisanja odnosno da o zaključku obavijesti lica koja se bave posredovanjem u prodaji nekretnina.
- (6) Od objavljivanja zaključka o prodaji na sudskoj oglasnoj tabli do dana prodaje mora proteći najmanje trideset dana.

- (7) Zaključak o prodaji dostavlja se strankama, založnim povjeriocima, licima koja imaju upisano ili zakonsko pravo preče kupovine i nadležnom organu porezne uprave Direkcije za finansije Distrikta.

## **Pravo preče kupovine**

### **Član 76**

- (1) Lice koje ima zakonsko ili ugovorno pravo preče kupovine upisano u zemljišnoj knjizi ima prednost pred najpovoljnijim ponudiocem ako odmah po zaključenju nadmetanja izjavi da nepokretnost kupuje uz iste uslove.
- (2) Ako je nepokretnost prodana neposrednom pogodbom, sud će pozvati nosioca uknjiženog prava preče kupovine, odnosno nosioca zakonskog prava preče kupovine, da se u određenom roku u zapisnik kod suda izjasni hoće li se tim pravom koristiti.

## **Način prodaje**

### **Član 77**

- (1) Prodaja nepokretnosti obavlja se putem usmenog javnog nadmetanja.
- (2) Ročište za prodaju nepokretnosti održava se u sudskoj zgradi, ako sud nije drukčije odredio.
- (3) Ročište za prodaju održava se pred sudijom pojedincem.
- (4) Stranke, založni povjerioci i nosioci ličnih služnosti i stvarnih tereta koji prestaju prodajom nekretnine mogu se sporazumjeti, najkasnije do prodaje nepokretnosti na javnom nadmetanju, da se prodaja nepokretnosti izvrši u određenom roku neposrednom pogodbom preko lica ovlaštenog za promet nekretnina, sudskog izvršitelja ili na drugi način.
- (5) Ugovor o prodaji neposrednom pogodbom zaključuje se u pismenoj formi. Ugovor u ime i za račun izvršenika zaključuje lice kojem je povjerena prodaja na osnovu zaključka kojim ga sud ovlašćuje na zaključenje tog ugovora. Potpisi lica koja zaključuju ugovor moraju biti ovjereni u sudu.
- (6) Ugovor iz stava 5 ovog člana proizvodi dejstvo od dana pravosnažnosti rješenja o dosudi.

## **Uslovi prodaje**

### **Član 78**

- (1) Uslovi prodaje, pored ostalih podataka, sadrže:
1. bliži opis nepokretnosti s pripadcima,
  2. naznačenje prava koja ne prestaju prodajom,

3. naznačenje da li je nepokretnost slobodna od lica i stvari ili se koristi i po kom pravnom osnovu,
  4. vrijednost nepokretnosti utvrđenu zaključkom o prodaji,
  5. cijenu po kojoj se nepokretnost može prodati i ko je dužan platiti poreze i takse u vezi sa prodajom,
  6. rok u kojem je kupac dužan položiti cijenu,
  7. način prodaje,
  8. iznos obezbjeđenja, rok u kojem mora biti dato, kod koga i kako mora biti dato,
  9. posebne uslove koje kupac mora ispunjavati da bi mogao steći nekretninu.
- (2) Rok u kojem je kupac dužan položiti cijenu ne može biti duži od 30 dana od dana prodaje, bez obzira na to da li se cijena isplaćuje odjednom ili u ratama.

### **Davanje obezbjeđenja**

#### **Član 79**

- (1) U javnom nadmetanju, kao kupci mogu učestvovati samo lica koja su prethodno dala obezbjeđenje.
- (2) Pri prodaji neposrednom pogodbom kupac daje obezbjeđenje u sudski depozit.
- (3) Pored lica koja po ovom zakonu nisu dužna dati obezbjeđenje u izvršnom postupku, obezbjeđenje nisu dužni dati tražilac izvršenja na čiji je prijedlog određeno izvršenje i nosioci prava upisanih u zemljišnoj knjizi koja prestaju prodajom nepokretnosti, ako njihova potraživanja dostižu iznos obezbjeđenja i ako bi se, s obzirom na njihov prvenstveni red i utvrđenu vrijednost nepokretnosti, taj iznos mogao namiriti iz kupovne cijene.
- (4) Obezbjeđenje iznosi jednu desetinu određene vrijednosti nepokretnosti.
- (5) Ponudiocima čija ponuda nije prihvaćena vratit će se obezbjeđenje odmah nakon zaključenja javnog nadmetanja.

### **Jedan ponudilac**

#### **Član 80**

- (1) Ročište za javno nadmetanje održat će se i kad prisustvuje samo jedan ponudilac.
- (2) Sud može, na prijedlog stranke ili drugih lica koja se namiruju u izvršnom postupku, odrediti, prema okolnostima slučaja, da se ročište za prodaju odgodi ako sudjeluje samo jedan ponudilac.

## **Ko ne može biti kupac**

### **Član 81**

Kupac ne može biti izvršenik, sudija ili drugo lice koje službeno sudjeluje u postupku prodaje, njihov supružnik i s njima povezana lica (preci, potomci, braća i sestre i njihovi supružnici), a ni lice koje po zakonu ne može steći nepokretnost koja je predmet izvršenja.

## **Prodajna cijena**

### **Član 82**

- (1) Na prvom ročištu za javno nadmetanje ne može se nepokretnost prodati ispod četiri petine utvrđene vrijednosti.
- (2) Ako se nepokretnost ne proda na prvom ročištu, sud će zakazati drugo ročište na kojem se nepokretnost može prodati ispod četiri petine utvrđene vrijednosti, ali ne ispod polovine te vrijednosti.
- (3) Od prvog do drugog ročišta za javno nadmetanje mora proteći najmanje trideset dana.
- (4) Stranke i lica koja se namiruju u postupku mogu se sporazumjeti, izjavom datom na zapisnik, da se nepokretnost može prodati nadmetanjem i za cijenu nižu od one iz stavova 1 i 2 ovog člana.
- (5) Ako su se stranke prije pokretanja izvršnog postupka u sporazumu sklopljenom pred sudom saglasile da se nepokretnost radi naplate potraživanja tražioca izvršenja utvrđene tim sporazumom može prodati i za cijenu nižu od one iz stavova 1 i 2 ovog člana, nepokretnost se već na prvom ročištu za prodaju može prodati po toj cijeni ako u postupku ne sudjeluju druga lica koja se u njemu namiruju, a svoje su pravo upisali u zemljišnu knjigu prije nego što je u tu knjigu upisano pravo tražioca izvršenja kojim je obezbijeđena naplata njegovog potraživanja. Najniža cijena po kojoj se nekretnina može prodati u tom slučaju ne može biti ispod jedne trećine utvrđene vrijednosti.
- (6) Odredbe stavova od 1 do 5 ovog člana na odgovarajući se način primjenjuju i u slučaju u kojem se nepokretnost prodaje neposrednom pogodbom.

## **Ročište za nadmetanje i dosuda**

### **Član 83**

- (1) Pošto utvrdi da je udovoljeno uslovima za održavanje ročišta za nadmetanje, sudija objavljuje da se pristupa nadmetanju.
- (2) Nadmetanje se zaključuje nakon proteka deset minuta neposredno nakon stavljanja najpovoljnije ponude.
- (3) Nakon zaključenja nadmetanja sudija utvrđuje koji je ponudilac ponudio najveću cijenu i da je ispunio uslove da mu se dosudi nepokretnost.

- (4) O dosudi nepokretnosti sud donosi pismeno rješenje (rješenje o dosudi), koje se objavljuje na sudskoj tabli.
- (5) Smatrat će se da je rješenje iz stava 4 ovog člana dostavljeno svim licima kojima se dostavlja zaključak o prodaji te svim učesnicima u nadmetanju istekom trećeg dana od dana njegovog isticanja na oglasnoj tabli. Ta lica imaju pravo tražiti da im se u sudskoj pisarnici neposredno preda otpravak rješenja.
- (6) O ročištu za prodaju vodi se zapisnik.

### **Dosuda u slučaju prodaje neposrednom pogodbom**

#### **Član 84**

- (1) U slučaju prodaje neposrednom pogodbom sud će donijeti rješenje o dosudi nepokretnosti prodane neposrednom pogodbom pošto utvrdi da je udovoljeno uslovima za punovažnost prodaje.
- (2) Rješenje o dosudi objavljuje se na sudskoj tabli i dostavlja svim licima kojima se dostavlja zaključak o prodaji, kao i kupcu.

### **Polaganje cijene**

#### **Član 85**

- (1) Kupac je dužan položiti u sud cijenu u roku određenom u zaključku o prodaji.
- (2) Ako kupac u određenom roku ne položi cijenu, sud će rješenjem prodaju oglasiti nevažećom i odrediti novu prodaju.
- (3) Iz položenog obezbjeđenja namirit će se troškovi nove prodaje i nadoknaditi razlika između cijene postignute na prijašnjoj i novoj prodaji. Kupac nije dužan da nadoknadi razliku koja prelazi iznos obezbjeđenja.

### **Predaja nepokretnosti kupcu**

#### **Član 86**

- (1) U rješenju o dosudi sud će odrediti da će se nekretnina predati kupcu pošto položi cijenu i nakon što to rješenje postane pravosnažno.
- (2) Nakon što kupac položi cijenu i rješenje o dosudi postane pravosnažno, sud će zaključkom odrediti da se nekretnina preda kupcu i da se u zemljišnu knjigu upiše u njegovu korist pravo svojine. Tim zaključkom sud će odrediti i brisanje onih prava za koja je rješenjem o dosudi određeno da će se brisati iz zemljišne knjige.

### **Zaštita prava kupca**

#### **Član 87**

Ukidanje ili preinačenje rješenja o izvršenju poslije pravosnažnosti rješenja o dosudi nepokretnosti nema uticaja na pravo svojine kupca stečeno po odredbama člana 86 ovog zakona.

## **Obustava izvršenja**

### **Član 88**

- (1) Ako se nekretnina nije mogla prodati ni na drugom ročištu, sud će odrediti novu prodaju samo na prijedlog tražioca izvršenja.
- (2) Prijedlog za određivanje nove prodaje tražilac izvršenja ne može staviti prije proteka tri mjeseca od dana drugog ročišta niti nakon proteka jedne godine od toga dana.
- (3) Sud će obustaviti izvršenje ako tražilac izvršenja ne stavi prijedlog u roku određenom u stavu 2 ovog člana ili ako se nepokretnost nije mogla na prvom ročištu u nastavljenom postupku prodati ni za polovinu utvrđene vrijednosti.
- (4) U slučaju prodaje neposrednom pogodbom, sud će obustaviti izvršenje ako se nepokretnost nije mogla prodati u roku određenom sporazumom stranaka i lica koji se namiruju u postupku.
- (5) Obustava izvršenja ne sprečava pokretanje novog izvršnog postupka radi naplate istog potraživanja na istoj nepokretnosti.

## **5. Namirenje tražilaca izvršenja**

### **Kad se pristupa namirenju**

#### **Član 89**

Sud pristupa namirenju tražilaca izvršenja nakon pravosnažnosti rješenja o dosudi nepokretnosti kupcu i nakon što kupac položi cijenu.

### **Lica koja se namiruju**

#### **Član 90**

Iz prodajne cijene namiruju se tražioci izvršenja na čiji je prijedlog određeno izvršenje, založni povjerioci i kad nisu prijavili svoja potraživanja, lica koja imaju pravo na naknadu za lične služnosti i stvarne terete, Distrikt po osnovi poreza i drugih taksi te lica koja imaju potraživanja navedena u članu 91 stavu 1 tački 3 ovog zakona.

### **Prvenstveno namirenje**

#### **Član 91**

- (1) Iz iznosa dobivenog prodajom namiruju se prvenstveno, i to ovim redosljedom:
  1. troškovi izvršnog postupka;

2. porezi i druge takse dospjele za posljednju godinu koje terete prodatu nepokretnost;
  3. potraživanja na osnovu zakonskog izdržavanja, potraživanja na osnovu naknade štete nastale zbog narušenja zdravlja ili smanjenja odnosno gubitka radne sposobnosti, potraživanja naknade štete za izgubljeno izdržavanje zbog smrti davaoca izdržavanja, potraživanja zaposlenika te potraživanja doprinosa za zdravstveno i penzijsko osiguranje, dospjela za posljednju godinu dana.
- (2) Potraživanja iz stava 1 tačkaka 2 i 3 ovog člana namiruju se ako su prijavljena najkasnije na ročištu za diobu i ako se dokazuju izvršnom ispravom.
- (3) Vrijeme određeno u stavu 1 tačkama od 2 do 3 ovog člana računa se do dana donošenja rješenja o dosudi nepokretnosti.

### **Namirenje ostalih potraživanja**

#### **Član 92**

- (1) Nakon namirenja potraživanja iz člana 91 ovog zakona, namiruju se potraživanja osigurana založnim pravom, potraživanja tražioca izvršenja na čiji je prijedlog određeno izvršenje i naknada za lične služnosti i stvarne terete koji se prodajom gase.
- (2) Odredba stava 1 ovog člana na odgovarajući se način primjenjuje i na namirenje podzaložnih prava (nadhipoteka) i drugih prava koja su teret prava koja se namiruju.
- (3) Povjerioci iz stava 1 ovog člana namiruju se po redu sticanja založnog prava i prava na namirenje tražioca izvršenja koji su predložili izvršenje odnosno po redu upisa u zemljišnu knjigu ličnih služnosti, a ako je bio ustupljen prvenstveni red, tada se povjerioci iz stava 1 ovog člana namiruju po tom uspostavljenom prvenstvenom redu.
- (4) Troškovi i kamate za posljednje tri godine do donošenja rješenja o dosudi nekretnine kupcu, određeni izvršnom ispravom, namiruju se po istom redosljedu kao i glavno potraživanje.
- (5) Poslije namirenja potraživanja iz stava 1 ovog člana namiruju se potraživanja navedena u članu 91 stavu 1 tačkama 2 i 3 ovog zakona, za vrijeme za koje se ne namiruju po tim odredbama, i to najprije potraživanja iz tačke 2, a zatim potraživanja iz tačke 3 stava 1 člana 91 ovog zakona.

### **Visina nadoknade za lične služnosti i druga prava koja prestaju prodajom**

#### **Član 93**

- (1) Ako se o visini nadoknade za lične služnosti ili druga prava koja prestaju prodajom ne postigne sporazum između nosioca tih prava i tražilaca izvršenja koji po redu za namirenje dolaze poslije njih, visinu naknade određuje sud, uzimajući u obzir naročito vrijeme za koje bi ta prava još trajala, njihovu vrijednost i godine života nosioca tih prava.

- (2) Kupac i nosilac prava lične služnosti mogu se sporazumjeti da kupac preuzme služnost, a da se iznos naknade, utvrđen prema stavu 1 ovog člana, odbije od kupovne cijene.

### **Srazmjerno namirenje**

#### **Član 94**

Više potraživanja koja imaju isti red namirenja namiruju se srazmjerno svojoj visini ako iznos dobiven prodajom nije dovoljan za potpuno namirenje.

### **Osporavanje potraživanja**

#### **Član 95**

Lice koje se namiruje iz prodajne cijene može, ako to utiče na njegovo namirenje, najkasnije na ročištu za diobu, drugom takvom licu osporiti postojanje potraživanja, njenu visinu i red namirenja.

### **Upućivanje na parnicu**

#### **Član 96**

- (1) Sud će lice koje je osporilo potraživanje uputiti da u određenom roku, koji ne može biti duži od 15 dana, pokrene parnicu ako odluka zavisi od spornih činjenica, osim ako svoje osporavanje ne dokazuje pravosnažnom presudom. Ako lice koje osporava potraživanje to osporavanje potkrepljuje pravosnažnom presudom, sud će o osporavanju odlučiti u izvršnom postupku. Sud će o osporavanju odlučiti u izvršnom postupku i ako nisu sporne činjenice od kojih zavisi donošenje odluke.
- (2) Ako prihvati osporavanje, sud će na parnicu uputiti lice čije je potraživanje osporeno.
- (3) Ako lice koje je osporilo potraživanje učini vjerovatnim postojanje razloga za osporavanje, sud će donošenje rješenja o namirenju lica čije je potraživanje osporeno odgoditi do završetka parnice. Izuzetno, sud može donošenje rješenja o namirenju i namirenje tog lica uslovljavati davanjem obezbjeđenja.
- (4) Iznos koji se odnosi na osporeno potraživanje položiti će se u sudski depozit.
- (5) Ako lice koje je upućeno na parnicu u roku koji mu je za to određen ne dokaže da je parnicu pokrenulo, smatrat će se da potraživanje nije osporeno odnosno da je odustalo od zahtjeva da njegovo potraživanje bude namireno u izvršnom postupku.
- (6) Presuda donesena u parnici o osporenom potraživanju djeluje protiv izvršenika i svih tražilaca izvršenja.
- (7) Odredbom stava 4 ovog člana ne dira se u pravo lica koje je upućeno na parnicu da, i nakon završetka izvršnog postupka, pokrene parnicu protiv lica čije je potraživanje osporilo, odnosno protiv lica koje mu je potraživanje osporilo.

- (8) Na prijedlog lica čije je potraživanje osporeno sud može odgodu donošenja rješenja o namirenju i namirenje potraživanja tog lica uslovljavati davanjem primjerenog obezbjeđenja za štetu koju bi to lice moglo pretrpjeti zbog odgode namirenja. Ako lice koje je osporilo potraživanje ne da primjerenom obezbjeđenje u roku koji mu je određen, smatrat će se da potraživanje nije osporeno.
- (9) Lice čije je potraživanje bilo osporeno ima pravo na naknadu štete koju je pretrpjelo zbog neosnovanog osporavanja potraživanja, ako je ono bilo učinjeno jedino radi toga da mu se šteti ili mu smeta u izvršavanju i ostvarenju njegovih prava.

## **6. Posebne odredbe o načinu namirenja nekih potraživanja**

### **Nedospjelo potraživanje**

#### **Član 97**

- (1) Potraživanje založnog povjerioca koje nije dospjelo do dana donošenja rješenja o namirenju za koje nisu ugovorene kamate, isplatit će se nakon odbitka iznosa koji odgovara zakonskim zateznim kamatama, od dana donošenja rješenja o namirenju do dana dospijeća tog potraživanja.
- (2) Nedospjelo potraživanje za koje su ugovorene kamate isplatit će se zajedno s iznosom ugovorenih kamata obračunatih do dana donošenja rješenja o namirenju.

### **Nedospjelo potraživanje povremenih primanja**

#### **Član 98**

- (1) Potraživanja povremenih primanja po osnovi zakonskog izdržavanja, po osnovi naknade štete nastale zbog narušenja zdravlja ili smanjenja odnosno gubitka radne sposobnosti i po osnovi naknade štete za izgubljeno izdržavanje zbog smrti davaoca izdržavanja, koja su obezbijedena zalogom, a dospijevaju nakon dana donošenja rješenja o namirenju, namiruju se na izričit zahtjev tražioca izvršenja.
- (2) Potraživanja iz stava 1 ovog člana obračunavaju se na način na koji se obračunava naknada za ličnu služnost.

### **Potraživanja uz uslov**

#### **Član 99**

- (1) Iznos uslovnog potraživanja koje je obezbijedeno založnim pravom izdvojiti će se i položiti u sudski depozit i isplatiti kad se odložni uslov ispuni ili kad bude sigurno da se raskidni uslov neće ispuniti.
- (2) Ako se odložni uslov ne ispuni ili se ispuni raskidni uslov, izdvojeni iznos cijene služi za namirenje tražilaca izvršenja čija potraživanja nisu potpuno ili nisu uopće namirena, a ako takvih tražilaca izvršenja nema ili cijeli iznos nije iscrpljen njihovim namirenjem, taj će se iznos, odnosno ostatak, predati izvršeniku.

## **Predbilježba založnog prava i zabilježba spora**

### **Član 100**

- (1) Ako je u zemljišnu knjigu upisana predbilježba založnog prava, a lice u čiju je korist predbilježba upisana dokaže da je u toku postupak za njegovo opravdanje, odnosno da još nije protekao rok za pokretanje tog postupka, potraživanje na koje se predbilježba odnosi namiruje se na način na koji se namiruje potraživanje uz odložni uslov.
- (2) Potraživanje za koje je u zemljišnoj knjizi upisana zabilježba spora radi brisanja založnog prava ili zabilježba o drugom sporu namiruje se na način na koji se namiruje potraživanje uz raskidni uslov.

## **7. Ročište za diobu, rješenje o namirenju i brisanje prava i tereta**

### **Ročište za diobu**

#### **Član 101**

- (1) Nakon pravosnažnosti rješenja o dosudi nekretnine kupcu, sud određuje ročište za diobu cijene (iznosa dobijenog prodajom).
- (2) Na ročište se pozivaju, pored stranaka, i lica koja prema stanju spisa i prema podacima iz zemljišne knjige polažu pravo da se namire iz tog iznosa.
- (3) U pozivu ta će se lica upozoriti na to da će se potraživanje tražioca izvršenja koji ne dođe na ročište uzeti prema stanju koje proizilazi iz zemljišne knjige i spisa te da, najkasnije na ročištu za diobu, mogu drugom osporiti potraživanje, njegovu visinu i red namirenja.
- (4) Na ročištu se raspravlja o namirenju tražioca izvršenja i drugih lica koja postavljaju zahtjev za namirenje.

### **Rješenje o namirenju**

#### **Član 102**

- (1) O namirenju tražioca izvršenja i drugih lica kojima pripada pravo na namirenje sud odlučuje rješenjem nakon održanog ročišta, uzimajući u obzir podatke iz spisa i zemljišne knjige, kao i stanja utvrđenog na ročištu.
- (2) Pri donošenju rješenja iz stava 1 ovog člana uzeće se u obzir samo ona potraživanja po kojima je rješenje o izvršenju postalo pravosnažno najkasnije na dan ročišta za diobu.
- (3) Ako ima potraživanja u odnosu na koje rješenje o izvršenju nije postalo pravosnažno najkasnije na dan ročišta za diobu, ta će se potraživanja namiriti, nakon pravosnažnosti rješenja o izvršenju iz preostalog iznosa prodajne cijene, ako je ima, a ostatak će se vratiti izvršeniku.

- (4) Prigovor protiv rješenja o namirenju odlaže izvršenje rješenja ako bi rješenje kojim se usvaja prigovor moglo uticati na namirenje.

### **Brisanje prava i tereta**

#### **Član 103**

- (1) Nakon pravosnažnosti rješenja o dosudi sud će rješenjem odrediti da se u zemljišnoj knjizi brišu upisana prava i tereti, osim onih koji ostaju na nekretnini i poslije predaje nekretnine kupcu ili koje je kupac preuzeo.
- (2) Kupac može tužbom tražiti brisanje založnih prava čije je brisanje sud propustio odrediti u smislu odredbe stava 1 ovog člana. Tužba se može podnijeti u roku propisanom pravilima zemljišnoknjižnog prava.

## **X - IZVRŠENJE NA POKRETNIM STVARIMA**

### **1. Opće odredbe**

#### **Izuzimanje od izvršenja**

#### **Član 104**

- (1) Ne mogu biti predmeti izvršenja:

1. odjeća, obuća, rublje i drugi predmeti lične upotrebe, posteljne stvari, posuđe, dio namještaja koji je neophodan izvršeniku i članovima njegovog domaćinstva, štednjak i hladnjak,
2. hrana i ogrev za potrebe izvršenika i članova njegovog domaćinstva za tri mjeseca,
3. gotov novac izvršenika po osnovu potraživanja koja su izuzeta od izvršenja te gotov novac izvršenika koji ima stalna mjesečna primanja do mjesečnog iznosa koji je po zakonu izuzet od izvršenja, proporcionalno vremenu do idućeg primanja,
4. ordenje, medalje, ratne spomenice i drugo ordenje i priznanja, vjenčani prsten, lična pisma, rukopisi i drugi lični spisi izvršenika, porodične fotografije, lične i porodične isprave i porodični portreti,
5. pomagala koja su invalidu ili drugom licu s tjelesnim nedostacima data na osnovu propisa ili koja je sam nabavio, a nužna su za obavljanje životnih funkcija.

- (2) Poštanska pošiljka ili poštanska novčana doznaka upućena izvršeniku ne može biti predmet izvršenja prije uručenja.

### **Izvršne radnje**

#### **Član 105**

- (1) Izvršenje na pokretnim stvarima sprovodi se njihovom zapljenom, procjenom i prodajom te namirenjem tražioca izvršenja iz iznosa dobivenog prodajom.

- (2) Prijedlogom za izvršenje može se zahtijevati da se provede samo pljenidba i procjena, ali u tom slučaju tražilac izvršenja je dužan u roku od tri mjeseca od dana pljenidbenog popisa, odnosno procjene podnijeti prijedlog za prodaju stvari.
- (3) Ako tražilac izvršenja u roku iz stava 2 ovog člana ne podnese prijedlog za prodaju, izvršenje će se obustaviti

## **2. Pljenidba i procjena pokretnina Obavijest o pljenidbi**

### **Član 106**

- (1) Sudski izvršitelj, prije nego što pristupi pljenidbi, predat će izvršeniku rješenje o izvršenju i pozvat će ga da plati iznos za koji je određeno izvršenje s kamatama i troškovima.
- (2) Ako izvršeniku rješenje o izvršenju nije moglo da se preda prilikom pljenidbe, dostavit će mu se naknadno.
- (3) O vremenu i mjestu pljenidbe obavijestit će se tražilac izvršenja ako je to tražio.
- (4) Odsutnost tražioca izvršenja ne sprečava sprovođenje pljenidbe.
- (5) O obavljenoj pljenidbi obavijestit će se stranka koja joj nije bila prisutna.

### **Predmet pljenidbe**

### **Član 107**

- (1) Pljenidba se obavlja sastavljanjem pljenidbenog popisa.
- (2) Popisati se mogu stvari koje se nalaze u posjedu izvršenika te njegove stvari koje se nalaze u posjedu tražioca izvršenja.
- (3) Smatra se da izvršeniku pripadaju stvari koje ima na sebi, odnosno koje se nalaze na ili u njegovoj nepokretnosti, u stanu u kojem stanuje, odnosno u poslovnoj prostoriji koju je zakupio.
- (4) Smatra se da su bračni drugovi suvlasnici u jednakim dijelovima svih pokretnih stvari koje se zateknu u njihovoj kući, stanu, poslovnoj prostoriji ili drugoj nepokretnosti.
- (5) Izvršenikove stvari koje se nalaze u posjedu trećeg lica mogu se popisati samo ako ono na to pristane.
- (6) Ako treće lice ne pristane na popis, sud će na tražioca izvršenja, na njegov prijedlog, prenijeti izvršenikovo pravo na predaju stvari.

### **Obim pljenidbenog popisa**

### **Član 108**

- (1) Popisat će se onoliko stvari koliko je potrebno za namirenje potraživanja tražioca izvršenja i troškova izvršenja.
- (2) Prvenstveno se popisuju stvari u pogledu kojih nema primjedbi o postojanju prava koje bi sprečavalo izvršenje i stvari koje se najlakše mogu unovčiti, pri čemu će se o tome uzeti u obzir i izjave prisutnih stranaka i trećih lica.
- (3) Sud može, na prijedlog izvršenika, naknadno odrediti izvršenje na drugom predmetu, a ne na onom koji je na prijedlog tražioca izvršenja popisano, ako postoji znatan nesrazmjer između vrijednosti toga predmeta i iznosa potraživanja. U tom se slučaju na odgovarajući način primjenjuju odredbe člana 64 ovog zakona.

### **Čuvanje popisanih stvari**

#### **Član 109**

- (1) Popisane stvari sudski izvršilac će ostaviti na čuvanje izvršeniku, ako sud, na prijedlog tražioca izvršenja, nije odredio da se one predaju na čuvanje tražiocu izvršenja ili trećem licu.
- (2) Rizik od uništenja ili oštećenja stvari datih na čuvanje tražiocu izvršenja ili trećem licu snosi tražilac izvršenja, osim ako je uništenje ili oštećenje posljedica više sile.
- (3) Na popisanim stvarima koje su ostavljene izvršeniku na čuvanje vidljivo će se naznačiti da su zaplijenjene.
- (4) Gotov novac, vrijednosni papiri i dragocjenosti predat će se u sudski depozit.
- (5) U sudski depozit predat će se i druge stvari veće vrijednosti, ako su pogodne za takav način čuvanja.

### **Zabrana raspolaganja popisanim stvarima**

#### **Član 110**

- (1) Izvršeniku je zabranjeno raspolagati zaplijenjenim stvarima.
- (2) U rješenje o izvršenju unosi se ta zabrana te upozorenje izvršeniku na kaznenopravne posljedice postupanja protivno zabrani.

### **Sticanje založnog prava**

#### **Član 111**

- (1) Tražilac izvršenja stiče pljenidbenim popisom založno pravo na popisanim pokretninama.
- (2) Ako je popis obavljen u korist više tražilaca izvršenja, prvenstveni red založnog prava stečenog popisom ili zabilješkom u zapisniku o pljenidbenom popisu određuje se prema danu kad je prijedlog za izvršenje primljen u sudu, a ako su prijedlozi za izvršenje primljeni istog dana, njihova založna prava imaju isti prvenstveni red.

- (3) Ako je prijedlog za izvršenje upućen poštom preporučenom pošiljkom, dan predaje pošti smatra se kao dan primitka u sudu.

### **Bezuspješan pokušaj pljenidbe**

#### **Član 112**

- (1) Ako se pri pljenidbi ne nađu pokretne stvari koje mogu biti predmet izvršenja, sud će o tome obavijestiti tražioca izvršenja koji nije bio prisutan pljenidbi.
- (2) Tražilac izvršenja može u roku od tri mjeseca od dana dostave obavijesti odnosno od dana pokušane pljenidbe kojoj je bio prisutan predložiti da se pljenidba ponovo sprovede.
- (3) Ako tražilac izvršenja u roku iz stava 2 ovog člana ne predloži ponovo sprovođenje pljenidbe, ili ako se ni pri ponovnoj pljenidbi ne nađu stvari koje mogu biti predmet izvršenja, sud će obustaviti izvršenje.

### **P r o c j e n a**

#### **Član 113**

- (1) Istodobno s pljenidbenim popisom obaviti će se i procjena pokretnina.
- (2) Procjenu obavlja sudski izvršilac, ako sud nije odredio da je obavi sudski procjenitelj ili posebni vještak.
- (3) Stranka može predložiti da procjenu obavi vještak iako to sud nije odredio. Ako sud prihvati taj prijedlog, troškove vještačenja dužan je predujmiti predlagač u roku koji sud odredi. Ako predujam ne bude plaćen u roku, smatrat će se da je predlagač odustao od svog prijedloga.
- (4) O prijedlogu iz stava 3 ovog člana sud odlučuje zaključkom.
- (5) Troškove vještačenja iz stava 3 ovog člana snosi predlagač, bez obzira na ishod izvršnog postupka.
- (6) Stranka može, u roku od tri dana od obavljene procjene, predložiti sudu utvrđivanje niže odnosno više vrijednosti zaplijenjenih pokretnih stvari od procijenjene ili određivanje nove procjene. O prijedlogu sud odlučuje zaključkom.

### **Zapisnik o pljenidbenom popisu i procjeni**

#### **Član 114**

- (1) O pljenidbenom popisu i procjeni sastavlja se zapisnik.
- (2) U zapisnik se, uz ostalo, pojedinačno naznačuju zaplijenjene stvari s njihovom procijenjenom vrijednosti i unose izjave stranaka i učesnika u postupku.

## **Zabilješka umjesto pljenidbenog popisa**

### **Član 115**

Ako se nakon pljenidbenog popisa odredi izvršenje na zaplijenjenim stvarima radi naplate drugog potraživanja istog tražioca izvršenja ili potraživanja drugog tražioca izvršenja, neće se obaviti ponovni popis i procjena tih pokretnina, nego će se u nastavku zapisnika samo zabilježiti podaci iz kasnijeg rješenja o izvršenju.

### **3. Prodaja stvari**

#### **Vrijeme prodaje**

### **Član 116**

- (1) Prodaja zaplijenjenih stvari može se provesti tek nakon pravosnažnosti rješenja o izvršenju, osim ako izvršenik ne pristane da se prodaja obavi prije toga, ili ako su u pitanju stvari koje su podložne brzom kvarenju, ili ako postoji opasnost od znatnog pada njihove cijene, ili ako tražilac izvršenja da obezbjeđenje za štetu koju bi bio dužan nadoknaditi izvršeniku u slučaju da rješenje o izvršenju ne postane pravosnažno.
- (2) O prodaji prije pravosnažnosti rješenja o izvršenju sud odlučuje zaključkom.
- (3) Između dana pljenidbenog popisa i dana prodaje mora proteći najmanje petnaest dana.
- (4) Prodaja se može provesti i prije isteka roka iz stava 3 ovog člana iz razloga navedenih u stavu 1 ovog člana.

#### **Način prodaje**

### **Član 117**

- (1) Prodaja stvari se vrši putem usmenog javnog nadmetanja ili neposrednom pogodbom. Način prodaje određuje zaključkom sud, pazeći na to da se postigne najpovoljnije unovčenje stvari.
- (2) Javno nadmetanje provodi sudski izvršilac.
- (3) Prodaja neposrednom pogodbom obavlja se između kupca, s jedne strane, i sudskog izvršioca ili lica koje obavlja komisione poslove, s druge strane. Sudski izvršilac pokretne stvari prodaje, u ime i za račun izvršenika, a lice koje obavlja komisione poslove u svoje ime, a za račun izvršenika.
- (4) Prodaja javnim nadmetanjem odredit će se ako su u pitanju stvari veće vrijednosti, a može se očekivati da će se prodati po većoj cijeni od procijenjene vrijednosti.
- (5) Prodaja stvari objavit će se blagovremeno na oglasnoj tabli suda, a može se objaviti i na način predviđen za objavljivanje prodaje nepokretnosti.
- (6) Tražilac izvršenja i izvršenik obavijestit će se o mjestu, danu i satu prodaje.

## **Prodajna cijena**

### **Član 118**

- (1) Na prvom javnom nadmetanju stvari se ne mogu prodati ispod dvije trećine procijenjene vrijednosti. One se ispod te cijene ne mogu prodati ni u roku koji je sud odredio za prodaju neposrednom pogodbom.
- (2) Ako se na prvom nadmetanju ne postigne cijena iz stava 1 ovog člana, sud će, na prijedlog stranke, odrediti novo javno nadmetanje na kojem se pokretnine mogu prodati ispod te cijene, ali ne ispod jedne trećine procijenjene vrijednosti.
- (3) Odredba stava 2 ovog člana na odgovarajući se način primjenjuje i kad se zaplijenjene stvari nisu mogle prodati neposrednom pogodbom po cijeni iz stava 1 ovog člana u roku koji je odredio sud.
- (4) Prijedlog za drugo nadmetanje ili za prodaju neposrednom pogodbom stranka može podnijeti u roku od petnaest dana od dana prvog nadmetanja odnosno od dana proteka roka koji je sud odredio za prodaju neposrednom pogodbom.
- (5) Sud će obustaviti postupak ako nijedna od stranaka ne predloži u propisanom roku drugo nadmetanje odnosno ponovnu prodaju neposrednom pogodbom, ili ako se stvari ne uspiju prodati ni na drugom nadmetanju odnosno neposrednom pogodbom u ponovnom roku koji sud odredi.

## **Obaveze i prava kupca**

### **Član 119**

- (1) Kupac je dužan položiti cijenu i stvari uzeti odmah nakon zaključenja nadmetanja, odnosno prodaje neposrednom pogodbom.
- (2) Ako kupac odmah ne položi cijenu, smatrat će se da nadmetanje nije uspjelo. Kupac je dužan strankama nadoknaditi štetu koju su one pretrpjele njegovim odustankom, o čemu sud, na zahtjev stranaka, odlučuje u izvršnom postupku.
- (3) Sudski izvršilac predat će stvari kupcu i ako nije položio cijenu, ako na to, na svoj rizik, pristane tražilac izvršenja u granicama iznosa koji bi mu pripao iz postignute cijene. Ako kupac ne položi cijenu u roku koji mu je određen, tražilac izvršenja može zatražiti od suda da u istom postupku naloži kupcu da mu plati cijenu te nakon pravosnažnosti i izvršnosti tog rješenja protiv njega predložiti izvršenje.
- (4) Kupac u svakom slučaju postaje vlasnik kupljenih stvari njihovim preuzimanjem.
- (5) Kupcu ne pripadaju prava po osnovi odgovornosti za nedostatke stvari.

## **4. Namirenje tražioca izvršenja**

### **Namirenje jednog tražioca izvršenja**

## **Član 120**

- (1) Ako se iz prodajne cijene namiruje samo jedan tražilac izvršenja, sud će, bez održavanja ročišta, rješenjem odrediti da se iz iznosa dobivenog prodajom stvari i oduzetog novca namire redom: troškovi postupka, troškovi određeni u izvršnoj ispravi, kamate do dana unovčenja stvari i glavno potraživanje.
- (2) Višak prodajne cijene koji preostane nakon namirenja predat će se izvršeniku ako za to nema smetnji.

### **Namirenje više tražilaca izvršenja**

## **Član 121**

- (1) Ako se u izvršnom postupku namiruje više tražilaca izvršenja odnosno ako se, pored tražilaca izvršenja namiruju i lica čija prava prestaju prodajom stvari, oni se iz prodajne cijene namiruju onim redom kojim su stekli založno ili drugo pravo koje prodajom prestaje, ako zakonom za određena potraživanja nije propisano prvenstveno pravo namirenja.
- (2) Tražioci izvršenja istog reda koji se iz prodajne cijene ne mogu potpuno namiriti, namiruju se srazmjerno iznosima svojih potraživanja.
- (3) Troškovi izvršnog postupka, troškovi određeni izvršnom ispravom i kamate imaju isti red namirenja kao i glavno potraživanje.
- (4) Pri donošenju rješenja o namirenju sud će uzeti u obzir samo ona potraživanja za koja je rješenje o izvršenju postalo pravosnažno do dana prodaje popisanih stvari.

## **5. Primjena odredaba o izvršenju na nepokretnosti**

## **Član 122**

Odredbe ovog zakona o izvršenju na nepokretnostima primjenjuju se na odgovarajući način i u postupku izvršenja na pokretnim stvarima, ako odredbama glave X ovog zakona nije drukčije određeno.

## **XI – IZVRŠENJE NA NOVČANOM POTRAŽIVANJU IZVRŠENIKA**

### **Opće odredbe**

#### **Izuzimanje od izvršenja**

## **Član 123**

Izuzeti su od izvršenja:

1. primanja po osnovu zakonskog izdržavanja, nadoknade štete nastale zbog narušenja zdravlja ili smanjenja, odnosno gubitka radne sposobnosti i nadoknade štete za izgubljeno izdržavanje zbog smrti davaoca izdržavanja,

2. primanja po osnovu nadoknade zbog tjelesnog oštećenja prema propisima o invalidskom osiguranju,
3. primanja po osnovu socijalne pomoći,
4. primanja po osnovu privremene nezaposlenosti,
5. primanja po osnovu dodatka na djecu,
6. primanja po osnovu stipendije i pomoći učenicima i studentima,
7. nadoknada za rad osuđenika, osim za potraživanja po osnovu zakonskog izdržavanja te za potraživanja nadoknade štete prouzrokovane krivičnim djelom osuđenika.

## **Ograničenje izvršenja**

### **Član 124**

- (1) Izvršenje na plati, nadoknadi umjesto plate, nadoknadi za skraćeno radno vrijeme i nadoknadi zbog umanjenja plate i penzije, radi naplate potraživanja po osnovi zakonskog izdržavanja, nadoknade štete nastale zbog narušenja zdravlja ili smanjenja odnosno gubitka radne sposobnosti i nadoknade štete za izgubljeno izdržavanje zbog smrti davaoca izdržavanja može se provesti do iznosa od jedne polovine, a radi naplate potraživanja po drugoj osnovi do iznosa od jedne trećine plate, nadoknade umjesto plate ili penzije.
- (2) Ograničenja izvršenja na novčanim potraživanjima izvršenika iz stava 1 ovog člana primjenjuju se samo ako potraživanja ne prelaze 1.000,00 KM mjesečno. Ako su potraživanja veća od 1.000,00 KM mjesečno, ograničenja se primjenjuju do iznosa potraživanja od 1.000,00 KM mjesečno, a na preostalom dijelu potraživanja može se provesti izvršenje bez ograničenja.
- (3) Ako izvršenik prima zajamčenu platu u skladu s kolektivnim ugovorom ili zakonom, izvršenje radi naplate potraživanja iz stava 1 ovog člana može se provesti do iznosa od jedne trećine odnosno do iznosa od jedne četvrtine takve plate.
- (4) Izvršenje na primanju invalida po osnovu novčane nadoknade za fizičko oštećenje i dodatak za tuđu pomoć i njegu može se sprovesti samo radi naplate potraživanja po osnovi zakonskog izdržavanja, nadoknade štete nastale zbog narušenja zdravlja ili smanjenja odnosno gubitka radne sposobnosti i naknade štete za izgubljeno izdržavanje zbog smrti davaoca izdržavanja, i to do iznosa od jedne polovine tog primanja.
- (5) Izvršenje na primanju po osnovu ugovora o doživotnom izdržavanju i doživotnoj renti te na primanju po osnovu ugovora o osiguranju života može se provesti samo na dijelu koji prelazi iznos najviše stalne socijalne pomoći koja se isplaćuje na području Distrikta.

## **Izvršne radnje**

### **Član 125**

- (1) Izvršenje na novčanom potraživanju provodi se pljenidbom i prenosom, ako ovim zakonom za pojedine slučajeve nije drukčije određeno.
- (2) Izvršnim prijedlogom može se zahtijevati da se odredi samo pljenidba novčanog potraživanja, ali u tom je slučaju tražilac izvršenja dužan u roku od 30 dana od dana kad mu je dostavljeno rješenje o zapljeni odnosno od dana kad mu je dostavljena obavijest o izjašnjavanju izvršenikova dužnika ili o tome da se on nije izjasnio u određenom roku, podnijeti prijedlog za prenos potraživanja.
- (3) Ako tražilac izvršenja u tom roku ne podnese takav prijedlog izvršenje će se obustaviti.

## **Obim izvršenja**

### **Član 126**

- (1) Pljenidba i prenos novčanog potraživanja mogu se odrediti i sprovesti samo u iznosu koji je potreban za namirenje potraživanja tražioca izvršenja, osim ako je u pitanju nedjeljivo potraživanje.
- (2) Ako više tražilaca izvršenja traži izvršenje na istom potraživanju koje je djeljivo, pljenidba i prenos određuju se u odgovarajućim iznosima, posebno u korist svakog tražioca izvršenja.

## **1. Pljenidba potraživanja**

### **Dejstvo pljenidbe**

#### **Član 127**

- (1) Pljenidba se sprovodi dostavom izvršenikovom dužniku rješenja o izvršenju kojim se izvršenikovom dužniku zabranjuje da izvršeniku ispuni novčano potraživanje, a izvršeniku se zabranjuje da to potraživanje naplati ili da inače raspolaže njim i zalogom koji je dat za njegovo obezbjeđenje.
- (2) Pljenidba je sprovedena danom dostave rješenja o izvršenju izvršenikovom dužniku.
- (3) Tražilac izvršenja pljenidbom stiče založno pravo na izvršenikovom potraživanju.
- (4) Izvršenikov dužnik nema pravo prigovora protiv rješenja o pljenidbi.

## **Pljenidba potraživanja zasnovana na vrijednosnom papiru**

### **Član 128**

- (1) Pljenidbu novčanog potraživanja zasnovanu na vrijednosnom papiru koji se prenosi indosamentom, ili za čije je ostvarenje inače potreban taj papir, sprovodi sudski

izvršitelj oduzimanjem papira od izvršenika i njegovom predajom sudu. Pljenidba je obavljena oduzimanjem papira od izvršenika.

- (2) Pravne radnje potrebne za očuvanje ili ostvarenje prava iz papira iz stava 1 ovog člana obavlja u izvršenikovo ime sudski izvršitelj na osnovu zaključka suda.
- (3) Pljenidba novčanog potraživanja zasnovana na dionici za koju nije izdata isprava o dionici kao i na dionici koja glasi na ime za koju je izdata ta isprava obavlja se dostavom rješenja o pljenidbi dioničkom društvu. U tom slučaju odgovarajuće se primjenjuju odredbe ovog člana.

### **Zabrana potraživanja po štednom ulogu**

#### **Član 129**

- (1) Izuzetno od odredbi člana 128 ovog zakona, pljenidba potraživanja po štednom ulogu kod banke ili drugog pravnog lica može se sprovesti i bez prethodnog oduzimanja štedne knjižice dužnika.
- (2) Ako tražilac izvršenja ne raspolaže potrebnim podacima o štednom ulogu izvršenika može sudu predložiti donošenje rješenja kojim će privremeno zaplijeniti sve štedne uloge dužnika kod određenog pravnog lica (prijedlog za privremenu pljenidbu).
- (3) Rješenjem o privremenoj pljenidbi sud će od pravnog lica zatražiti i podatke o štednim ulozima izvršenika.
- (4) Pravno lice je dužno bez odlaganja dati sudu tražene podatke i ne smije obavijestiti izvršenika da su ti podaci traženi.
- (5) Nakon što dobije tražene podatke, sud će o njima obavijestiti tražioca izvršenja, koji je dužan u roku od osam dana predložiti izvršenje na određenom štednom ulogu ili na određenim štednim ulozima. U povodu takvog prijedloga sud će donijeti rješenje o pljenidbi određenoga štednoga uloga ili određenih štednih uloga i staviti van snage rješenje o privremenoj pljenidbi štednih uloga.
- (6) Prijedlog za privremenu pljenidbu iz stava 2 ovoga člana i prijedlog iz stava 5 ovoga člana smatraju se, u smislu odredbi propisa o sudskim taksama, jednim prijedlogom.
- (7) Ako štedna knjižica nije prethodno oduzeta od izvršenika, smatrat će se da je pljenidba na određenom štednom ulogu provedena danom dostave rješenja o privremenoj pljenidbi pravnom licu kod kojeg se vodi štedni ulog.
- (8) Pravno lice koje vodi štedni ulog ima pravo na nadoknadu troškova za obavljanje radnji u skladu s odredbama ovog člana. Zahtjev za naknadu troškova može se podnijeti u roku od petnaest dana od poduzimanja radnje. Ti troškovi ulaze u troškove izvršnog postupka.

### **Založno pravo na kamate**

#### **Član 130**

Založno pravo stečeno na potraživanju po kojem teku kamate odnosi se i na kamate koje dospijevaju nakon pljenidbe.

## **Prvenstveni red**

### **Član 131**

- (1) Prvenstveni red založnih prava više tražilaca izvršenja određuje se prema danu primitka izvršnog prijedloga.
- (2) Ako je izvršni prijedlog upućen poštom preporučenom pošiljkom, dan predaje pošti smatra se kao dan predaje sudu.
- (3) Ako su izvršni prijedlozi više tražilaca izvršenja primljeni u sudu istog dana, založna prava imaju isti prvenstveni red.
- (4) Potraživanja s istim redom prvenstva namiruju se srazmjerno, ako se ne mogu namiriti u cijelosti.
- (5) Ako zbog provedbe izvršenja na novčanom potraživanju prestaju založna i druga prava koja su stečena prije pokretanja postupka, prvenstveni red u namirenju tih prava određuje se prema propisima koji uređuju sticanje reda prvenstva tih prava izvan izvršnog postupka.

## **Izjašnjenje izvršenikova dužnika**

### **Član 132**

- (1) Sud će, na prijedlog tražioca izvršenja, zatražiti od izvršenikova dužnika da se u roku koji odredi sud izjasni o tome priznaje li i u kojem iznosu zaplijenjeno potraživanje i da li je voljan da ga namiri, kao i da li je njegova obaveza da namiri to potraživanje uslovljena ispunjenjem neke druge obaveze.
- (2) Prijedlog za izjašnjavanje izvršenikova dužnika tražilac izvršenja može spojiti s izvršnim prijedlogom ili ga dati posebnim podneskom nakon tog prijedloga, a najkasnije do prenosa potraživanja.
- (3) Izjašnjavanje izvršenikova dužnika dostavit će se tražiocu izvršenja bez odlaganja.

## **Odgovornost izvršenikova dužnika**

### **Član 133**

- (1) Izvršenikov dužnik odgovara tražiocu izvršenja za štetu koju mu je nanio tim što se nije izjasnio, ili što se neistinito ili nepotpuno izjasnio.
- (2) Sud će upozoriti izvršenikovog dužnika na tu njegovu odgovornost.

## **Pljenidba potraživanja obezbijeđena založnim pravom upisanim u zemljišnoj knjizi**

### **Član 134**

- (1) Pljenidba potraživanja obezbijeđena založnim pravom upisanim u zemljišnoj knjizi sprovodi se upisom pljenidbe u tu knjigu.
- (2) Upis se obavlja po službenoj dužnosti uz naznaku da je pljenidba, na osnovu koje je na potraživanju stečeno založno pravo, određeno radi namirenja potraživanja tražioca izvršenja.
- (3) Ako ima više tražilaca izvršenja, prvenstveni red njihovih potraživanja određuje se prema vremenu upisa.

### **3. Prenos potraživanja**

#### **a) Opće odredbe**

##### **Vrste prenosa**

### **Član 135**

- (1) Zaplijenjeno potraživanje prenosi se na tražioca izvršenja u skladu s njegovim prijedlogom, radi naplate ili umjesto isplate.
- (2) Tražilac izvršenja je dužan već u izvršnom prijedlogu zatražiti da se potraživanje na njega prenese radi naplate ili umjesto isplate, ako ovim zakonom nije drukčije određeno. O vrsti prenosa sud odlučuje rješenjem o izvršenju.
- (3) U rješenju o izvršenju ili u posebnom rješenju o prenosu pozvat će se izvršenikov dužnik da dužni iznos položi kod suda uplatom na određeni račun i da o tome obavijesti sud.

#### **Posebni uslovi za prenos nedjeljivog potraživanja**

### **Član 136**

- (1) Potraživanje koje se zasniva na vrijednosnom papiru koji se prenosi indosamentom ili za čije je ostvarenje potrebno podnošenje toga papira, ili koje se iz drugih razloga ne može dijeliti u pogledu prenosa ili ostvarenja, može se prenijeti samo u svom punom iznosu.
- (2) Ako je više tražilaca izvršenja podnijelo prijedlog za prenos u razne dane, sud će prenijeti potraživanje na tražioca izvršenja koji je prvi podnio prijedlog, a ako je više tražilaca izvršenja podnijelo prijedlog istoga dana, potraživanje će se prenijeti na tražioca izvršenja čije je potraživanje najveće.

#### **Sprovođenje prenosa**

### **Član 137**

- (1) Prenos potraživanja je sproveden dostavom izvršenikovom dužniku rješenja kojim je prenos određen.
- (2) Prenos potraživanja zasnovan na vrijednosnom papiru koji se prenosi indosamentom ili kojeg je radi ostvarenja inače potrebno podnijeti, sproveden je kada sud na taj papir stavi izjavu o prenosu i papir s tom izjavom preda tražiocu izvršenja.

### **Obaveze izvršenika i tražioca izvršenja**

#### **Član 138**

- (1) Izvršenik je dužan u roku koji odredi sud, a na zahtjev tražioca izvršenja na koga je potraživanje preneseno, dati objašnjenja koja su tražiocu izvršenja potrebna radi ostvarivanja tog potraživanja i predati mu isprave koje se na to potraživanje odnose.
- (2) Tražilac izvršenja na koga je prenesen dio potraživanja dužan je, ako to izvršenik zatraži, u roku koji odredi sud, dati obezbjeđenje da će nakon ostvarenja tog potraživanja vratiti isprave koje se odnose na potraživanje.
- (3) Sud će na prijedlog tražioca izvršenja sprovesti izvršenje protiv izvršenika radi predaje isprava ako ih on sam ne preda.
- (4) Predaju isprava koje se nalaze kod trećeg lica tražilac izvršenja može zahtijevati tužbom, ako bi to pravo imao izvršenik.
- (5) Na ispravi koja se daje tražiocu izvršenja sud će zabilježiti da je sproveden prenos potraživanja za koje je određeno izvršenje.

### **Polaganje novca kod suda**

#### **Član 139**

Izvršenikov dužnik kojemu je dostavljeno rješenje o izvršenju ili posebno rješenje o prenosu ispunjava svoju obavezu polaganjem novca kod suda koji sprovodi izvršenje.

### **b) Prenos radi naplate**

#### **Ovlaštenja tražioca izvršenja**

#### **Član 140**

- (1) Prenosom potraživanja radi naplate ovlašćuje se tražilac izvršenja da traži od izvršenikova dužnika isplatu iznosa naznačenog u rješenju o izvršenju ili u posebnom rješenju o prenosu, ako je taj iznos dospio, da obavlja sve radnje koje su potrebne radi

očuvanja i ostvarenja prenesenog potraživanja i da se koristi pravima u vezi sa zalogom koji je dat za obezbjeđenje tog potraživanja.

- (2) Prenosom potraživanja radi naplate tražilac izvršenja nije ovlašten na teret izvršenika zaključiti poravnanje, izvršenikovu dužniku oprostiti dug ili prenesenim potraživanjima inače raspolagati, te ni s izvršenikovim dužnikom sklopiti ugovor da odluku o potraživanju, ako je ona sporna, donese arbitraža.
- (3) Tražiocu izvršenja na koga je preneseno potraživanje radi naplate izvršenikov dužnik može istaknuti samo prigovore koje bi mogao istaknuti izvršeniku.
- (4) Ustupanje prenesenog potraživanja izvršeno od strane izvršenika poslije prenosa nema pravnog dejstva na prava koja je tražilac izvršenja stekao prenosom.

### **Prenos radi naplate potraživanja upisanog u zemljišnoj knjizi**

#### **Član 141**

Prenos radi naplate potraživanja upisanog u zemljišnoj knjizi upisat će se po službenoj dužnosti.

### **Uslovljenost obaveze izvršenikova dužnika predajom stvari**

#### **Član 142**

- (1) Ako obaveza izvršenikova dužnika da isplati potraživanje zavisi od obaveze izvršenika da mu preda određenu stvar koja se nalazi u posjedu izvršenika, a ta je obaveza utvrđena pravosnažnom presudom, sud će, na prijedlog tražioca izvršenja na koga je potraživanje preneseno radi naplate, naložiti izvršeniku predaju stvari sudu radi predaje izvršenikovu dužniku.
- (2) Na prijedlog tražioca izvršenja, sud će prema izvršeniku koji nije predao stvar u određenom roku, provesti izvršenje radi predaje stvari.

### **Obavješćavanje izvršenika o tužbi za naplatu prenesenog potraživanja**

#### **Član 143**

Tražilac izvršenja koji je podnio tužbu radi naplate prenesenog potraživanja dužan je bez odlaganja obavijestiti izvršenika o pokrenutoj parnici, a u protivnom odgovara izvršeniku za štetu koja mu je tim propustom nanescena.

### **Zakašnjenje u naplati prenesenog potraživanja**

#### **Član 144**

- (1) Tražilac izvršenja koji se ne brine za naplatu prenesenog potraživanja odgovara za štetu koja je time nanescena drugom tražiocu izvršenja koji ima založno ili koje drugo pravo koje se namiruje iz potraživanja.

- (2) U slučaju iz stava 1 ovog člana sud može, na prijedlog drugog tražioca izvršenja, ukinuti rješenje o prijenosu potraživanja na neurednog tražioca izvršenja i potraživanje prenijeti na drugog tražioca izvršenja.

### **Namirenje tražioca izvršenja**

#### **Član 145**

- (1) Tražilac izvršenja na koga je potraživanje preneseno radi naplate namiruje se iz sredstava položenih kod suda.
- (2) Namirenje tražioca izvršenja i drugih lica čija prava prestaju sprovođenjem izvršenja sprovodi se uz odgovarajuću primjenu odredbi članova 120 i 121 ovog zakona.

### **c) Prenos umjesto isplate**

#### **Član 146**

- (1) Zaplijenjeno potraživanje prelazi prenosom umjesto isplate na tražioca izvršenja prenesenog iznosa, sa dejstvom ustupanja potraživanja uz naknadu.
- (2) Ako je preneseno potraživanje obezbijeđeno založnim pravom upisanim u zemljišnoj knjizi, sud će po službenoj dužnosti, prenijeti izvršenikova prava na tražioca izvršenja a brisati založno pravo upisano u korist izvršenika.
- (3) Tražilac izvršenja na kojeg je potraživanje preneseno umjesto isplate dužan je potraživanje naplatiti po pravilima koja važe za potraživanja prenesena radi naplate, s tim da se novac dobijen ostvarenjem potraživanja isplaćuje izravno tražiocu izvršenja osim u slučaju iz stava 4 ovog člana.
- (4) Tražilac izvršenja na koga je potraživanje preneseno umjesto isplate smatra se namirenim i samim prenosom, u visini tog potraživanja, ako u izvršnom postupku nije sudjelovalo više tražilaca izvršenja ili drugih povjerilaca koji se namiruju iz prenesenog potraživanja. Ako u izvršnom postupku sudjeluju takva lica, tražilac izvršenja na koga je potraživanje preneseno umjesto isplate smatrat će se tražiocem izvršenja na koga je potraživanje preneseno radi naplate.
- (5) Okolnost da je na tražioca izvršenja potraživanje preneseno umjesto isplate ne utiče na odgovornost izvršenika za istinitost i naplativost prenesenog potraživanja.

## **4. Posebne odredbe o izvršenju na plati i drugim stalnim novčanim primanjima**

### **Primjena odredbi glave XII ovog zakona**

#### **Član 147**

U izvršenju na plati i drugim stalnim novčanim primanjima primjenjuju se odredbe članova od 123 do 146 ovog zakona, ako odredbama članova od 147 do 154 ovog zakona nije drukčije određeno.

## **Rješenje o izvršenju**

### **Član 148**

- (1) Rješenjem o izvršenju na plati određuje se pljenidba određenog dijela plate i nalaže se poslodavcu koji izvršeniku isplaćuje platu da novčani iznos za koji je određeno izvršenje isplati odnosno isplaćuje tražiocu izvršenja nakon pravosnažnosti tog rješenja.
- (2) Rješenje o izvršenju odnosi se i na povećanje plate do kojeg dođe nakon dostave rješenja o izvršenju kao i na sva primanja izvršenika po osnovu rada.

## **Izvršenje kada pravo na izdržavanje ima više lica**

### **Član 149**

- (1) Ako pravo na zakonsko izdržavanje odnosno pravo na rentu za izgubljeno izdržavanje zbog smrti davaoca izdržavanja prema istom izvršeniku ima više lica, a ukupni iznos njihovih potraživanja prelazi dio plate koji može biti predmet izvršenja, izvršenje se određuje i provodi u korist svakog od takvih tražilaca izvršenja srazmjerno visini njihovih potraživanja.
- (2) Ako nakon započetog sprovođenja izvršenja na plati odnosno drugom stalnom novčanom primanju bude podnesen novi prijedlog za izvršenje na potraživanje iz stava 1 ovog člana, sud će prije doneseno rješenje o izvršenju izmijeniti po službenoj dužnosti u smislu stava 1 ovog člana i odrediti iznos koji će se ubuduće isplaćivati pojedinim tražiocima izvršenja.
- (3) U slučaju iz stava 2 ovog člana, rješenje o izvršenju dostavlja se i ranijem tražiocu izvršenja koji protiv tog rješenja može izjaviti prigovor.

## **Mjesto isplate**

### **Član 150**

- (1) Potraživanja za koja nije propisano bezgotovinsko plaćanje tražilac izvršenja naplaćuje neposredno na blagajni na kojoj se izvršeniku isplaćuje plata.
- (2) Tražilac izvršenja ima pravo zahtijevati da mu se obustavljeni iznos isplaćuje poštom na adresu koju naznači ili na određeni račun kod pravnog lica koje obavlja poslove platnog prometa, uz odbijanje troškova doznake.

## **Prestanak rada**

### **Član 151**

- (1) Kad izvršeniku prestane rad rješenje o izvršenju djeluje i prema drugom poslodavcu kod kojeg dužnik stupa na rad i to od dana kad je tome poslodavcu dostavljeno rješenje o izvršenju.
- (2) Prijašnji poslodavac izvršenika dužan je bez odgode preporučenom pošiljkom s povratnicom dostaviti rješenje o izvršenju novom poslodavcu i o tome obavijestiti sud.
- (3) Prijašnji poslodavac obavijestit će sud o prestanku rada izvršenika bez odlaganja ako mu nije poznat novi poslodavac, o čemu će sud obavijestiti tražioca izvršenja određujući mu rok radi pribavljanja podataka o novom poslodavcu.
- (4) Ako tražilac izvršenja ne obavijesti sud u roku koji mu je određen o novom poslodavcu, sud će obustaviti izvršenje.

### **Odgovornost poslodavca za propuštenu obustavu i isplatu dospjelih rata**

#### **Član 152**

- (1) Tražilac izvršenja može predložiti da sud u izvršnom postupku rješenjem naloži poslodavcu da mu isplati sve rate što ih je propustio obustaviti i isplatiti prema rješenju o izvršenju.
- (2) Prijedlog iz stava 1 ovog člana tražilac izvršenja može podnijeti do završetka izvršnog postupka.
- (3) Rješenje kojim se usvaja prijedlog tražioca izvršenja ima dejstvo rješenja o izvršenju.
- (4) Poslodavac koji nije postupio prema rješenju o izvršenju ili je propustio postupiti po članu 151 stavovima 2 i 3 ovog zakona, odgovara za štetu koju je tražilac izvršenja zbog toga pretrpio.

### **Zapljena po pristanku dužnika**

#### **Član 153**

- (1) Dužnik može ovjerenom ispravom dati saglasnost da se radi naplate potraživanja povjerioca zaplijeni dio njegove plate i da se isplati izravno povjeriocu, na način određen u toj ispravi. Takva isprava ima pravno dejstvo rješenja o izvršenju.
- (2) Ispravu iz stava 1 ovog člana sa dejstvima dostave rješenja o izvršenju poslodavcu dostavlja povjerilac preporučenom poštanskom pošiljkom sa povratnicom.
- (3) Izuzetno od odredbe stava 1 ovog člana, zapljena na osnovu saglasnosti dužnika nema uticaja na sprovođenje izvršenja na plati radi namirenja potraživanja po osnovi zakonskog izdržavanja, naknade štete nastale po osnovi narušenja zdravlja ili smanjenja odnosno gubitka radne sposobnosti i naknade štete po osnovi izgubljenog izdržavanja zbog smrti davaoca izdržavanja.

### **Primjena odredaba**

#### **Član 154**

Odredbe članova od 147 do 153 ovog zakona na odgovarajući se način primjenjuju i na izvršenje na drugim stalnim novčanim primanjima izvršenika.

#### **4. Izvršenje na potraživanju po računu kod banke i drugog pravnog lica koje obavlja poslove platnog prometa**

##### **Prinudno izvršenje**

##### **Član 155**

- (1) Izvršenje na novčanom potraživanju, koje po žiroračunu, deviznom računu i drugim računima kod banke ili drugih pravnih lica koja obavljaju poslove platnog prometa, pripada izvršeniku, određuje se tako što se rješenjem o izvršenju nalaže banci odnosno drugom pravnom licu koje obavlja poslove platnog prometa da novčani iznos za koji je određeno izvršenje isplati tražiocu izvršenja nakon pravosnažnosti tog rješenja. To rješenje ima dejstvo rješenja o izvršenju kojim su određeni zapljena novčanog potraživanja i prenos radi naplate.*
- (2) U rješenju o izvršenju iz stava 1 ovog člana označit će se banka izvršenika iz koje treba obaviti isplatu i broj računa tražioca izvršenja na koji isplatu treba obaviti ili drugi način obavljanja isplate.*
- (3) U izvršenju iz stava 1 ovog člana na odgovarajući se način primjenjuju odredbe člana 129 ovog zakona.*
- (4) Odredbe stavova od 1 do 3 ovog člana ne primjenjuju se na potraživanja po osnovu uloga na štednju.*

##### **Obaveza dostave podataka o računu**

##### **Član 156**

- (1) Ako u banci, odnosno pravnom licu koje obavlja poslove platnog prometa nema sredstava određenih u rješenju o izvršenju ili su ona nedovoljna, banka odnosno pravno lice koje obavlja poslove platnog prometa će bez odlaganja obavijestiti sud i dostaviti mu izvještaj o svim kretanjima na računu odnosno računima izvršenika. Izvještaj o kretanjima na računu odnosit će se samo na period od 30 kalendarskih dana prije datuma navedenog u rješenju. Izvještaj o kretanjima na računu sadrži svaku transakciju na računu, uključujući podizanje gotovine, uplate na račun i isplate sa računa, unutarbankarske i međubankarske transakcije. Podaci koji se dostavljaju, a koji se odnose na međubankarske transakcije moraju sadržavati, između ostalog, ime primaoca i broj računa u odredišnoj banci.*
- (2) Ukoliko banka, odnosno pravno lice koje obavlja poslove platnog prometa određeno u rješenju o izvršenju ne uspije u cjelini naplatiti izvršenu tražbinu zbog nedostatka sredstava na računu odnosno računima izvršenika, držat će rješenje o izvršenju u posebnoj evidenciji i po njemu obaviti prijenos kada sredstva pristignu na račun odnosno račune, ukoliko rješenjem o izvršenju nije drugačije određeno.*

## **Odgovornost banke odnosno pravnog lica koje obavlja poslove platnog prometa**

### **Član 157**

Na odgovornost banke odnosno pravnog lica koje obavlja poslove platnog prometa zbog nepostupanja po rješenju o izvršenju na odgovarajući se način primjenjuju odredbe člana 152 ovog zakona.

### **Zapljena računa po pristanku dužnika**

#### **Član 158**

- (1) Dužnik može ovjerenom ispravom dati saglasnost da se radi naplate potraživanja povjerioca zaplijeni određeni njegov račun kod banke ili drugog pravnog lica koje obavlja poslove platnog prometa te da se novčana sredstva s tog računa, u skladu s njegovom izjavom sadržanom u toj ispravi, izravno s računa isplaćuju povjeriocu. Takva isprava ima dejstvo pravosnažnog rješenja o izvršenju kojim se zapljenjuje potraživanje po računu i prenosi na tražioca izvršenja radi naplate.
- (2) Ispravu iz stava 1 ovog člana banci ili drugom pravnom licu koje obavlja poslove platnog prometa dostavlja povjerilac sa dejstvima dostave sudskog rješenja o izvršenju, neposredno u prijemnom uredu banke ili drugog lica koje obavlja poslove platnog prometa, ili preporučenom poštanskom pošiljkom s povratnicom.
- (3) Na izvršenje iz stava 1 ovog člana na odgovarajući se način primjenjuje odredba člana 153 stava 3 ovog zakona.

### **Primjena odredbi ove glave**

#### **Član 159**

U izvršenju na potraživanju po računu kod banke ili drugog pravnog lica koje obavlja poslove platnog prometa na odgovarajući se način primjenjuju odredbe članova od 123 do 146 ovog zakona, ako odredbama članova od 155 do 158 ovog zakona nije drukčije određeno.

## **XII – IZVRŠENJE NA POTRAŽIVANJU DA SE PREDAJU ILI ISPORUČE POKRETNE STVARI ILI DA SE PREDI NEPOKRETNOST**

### **1. Opće odredbe**

#### **Izvršne radnje**

#### **Član 160**

Izvršenje na izvršenikovom potraživanju da se predaju ili isporuče pokretne stvari ili da se preda nepokretnost sprovodi se zapljenom tog potraživanja, njegovim prenosom na tražioca izvršenja i prodajom stvari.

### **Dejstvo prenosa**

#### **Član 161**

Prenos zaplijenjenog izvršenikovog potraživanja ima dejstvo prenosa novčanog potraživanja radi naplate.

### **Nedospjelo izvršenikovog potraživanja i tužba protiv izvršenikovog dužnika**

#### **Član 162**

- (1) Ako izvršenikovo potraživanje još nije dospjelo, sud će naložiti predaju stvari nakon dospijeća.
- (2) Protiv izvršenikova dužnika koji nije voljan stvari da preda, tražilac izvršenja može, poslije pravosnažnosti rješenja o prenosu potraživanja, tužbom tražiti predaju, ako o obavezi predaje nema izvršnu ispravu.

### **Primjena odredbi o izvršenju na novčanom potraživanju**

#### **Član 163**

Odredbe članova od 123 do 159 ovog zakona na odgovarajući se način primjenjuju i na izvršenje na potraživanju da se predaju ili isporuče pokretne stvari ili da se preda nepokretnost, ako odredbama članova od 160 do 167 ovog zakona nije drukčije određeno.

## **2. Pokretne stvari**

### **Predaja stvari na čuvanje**

#### **Član 164**

- (1) Rješenjem kojim se određuje prenos izvršenikovog potraživanja sud će po prijedlogu tražioca izvršenja, naložiti izvršenikovom dužniku da pokretne stvari na koje se to potraživanje odnosi, sam čuva, ako na to pristane, odnosno preda službenom licu ili drugom licu na čuvanje.
- (2) Na čuvanje stvari na odgovarajući se način primjenjuju odredbe člana 109 ovog zakona.

### **Prodaja stvari i namirenje tražioca izvršenja**

#### **Član 165**

Prodaja pokretnih stvari predatih na čuvanje u smislu odredbe člana 164 ovog zakona te namirenje tražioca izvršenja obavljaju se prema odredbama ovog zakona o izvršenju na pokretnim stvarima.

### **3. Nepokretnosti**

#### **Predaja tražiocu izvršenja**

##### **Član 166**

- (1) Rješenjem kojim se određuje prenos izvršenikovog potraživanja sud će naložiti izvršenikovom dužniku da nepokretnost na koju se to potraživanje odnosi preda tražiocu izvršenja.
- (2) Tražilac izvršenja je dužan nepokretnošću, u ime i za račun izvršenika, upravljati kao dobar privrednik, odnosno dobar domaćin, i da sudu, na njegov zahtjev, položi račun o upravljanju.

#### **Prodaja i namirenje tražioca izvršenja**

##### **Član 167**

- (1) Tražilac izvršenja može, radi namirenja svog potraživanja, u roku koji ne može biti duži od trideset dana od dana kad mu je nepokretnost predata, predložiti sudu prodaju te nepokretnosti.
- (2) Ako tražilac izvršenja ne predloži blagovremeno prodaju, sud će obustaviti izvršenje.
- (3) Nepokretnost se prodaje i tražilac izvršenja namiruje prema odredbama ovog zakona o izvršenju na nepokretnosti.

### **XIII – IZVRŠENJE NA DIONICI ZA KOJU NIJE IZDATA ISPRAVA O DIONICI TE NA OSNIVAČKOM ILI DRUGOM UDJELU U PRAVNOM LICU**

#### **Izvršne radnje**

##### **Član 168**

- (1) Na dionici za koju nije izdata isprava o dionici izvršenje se sprovodi pljenidbom dionice, njezinom procjenom i prodajom te namirenjem tražioca izvršenja.
- (2) Na udjelu u pravnom licu izvršenje se sprovodi pljenidbom udjela, njegovom procjenom i prodajom te namirenjem tražioca izvršenja.
- (3) Izvršne radnje iz ovog člana sprovode se i kada je ugovorom ili pravilima pravnog lica ograničeno ili zabranjeno raspolaganje dionicama ili udjelima.

#### **Pljenidba dionice**

##### **Član 169**

- (1) Pljenidba dionice za koju nije izdata isprava o dionici obavlja se dostavom rješenja o izvršenju pravnom licu kod kojeg je upisana dionica. Pljenidbom tražilac izvršenja stiče založno pravo na dionici.
- (2) Pravno lice iz stava 1 ovog člana dužno je u popisu dionica upisati da je dionica koja glasi na ime zaplijenjena istog dana kojeg mu je dostavljeno rješenje o izvršenju. Ono je dužno bez odlaganja obavijestiti sud o obavljenom upisu odnosno o razlozima zbog kojih ga nije bilo moguće obaviti. Ovo pravno lice nema pravo prigovora protiv rješenja o izvršenju.
- (3) Nakon dostave rješenja o izvršenju pravno lice iz stava 1 ovog člana ne smije u odnosu na zaplijenjene dionice obaviti u popisu dionica nikakve upise na osnovu raspolaganja izvršenika. Ono je dužno bez odlaganja obavijestiti sud o svakoj promjeni u pogledu zaplijenjenih dionica, posebno o prisilnom izvršenju radi naplate kojeg drugog potraživanja ili o obezbjeđenju kojeg takvog potraživanja.
- (4) Pravno lice iz stava 1 ovog člana odgovara za štetu koju bi tražilac izvršenja mogao pretrpjeti zbog toga što nije postupilo u skladu s odredbama stavova 2 i 3 ovog člana. Za štetu solidarno odgovaraju i lica koja obavljaju rukovodeću funkciju u pravnom licu. U rješenje o izvršenju unijet će se upozorenje o odgovornosti pravnog lica, te lice koje obavlja rukovodeću funkciju u pravnom licu. Tražilac izvršenja može do završetka izvršnog postupka zatražiti da sud u tom postupku odluči o njegovom zahtjevu za naknadu štete. Na osnovu pravosnažnog rješenja o zahtjevu za naknadu štete, tražilac može protiv pravnog lica i lica koje obavlja rukovodeću funkciju u pravnom licu tražiti prinudno izvršenje. Nakon završetka izvršnog postupka tražilac izvršenja svoje pravo na nadoknadu štete može ostvarivati tužbom.
- (5) Izvršeniku je zabranjeno raspolagati zaplijenjenom dionicom. Upozorenje o toj zabrani te o krivično-pravnim posljedicama njene povrede unijet će se u rješenje o izvršenju.
- (6) Odredbe člana 129 ovog zakona na odgovarajući se način primjenjuju i na izvršenje na dionici za koju nije izdata isprava o dionici.
- (7) Sud može zaključkom narediti pravnom licu da sudskom izvršitelju omogući uvid u popis dionica te u druge isprave. Protiv pravnog lica i odgovornih lica u pravnom licu koji sprečavaju ili ometaju sudskog izvršitelja može se postupiti u smislu člana 200 ovog zakona. Sud je dužan preduzeti potrebne mjere da bi se sačuvala tajnost pribavljenih podataka po pravilima o čuvanju poslovne tajne.

## **Procjena i prodaja dionica te namirenje tražilaca izvršenja**

### **Član 170**

- (1) Zaplijenjena dionica može se prodati na javnom nadmetanju ili neposrednom pogodbom. Neposrednom pogodbom dionicu prodaje sudski izvršilac ili lice ovlašteno za prodaju dionica kojem je sud povjerio prodaju. Sudski izvršilac i lice ovlašteno za

prodaju dionica sklapaju ugovor o prodaji dionice u ime izvršenika na temelju zaključka suda koji ih na to ovlašćuje.

- (2) Ako se dionica prodaje na javnom nadmetanju ili neposrednom pogodbom, ona prethodno mora biti procijenjena. Sudski izvršilac utvrđuje tržišnu vrijednost dionica putem vještaka ili ovlaštenih procjenitelja. Lice ovlašteno za prodaju dionica kojem je povjerena prodaja dionice samo određuje cijenu po kojoj će dionicu prodati, vodeći računa o tržišnim uslovima.
- (3) Procjena, utvrđivanje prodajne cijene i prodaja dionice te namirenje tražioca izvršenja obavljaju se uz odgovarajuću primjenu odredbi ovog zakona o izvršenju na pokretnim stvarima.

### **Izvršenje na osnivačkom ili drugom udjelu u pravnom licu**

#### **Član 171**

Odredbe članova 169 i 170 ovog zakona na odgovarajući se način primjenjuju i na izvršenje na osnivačkom ili drugom udjelu u pravnom licu.

### **Pravo preče kupovine**

#### **Član 172**

Ako drugi dioničari odnosno suosnivači ili sunosioci udjela imaju pravo preče kupovine zasnovano na zakonu, ugovoru ili pravilima pravnog lica na odgovarajući se način primjenjuju odredbe člana 76 ovog zakona.

## **XIV – IZVRŠENJE NA DRUGIM IMOVINSKIM PRAVIMA**

### **Izvršne radnje**

#### **Član 173**

Izvršenje na patentu, tehničkom unapređenju, plodouživanju i nekom sličnom izvršenikovom pravu sprovodi se pljenidbom tog prava te njegovim unovčenjem u skladu s odredbama ovog zakona o prodaji pokretnih stvari.

## **XV - POSEBNE ODREDBE O IZVRŠENJU NA IMOVINI PRAVNIH LICA**

### **1. Izuzimanje od izvršenja i ograničenje izvršenja**

#### **Član 174**

Predmet izvršenja ne mogu biti stvari van prometa kao ni rudno blago i druga prirodna bogatstva.

### **Član 175**

Predmet izvršenja ne mogu biti objekti, naoružanje i oprema za potrebe policije, kao ni novčana sredstva obezbjeđenja za te namjene.

## **2. Izvršenje na sredstvima na računu pravnog lica**

### **Obim izvršenja na novčanim sredstvima na računu pravnog lica**

### **Član 176**

- (1) Izvršenje radi ostvarenja novčanog potraživanja prema pravnom licu može se provesti na svim sredstvima na njegovim računima kod pravnog lica koje obavlja poslove platnog prometa.
- (2) Izvršenje na novčanim sredstvima na računu Distrikta i njegovih organa kod pravnih lica koja obavljaju poslove platnog prometa ne može se odrediti ako su ta sredstva neophodna za obavljanje osnovnih funkcija tih pravnih lica.
- (3) Sud će, na prigovor pravnog lica iz stava 2 ovog člana, saslušati stranke, a po potrebi provesti i druge dokaze o okolnostima od kojih zavisi primjena odredbi stava 2 ovog člana.
- (4) Nakon provjera iz stava 3 ovog člana sud će rješenjem odrediti iznose do kojih se u određenim razmacima može provoditi izvršenje radi naplate potraživanja tražioca izvršenja.
- (5) Prigovor protiv rješenja iz stava 4 ovog člana ne odgađa njegovo sprovođenje.

### **Redoslijed naplate**

### **Član 177**

- (1) Pravno lice koje obavlja poslove platnog prometa naplatu obavlja redom, prema vremenu dostave rješenja o izvršenju, ako zakonom nije drukčije određeno.
- (2) Pravno lice koje obavlja poslove platnog prometa vodi posebnu evidenciju redoslijeda rješenja o izvršenju po danu i satu dostave i izdaje tražiocu izvršenja, na njegov zahtjev, potvrdu o mjestu njegovog potraživanja u tom redoslijedu.
- (3) Pravno lice koje obavlja poslove platnog prometa ne može provesti nalog izvršenika prije isplate potraživanja utvrđenog rješenjem o izvršenju, ako posebnim zakonom nije drukčije određeno.
- (4) S rješenjem o izvršenju izjednačena je isprava za koju je to predviđeno posebnim zakonom.

- (5) Ako je izvršenje odgođeno na izvršenikov prijedlog, odgovarajući iznos sredstava izdvaja se radi zadržavanja reda naplate potraživanja.
- (6) Pravno lice koje obavlja poslove platnog prometa odgovara tražiocu izvršenja za štetu koju mu nanese povredom odredbi ovog zakona o obimu, redoslijedu i načinu namirenja njegovog potraživanja.
- (7) O zahtjevu za nadoknadu štete iz stava 6 ovog člana odlučuje sud u izvršnom postupku. Na osnovu pravosnažnog rješenja kojim je pravnom licu koje obavlja poslove platnog prometa naloženo da tražiocu izvršenja nadoknadi štetu, tražilac izvršenja može tražiti izvršenje protiv tog pravnog lica u posebnom izvršnom postupku.

### **Naznaka računa**

#### **Član 178**

- (1) Tražilac izvršenja je dužan da u prijedlogu za izvršenje, pored ostalog, naznači pravno lice koje obavlja poslove platnog prometa kod kojeg se vode izvršenikova novčana sredstva te broj njegovog računa.
- (2) Ako se za potraživanje koje se namiruje naplata obavlja preko računa, tražilac izvršenja je dužan u prijedlogu za izvršenje naznačiti i pravno lice kod kojeg se vode njegova novčana sredstva te broj svog računa.
- (3) U izvršenju iz ovoga člana na odgovarajući se način primjenjuju odredbe člana 129 ovog zakona.

### **Rješenje o izvršenju**

#### **Član 179**

- (1) Rješenje o izvršenju na novčanim sredstvima koja se vode na računu izvršenika kod pravnog lica koje obavlja poslove platnog prometa nalaže se tom pravnom licu da novčani iznos za koji je izvršenje određeno prenese s računa izvršenika na račun tražioca izvršenja, a za potraživanja za koja nije propisana naplata preko žiroračuna kod pravnog lica koje obavlja poslove platnog prometa, da isplati taj iznos tražiocu izvršenja u gotovom novcu.
- (2) Prenos, odnosno isplata po odredbama stava 1 ovog člana, po rješenju o izvršenju određenom na osnovu izvršne isprave mjenice i čeka sa protestom i povratnim računom, ako su oni potrebni za zasnivanje zahtjeva, obavlja se prije pravosnažnosti rješenja o izvršenju.

### **Povremena davanja**

#### **Član 180**

- (1) Ako je rješenjem o izvršenju pravnom licu koje obavlja poslove platnog prometa za izvršenika naloženo plaćanje određenih iznosa u određenim razmacima, to će lice obavljati isplate u skladu s nalogom iz rješenja o izvršenju.

- (2) U slučaju iz stava 1 ovoga člana, redosljed naplate svih budućih rata računa se prema vremenu dostave rješenja o izvršenju.
- (3) Pravno lice koje obavlja poslove platnog prometa vodi posebnu evidenciju rješenja o izvršenju kojim su naložena buduća povremena plaćanja.

### **Zastajanje s izvršenjima**

#### **Član 181**

- (1) Pravno lice koje obavlja poslove platnog prometa za izvršenika kojem je dostavljeno rješenje o izvršenju na sredstvima na računu izvršenika zastat će s izvršenjem na zahtjev tražioca izvršenja.
- (2) U slučaju zastoja iz stava 1 ovog člana neće se izdvajati novčana sredstva.

### **Postupak u slučaju kad nema sredstava na računu**

#### **Član 182**

- (1) Ako u vrijeme kad je pravnom licu koje obavlja poslove platnog prometa dostavljeno rješenje o izvršenju nema sredstava na dužnikovom računu, to će lice to rješenje držati u posebnoj evidenciji i po njemu obaviti prenos kad sredstva pristignu na račun.
- (2) O tome da nema sredstava na računu pravno lice iz stava 1 ovog člana obavijestit će sud bez odlaganja.

### **Izvršenje prema solidarnom izvršeniku**

#### **Član 183**

- (1) Ako na osnovu izvršne isprave dva ili više izvršenika solidarno odgovaraju, sud će, na prijedlog tražioca izvršenja, protiv njih donijeti jedno rješenje o izvršenju, uz uslov da svi oni imaju račune kod istog pravnog lica koje obavlja poslove platnog prometa.
- (2) Tražilac izvršenja može u prijedlogu za izvršenje odrediti redosljed po kojem će se obaviti naplata od pojedinih dužnika, a ako to nije učinjeno, naplata će se obaviti onim redom kojim su oni navedeni u prijedlogu.
- (3) Ako se računi solidarnih izvršenika vode kod različitih jedinica istog pravnog lica koje za izvršenika obavlja poslove platnog prometa, sud će rješenje o izvršenju dostaviti onoj jedinici kod koje se vodi račun izvršenika kojeg je tražilac izvršenja odredio kao prvog solidarnog izvršenika odnosno koji je u prijedlogu označen na prvom mjestu.
- (4) Ako u slučaju iz stava 3 ovog člana na računu izvršenika nema sredstava, jedinica kojoj je rješenje o izvršenju dostavljeno proslijedit će to rješenje, na prijedlog tražioca izvršenja, kojoj drugoj jedinici kod koje se vode računi solidarnih izvršenika.

## **Redoslijed namirenja s pojedinih računa pravnog lica**

### **Član 184**

Tražilac izvršenja određuje redoslijed namirenja s pojedinih računa izvršenika, ako zakonom nije drukčije određeno.

### **Izvršenje na sredstvima na deviznom računu**

### **Član 185**

Ako se izvršenje provodi radi naplate potraživanja u drugim sredstvima, sredstva s deviznog računa izvršenika preračunavaju se u ta sredstva po tečaju po kojem bi pravno lice kod kojeg se vodi račun obavilo to preračunavanje na zahtjev izvršenika i isplata se obavlja po pravilima o isplatama s računa koji se vode u tim sredstvima.

### **Izvršenje radi naplate potraživanja u stranoj valuti**

### **Član 186**

- (1) Ako potraživanje utvrđeno u izvršnoj ispravi glasi na stranu valutu te ako izvršenik ima devizni račun u toj valuti, rješenjem o izvršenju naložit će se pravnom licu kod kojeg se vodi devizni račun izvršenika da prenese odgovarajući iznos u stranoj valuti s računa izvršenika na račun tražioca izvršenja, ili da isplatu u stranoj valuti izvrši na neki drugi dozvoljen način.
- (2) Tražilac izvršenja može zatražiti da se izvršenje radi namirenja njegovog potraživanja u određenoj stranoj valuti odredi i provede na drugim računima ili predmetima izvršenika kao izvršenje radi naplate potraživanja u iznosu koji je potreban da bi se od ovlaštenog lica kupila dužna devizna sredstva.
- (3) Odredbe stavova 1 i 2 ovog člana primjenjuju se i kada se izvršenje određuje protiv izvršenika koji nisu pravna lica.

## **3) Odgovarajuća primjena drugih odredaba zakona**

### **Član 187**

Ako odredbama glave XV ovog zakona nije što drugo određeno, na izvršenje protiv pravnog lica radi naplate novčanog potraživanja na odgovarajući se način primjenjuju odredbe glava od VIII do XIV ovog zakona.

### **Poddio treći**

## **IZVRŠENJE RADI OSTVARENJA NENOVČANOG POTRAŽIVANJA**

### **XVI - SUDSKI PENALI**

#### **Izricanje sudskih penala**

## **Član 188**

- (1) Kad izvršenik ne izvrši u roku neku svoju nenovčanu obavezu utvrđenu pravosnažnom sudskom odlukom ili sudskim poravnanjem, sud će u izvršnom postupku, na prijedlog tražioca izvršenja, odrediti izvršeniku naknadni primjereni rok i izreći izvršeniku da će, ako svoju obavezu ne ispuni u tom roku, biti dužan isplatiti tražiocu izvršenja određeni iznos novca za svaki dan zakašnjenja ili koju drugu jedinicu vremena (sudski penali) u smislu pravila o obligacionim odnosima, počev od isteka tog roka.
- (2) Naknadno određeni primjereni rok iz stava 1 ovog člana počinje teći od dostave izvršeniku prvostepenog rješenja kojim je taj rok određen. Prigovor ne utiče na tok tog roka.
- (3) Ako izvršenik najkasnije u roku od petnaest dana nakon pravosnažnosti rješenja iz stava 1 ovog člana ispuni svoju obavezu, sud može u istom izvršnom postupku na zahtjev izvršenika podnesen u roku od osam dana od ispunjenja obaveze, smanjiti iznos dosuđenih penala, vodeći računa o svrsi zbog koje je naredio njihovo plaćanje. Podnošenje tog zahtjeva bez uticaja je na određivanje i sprovođenje izvršenja na osnovu pravosnažnog rješenja o plaćanju sudskih penala iz stava 1 ovog člana.
- (4) Plaćanje sudskih penala može se tražiti sve dok se, na osnovu izvršne isprave, ne predloži izvršenje radi ostvarenja nenovčanog potraživanja.
- (5) Pravo na sudske penale prestaje od dana podnošenja prijedloga za izvršenje iz stava 4 ovog člana. Prinudna naplata sudskih penala dospjelih do toga dana može se tražiti u smislu člana 189 ovog zakona.
- (6) Ako izvršenje iz stava 5 ovog člana bude obustavljeno, pravo tražioca izvršenja na sudske penale oživljava.

### **Izvršenje radi naplate dosuđenih penala**

## **Član 189**

- (1) Na osnovu pravosnažnog rješenja o plaćanju sudskih penala iz člana 188 ovog zakona, sud će u istom izvršnom postupku u kojem je donio to rješenje, na prijedlog tražioca izvršenja, donijeti rješenje o izvršenju radi prinudne naplate dosuđenih penala.
- (2) Ako izvršenik u prigovoru protiv rješenja o izvršenju istakne da je svoju obavezu ispunio, sud će njegov prigovor prihvatiti u izvršnom postupku samo ako njegovu osnovanost dokaže javnom ili privatnom ispravom koja ima značenje javne isprave. U suprotnom će dužnika uputiti na parnicu.

## **XVII – IZVRŠENJE RADI PREDAJE I ISPORUKE POKRETNIH STVARI**

### **Izvršenje radi predaje određenih stvari koje se nalaze kod izvršenika ili trećeg lica**

## **Član 190**

- (1) Izvršenje radi predaje jedne ili više određenih stvari koje se nalaze kod izvršenika provodi se tako što sudski izvršilac oduzima te stvari od izvršenika i predaje ih uz potvrdu tražiocu izvršenja.

- (2) Na način iz stava 1 ovog člana izvršenje će se provesti i kad se stvari nalaze kod trećeg lica koje ih je voljno predati sudskom izvršiocu.
- (3) Ako treće lice nije voljno predati stvari, tražilac izvršenja može sudu predložiti da na njega prenese izvršenikovo potraživanje prema trećem licu na predaju stvari.
- (4) Na postupak po prijedlogu iz stava 3 ovog člana primjenjuju se odredbe ovoga zakona o izvršenju na potraživanju da se predaju ili isporuče pokretnine.

### **Izvršenje radi predaje određenih stvari koje se nisu mogle naći kod izvršenika niti kod trećeg lica**

#### **Član 191**

- (1) Ako stvari nisu nađene niti kod izvršenika niti kod trećeg lica, sud će u istom postupku, na prijedlog tražioca izvršenja, procijeniti vrijednost tih stvari i rješenjem naložiti izvršeniku da tražiocu izvršenja u određenom roku isplati iznos te vrijednosti.
- (2) Tražilac izvršenja može prijedlog iz stava 1 ovog člana podnijeti u roku od tri dana od dana obavijesti da stvari nisu nađene. Ako tražilac izvršenja ne podnese taj prijedlog u određenom roku, sud će obustaviti izvršenje.
- (3) Na osnovu rješenja iz stava 1 ovog člana tražilac izvršenja može i prije njegove pravosnažnosti predložiti u istom postupku izvršenje radi naplate dosuđenog iznosa. Taj se prijedlog mora podnijeti najkasnije u roku od osam dana od pravosnažnosti rješenja iz stava 1 ovog člana.
- (4) Ako prijedlog iz stava 3 ovog člana ne bude podnesen u određenom roku, sud će obustaviti izvršenje te ukinuti rješenje iz stava 1 ovog člana i druge sprovedene radnje.
- (5) Tražilac izvršenja može zajedno s prijedlogom za izvršenje iz člana 190 stavova 1 i 2 ovog zakona spojiti i prijedlog za donošenje rješenja iz stava 1 ovog člana. U tom se slučaju izvršenje prema članu 190 ovog zakona i postupak iz ovog člana sprovede istovremeno. Sud može odrediti izvršenje u smislu odredbe stava 3 ovog člana i započeti s njezinim sprovođenjem, ali se radnje unovčenja zaplijenjenih dijelova imovine izvršenika ili prenos sredstava s njegovog računa ne mogu sprovesti prije nego što se utvrdi da se izvršenje iz člana 190 stavova 1 i 2 ovog zakona nije moglo sprovesti.
- (6) Ako se izvršenje iz člana 190 stavova 1 i 2 ovog zakona sprovede, sud će, po službenoj dužnosti, obustaviti izvršenje te ukinuti rješenje iz stava 1 ovog člana i druge sprovedene radnje u smislu odredbe stava 5 ovog člana. U tom slučaju tražilac izvršenja snosi u cijelosti troškove izazvane podnošenjem prijedloga iz stava 5 ovog člana.

### **Izvršenje radi isporuke zamjenljivih stvari koje se nalaze kod izvršenika ili trećeg lica**

## **Član 192**

Ako je izvršnom ispravom utvrđena obaveza na isporuku određene količine zamjenljivih stvari koje se nalaze kod izvršenika ili trećeg lica, izvršenje se sprovodi na način propisan za predaju određenih stvari.

### **Izvršenje kad zamjenljive stvari nisu nađene niti kod izvršenika niti kod trećeg lica**

## **Član 193**

- (1) Ako stvari nisu nađene niti kod izvršenika, niti kod trećeg lica, izvršenje će se sprovesti uz odgovarajuću primjenu odredbi člana 191 ovog zakona. Prilikom procjene vrijednosti stvari uzet će se u obzir potreba njihove nabave na drugoj strani.
- (2) Ako tokom izvršnog postupka dođe do promjene vrijednosti zamjenljivih stvari, tražilac izvršenja može zatražiti od suda novu procjenu te naložiti izvršeniku plaćanje razlike u vrijednosti. U tom slučaju primjenjuju se na odgovarajući način odredbe člana 208 ovog zakona i stava 1 ovog člana.

### **Pravo na nadoknadu štete**

## **Član 194**

Odredbama glave XVII ovog zakona ne dira se u pravo tražioca izvršenja da u parnici traži od izvršenika nadoknadu štete koja mu je nanesena tim što mu predaja odnosno isporuka stvari nije obavljena.

## **XVIII – IZVRŠENJE RADI ISPRAŽNENJA I PREDAJE NEPOKRETNE STVARI**

### **Način sprovođenja izvršenja**

## **Član 195**

- (1) Izvršenje radi ispražnjenja i predaje nepokretnosti sprovodi se tako da sudski izvršilac, nakon što udalji lica i ukloni stvari s te nekretnine, predaje nekretninu u posjed tražioca izvršenja.
- (2) Ispražnjenju i predaji nepokretnosti može se pristupiti nakon isteka osam dana od dana dostave rješenja o izvršenju izvršeniku i prije njegove pravosnažnosti. Ako se dostava izvršeniku nije mogla uredno obaviti na način predviđen u odredbama člana 11 ovog zakona, sud će mu bez odlaganja postaviti privremenog zastupnika, kojem će se rješenje dostaviti.
- (3) Ako je to potrebno, sud će protiv lica koja ometaju sprovođenje izvršenja izreći novčane kazne iz člana 200 ovog zakona.

- (4) Na zahtjev suda policija i organ socijalnog staranja dužni su pružiti svu potrebnu pomoć u sprovođenju radnji iz stava 1 ovog člana.
- (5) Pri sprovođenju izvršenja primijenit će se odredbe članova 43 i 44 ovog zakona.
- (6) Potrebnu radnu snagu i prevozna sredstva radi sprovođenja izvršenja dužan je obezbijediti tražilac izvršenja na zahtjev sudskog izvršitelja, koji tražiocu izvršenja mora biti saopšten najkasnije osam dana prije sprovođenja izvršenja.

### **Uklanjanje pokretnih stvari**

#### **Član 196**

- (1) Pokretne stvari koje su uklonjene s nekretnine predaju se izvršeniku, a ako on nije prisutan, odraslom članu njegovog domaćinstva ili njegovom opunomoćeniku.
- (2) Ako pri preduzimanju izvršnih radnji nije prisutno nijedno od lica kome se stvari mogu predati, ili ih ta lica neće primiti, stvari se predaju na čuvanje drugom licu, na trošak izvršenika. Tražilac izvršenja je dužan obezbijediti drugo lice kojem će se predati uklonjene stvari. Tražilac izvršenja može sam preuzeti stvari izvršenika na čuvanje.
- (3) Uklonjene stvari predaje na čuvanje drugom licu ili tražiocu izvršenja sudski izvršilac. Radnju sudskog izvršioca potvrđuje sud zaključkom. Sud može naknadno zaključkom odrediti da se stvari povjere nekom trećem licu umjesto onom kojem su predate.
- (4) O predaji drugom licu i o troškovima čuvanja sud obavještava izvršenika, ako je to moguće, ostavljajući mu primjeren rok u kojem može zatražiti predaju stvari nakon što nadoknadi troškove čuvanja.
- (5) Uz obavijest iz stava 4 ovog člana sud će upozoriti izvršenika da će, nakon isteka određenog roka, stvari biti prodane i da će se iz prodajne cijene namiriti troškovi čuvanja i prodaje stvari.

### **Prodaja pokretnih stvari**

#### **Član 197**

- (1) Sud će po službenoj dužnosti odrediti prodaju stvari za račun izvršenika, ako ovaj u ostavljenom roku ne zatraži njihovu predaju i ne nadoknadi troškove čuvanja.
- (2) Dio cijene postignut prodajom koji preostane nakon podmirenja troškova čuvanja i prodaje stvari polaže se kod suda, u korist izvršenika.
- (3) Prodaja stvari obavlja se po odredbama ovog zakona o izvršenju na pokretnim stvarima.

### **Izvršenje radi naplate troškova postupka**

#### **Član 198**

- (1) Tražilac izvršenja može u prijedlogu za izvršenje radi ispražnjenja i predaje nepokretnosti zatražiti da se zajedno s izvršenjem odredi izvršenje na izvršenikovim pokretninama koje treba ukloniti s nekretnine radi naplate troškova izvršnog postupka.
- (2) Izvršenje iz stava 1 ovog člana određuje se i provodi po pravilima ovog zakona o izvršenju na izvršenikovim pokretnim stvarima radi naplate novčanog potraživanja.
- (3) Rješenje o nadoknadi troškova postupka izvršenja radi ispražnjenja i predaje nepokretnosti je izvršna isprava na osnovu koje tražilac izvršenja može predložiti izvršenje u istom ili posebnom izvršnom postupku.

## **XIX – IZVRŠENJE RADI OSTVARENJA POTRAŽIVANJA NA RADNJU, TRPLJENJE ILI NEČINJENJE**

### **Izvršenje radi ostvarenja obaveze na radnju koju može obaviti i drugo lice**

#### **Član 199**

- (1) Izvršenje radi ostvarenja obaveze na radnju koju može obaviti i drugo lice sprovodi se tako da sud ovlašćuje tražioca izvršenja da na trošak izvršenika povjeri drugom licu da tu radnju obavi ili da je obavi on sam.
- (2) U prijedlogu za izvršenje tražilac izvršenja može predložiti da sud rješenjem naloži izvršeniku da unaprijed položi kod suda određeni iznos potreban za podmirenje troškova koji će nastati obavljanjem radnje od strane drugog lica ili tražioca izvršenja. Visinu iznosa sud određuje po slobodnoj ocjeni, uzimajući u obzir, po mogućnosti, troškovnik lica ovlaštenog za obavljanje takve radnje koji uz prijedlog za izvršenje priloži tražilac izvršenja.
- (3) Konačno rješenje o visini troškova iz stava 2 ovog člana sud donosi na prijedlog tražioca izvršenja odnosno izvršenika. Ako se naknadno pokaže da je na osnovu rješenja iz stava 2 ovog člana pribavljeno od izvršenika više sredstava nego što je bilo potrebno za pokriće troškova obavljanja radnje i troškova izvršnog postupka, sud će, na izvršenikov prijedlog, razliku vratiti izvršeniku ako on raspolaže sredstvima pribavljenim od izvršenika odnosno naložit će tražiocu izvršenja da u određenom roku tu razliku vrati ako je njemu stavljena na raspolaganje.
- (4) Na osnovu rješenja iz stava 2 ovog člana može se predložiti izvršenje prije njegove pravosnažnosti, a na osnovu rješenja iz stava 3 ovog člana tek nakon njihove pravosnažnosti.

### **Izvršenje radi ostvarenja obaveze na radnju koju može obaviti samo izvršenik**

#### **Član 200**

- (1) Ako radnju utvrđenu u izvršnoj ispravi može obaviti samo izvršenik, sud će rješenjem o izvršenju odrediti izvršeniku primjereni rok za ispunjenje obaveze.
- (2) Rješenjem o izvršenju sud će istovremeno zaprijetiti izvršeniku, a i odgovornim licima u izvršeniku pravnom licu da će im izreći novčanu kaznu u određenom iznosu ako u

određenom roku ne ispune obavezu. Izvršeniku fizičkom licu odnosno odgovornom licu u izvršeniku pravnom licu može se izreći prva novčana kazna u iznosu od 500,00 KM do 3.000,00 KM, a izvršeniku pravnom licu u iznosu od 1.000,00 do 10.000,00 KM zavisno od ekonomske snage izvršenika.

- (3) Ako izvršenik u roku koji mu je određen ne ispuni obavezu, sud će, na prijedlog tražioca izvršenja rješenjem izreći novčanu kaznu kojom je zaprijetio. U tom rješenju sud će izvršeniku odrediti novi rok za ispunjenje obaveze i zaprijetiti novom novčanom kaznom u većem iznosu nego što je bila ona kojom je prije zaprijetio, ako ni u tom roku ne ispuni obavezu.
- (4) Sud će izvršeniku i odgovornim licima izvršenika izricati novčane kazne i prijetiti novim određujući daljnje rokove za ispunjenje obaveze, sve dok ukupan zbir izrečenih novčanih kazni ne dostigne desetostruki iznos prve izrečene kazne.
- (5) Novčanu kaznu prema izvršeniku pravnom licu sud izvršava po službenoj dužnosti, nakon pravosnažnosti rješenja kojom je izrečena. Troškovi naplate novčane kazne predujmljuju se iz budžeta suda, a naplaćuju od izvršenika u izvršnom postupku naplate novčane kazne.
- (6) Ako izvršenik fizičko lice ili odgovorno lice u izvršeniku pravnom licu ne plati novčanu kaznu u roku koji je određen odlukom suda, ta će se kazna zamijeniti zatvorskom kaznom po propisima krivičnog prava o zamjeni novčane kazne zatvorskom kaznom. Zatvorska kazna se izvršava na način propisan za izvršenje zatvorske kazne izrečene u krivičnom postupku. Izvršenje zatvorske kazne će se prekinuti čim izvršenik dokaže na način propisan u stavu 8 ovog člana da je ispunio obavezu.
- (7) Pri odmjeravanju visine novčane kazne u propisanim granicama, sud će voditi računa o značenju radnje koju je dužnik bio dužan obaviti te o drugim okolnostima slučaja.
- (8) Izvršenik koji je ispunio svoju obavezu u roku koji mu je sud odredio, dužan je bez odlaganja o tome obavijestiti sud i priložiti nesumnjive dokaze o tome. Nesumnjivim će se dokazom smatrati ovjerena pisana izjava tražioca izvršenja o tome da je radnja obavljena, zapisnik sudskog izvršioca o obavljanju radnje, nalaz i mišljenje sudskog vještaka da je radnja obavljena, predaja djela koje je radnjom učinjeno u sudski depozit i sl. U protivnom, smatrat će se da radnja nije obavljena.
- (9) Prije izricanja novčane kazne sud će omogućiti izvršeniku da se izjasni, a po potrebi održat će i ročište radi izvođenja dokaza.
- (10) Ako radnja koju može obaviti samo izvršenik ne ovisi isključivo o njegovoj volji (npr. stvaranje određenog umjetničkog djela i sl.), tražilac izvršenja nema pravo tražiti izvršenje iz stava 1 ovog člana, već samo nadoknadu štete.
- (11) Izvršenik i druga lica iz stava 2 ovog člana mogu izjaviti prigovor protiv rješenja o izricanju novčane kazne i rješenja o zamjeni novčane kazne zatvorskom kaznom, u roku od tri dana od dana prijema rješenja.
- (12) Odredbe ovog člana o izricanju novčane kazne i zamjeni ove kazne zatvorskom kaznom neće se primjenjivati ako je izvršenik Distrikt i njegovi organi. Ako ovi

izvršenici ne postupe po rješenju suda iz stava 1 ovog člana, tražilac izvršenja može zahtijevati samo nadoknadu štete.

## **Izvršenje radi ostvarenja obaveze na trpljenje i nečinjenje**

### **Član 201**

- (1) Ako je na osnovu izvršne isprave izvršenik dužan trpjeti preduzimanje neke radnje ili se suzdržavati od njenog preduzimanja, sud će, na prijedlog tražioca izvršenja koji tvrdi da se izvršenik ponaša protivno svojoj obavezi, rješenjem naložiti izvršeniku da se ponaša u skladu sa svojom obavezom i zaprijetiti mu novčanom kaznom ako se nastavi tako ponašati. U prigovoru protiv rješenja o izvršenju izvršenik može osporiti tvrdnju tražioca izvršenja da se ponašao protivno svojoj obavezi iz izvršne isprave.
- (2) Na prijedlog tražioca izvršenja, pošto utvrdi da se izvršenik i nakon donošenja rješenja iz stava 1 ovog člana ponašao protivno svojoj obavezi, sud će izvršeniku izreći novčanu kaznu kojom mu je bio zaprijetio i istovremeno mu zaprijetiti novom novčanom kaznom ako se ponovo bude ponašao protivno svojoj obavezi.
- (3) Ako je već izvršnom ispravom dužniku naloženo da se ponaša u skladu sa svojom obavezom pod prijetnjom novčane kazne, smatrat će se da su ispunjeni uslovi za izricanje novčane kazne iz stava 2 ovog člana ako se izvršenik ponašao protivno svojoj obavezi nakon pravosnažnosti izvršne isprave.
- (4) Tražilac izvršenja može podnijeti prijedlog da se izvršeniku izrekne novčana kazna zato što se i nakon naloga suda ponašao protivno svojoj obavezi, u roku od petnaest dana od saznanja za takvo ponašanje, a najkasnije u roku od jedne godine od povrede obaveze. Navedeni rokovi teku posebno za svako ponašanje protivno obavezi.
- (5) Izvršeniku će se omogućiti da se izjasni o prijedlogu tražioca izvršenja za izricanje novčane kazne. Po potrebi sud će održati i ročište radi izvođenja dokaza i saslušanja stranaka.
- (6) Sud će na prijedlog tražioca izvršenja izricati izvršeniku novčane kazne i prijetiti mu novim kaznama sve dok se izvršenik ne prestane ponašati protivno svojoj obavezi.
- (7) Kada se novčana kazna izriče pravnom licu, sud će izreći novčanu kaznu i odgovornim licima u pravnom licu ako utvrdi da su svojim činom ili propustom dovele do ponašanja izvršenika protivno obavezi iz izvršne isprave.
- (8) Sud će, na prijedlog tražioca izvršenja, rješenjem naložiti dužniku da da obezbjeđenje za štetu, ako tražilac izvršenja učini vjerovatnim da bi štetu pretrpio tim što bi se izvršenik i nadalje ponašao protivno svojoj obavezi. Visinu i trajanje obezbjeđenja, prema okolnostima slučaja, određuje sud. Na osnovu rješenja o davanju obezbjeđenja sud će odrediti izvršenje i prije njegove pravosnažnosti.
- (9) Prijedlog za izricanje pojedine novčane kazne tražilac izvršenja može povući sve do pravosnažnosti odluke o izricanju te kazne. U tom slučaju smatrat će se kao da prijedlog za izricanje kazne nije podnesen. Troškove postupka izazvane povučenim prijedlogom snosi tražilac izvršenja, osim ako se stranke nisu drukčije sporazumjele.

- (10) Postupak pokrenut prijedlogom iz stava 1 ovog člana smatra se dovršenim pravosnažnošću rješenja o izvršenju. Postupak pokrenut prijedlogom za izricanje novčane kazne smatrat će se novim postupkom, ali se u tom postupku ne donosi novo rješenje o izvršenju, već samo rješenja iz stavovova 2 i 6 ovog člana. Obezbjedeње određeno u smislu odredbe stava 7 ovog člana ostaje na snazi s obzirom na sve postupke iz stavova 1, 2 i 6 ovog člana, osim ako rješenjem kojim je to obezbjeđenje određeno nije što drugo određeno.
- (11) U postupku po ovom članu na odgovarajući način će se primjenjivati odredbe stavova 2, 4, 5, 6, 11 i 12 člana 200 ovog zakona.

### **Izvršenje radi uspostavljanja pređašnjeg stanja**

#### **Član 202**

- (1) Ako je zbog ponašanja izvršenika protivno obavezi iz izvršne isprave nastala promjena koja nije u skladu s pravom tražioca izvršenja sud će ovlastiti tražioca izvršenja, na njegov prijedlog, da sam, a po potrebi i uz pomoć sudskog izvršitelja, uspostavi pređašnje stanje na trošak i rizik izvršenika.
- (2) U pogledu polaganja iznosa potrebnog za podmirenje troškova za uspostavljanje pređašnjeg stanja i određivanja konačne visine tih troškova primjenjuju se odredbe o troškovima za izvršenje radnje koju može, pored izvršenika, obaviti i drugo lice.
- (3) Ako je do promjena iz stava 1 ovog člana došlo nakon nastanka izvršne isprave, sud će postupiti u skladu s odredbom stava 1 ovog člana tek pošto utvrdi da je do promjene došlo zbog ponašanja izvršenika.

### **Ponovno smetanje posjeda**

#### **Član 203**

- (1) Ako je na osnovu izvršne isprave, donesene u postupku zbog smetanja posjeda, izvršenje sprovedeno, ili je izvršenik dobrovoljno ispunio svoju obavezu, pa poslije toga ponovo učini smetanje posjeda, koje se u biti ne razlikuje od pređašnjeg, sud će na prijedlog tražioca izvršenja, na osnovu iste izvršne isprave, ako je njom zabranjeno takvo buduće ponašanje, donijeti novo rješenje o izvršenju radi uspostave pređašnjeg stanja, ako je to potrebno, i zaprijetiti izvršeniku izricanjem novčane kazne ako ponovo počini smetanje posjeda. U tom se slučaju na odgovarajući način primjenjuju odredbe članova 200 i 201 ovog zakona.
- (2) Prijedlog za donošenje rješenja iz stava 1 ovog člana tražilac izvršenja može podnijeti već u prvom prijedlogu za izvršenje na osnovu rješenja zbog smetanja posjeda kojim je izvršeniku zabranjeno ponovno takvo ponašanje.
- (3) Prijedlog za izvršenje iz stava 1 ovog člana tražilac izvršenja može podnijeti u roku od trideset dana od dana saznanja za ponovno smetanje posjeda, a najkasnije u roku od godine dana nakon ponovljenog smetanja.

## **Pravo na nadoknadu štete**

### **Član 204**

Odredbama glave XIX ovog zakona ne dira se u pravo tražioca izvršenja da u parnici traži nadoknadu štete koja mu je nanesena tim što se izvršenik ponašao protivno svojoj obavezi utvrđenoj u izvršnoj ispravi.

## **XX – PREDAJA DJETETA**

### **Način sprovođenja izvršenja**

#### **Član 205**

- (1) Prilikom sprovođenja izvršenja, sud posebno vodi računa o potrebi da se u najvećoj mjeri zaštiti interes djeteta.
- (2) Sud će u rješenju o izvršenju izvršeniku ostaviti rok od tri dana od dana dostavljanja rješenja da preda dijete roditelju ili drugom licu, odnosno organizaciji kojoj je dijete povjereno na čuvanje i vaspitanje, pod prijetnjom izricanja novčane kazne.
- (3) Novčana kazna se izriče i njeno izvršenje sprovodi prema odredbama ovog zakona o izvršenju radnje koju može izvršiti samo izvršenik.
- (4) Ako se izvršenje nije moglo sprovesti izricanjem i izvršenjem odluke o novčanoj kazni, izvršenje će se sprovesti oduzimanjem djeteta od lica kod koga se dijete nalazi i predajom djeteta roditelju, odnosno drugom licu ili organizaciji kojoj je ovo dijete povjereno na čuvanje i vaspitanje.
- (5) U postupku izvršenja, sud će zahtijevati pomoć organa starateljstva.

### **Nastavak izvršenja**

#### **Član 206**

Sud će, na prijedlog stranke kojoj je dijete povjereno, nastaviti izvršenje po istom rješenju o izvršenju, ako se dijete u roku od 60 dana od dana predaje ponovo zatekne kod lica od koga je oduzeto.

## **XXI– IZVRŠENJE RADI VRAĆANJA ZAPOSLENOG NA RAD ODNOSNO U SLUŽBU**

### **Rok za podnošenje prijedloga za izvršenje**

#### **Član 207**

Prijedlog za izvršenje na osnovu izvršne isprave kojom je poslodavcu naloženo da zaposlenog vrati na rad, odnosno službu može se podnijeti u roku od trideset dana od dana kada je tražilac izvršenja stekao pravo da taj prijedlog podnese.

## **Način sprovođenja izvršenja**

### **Član 208**

Izvršenje na osnovu izvršne isprave kojom je izvršeniku naloženo da tražioca izvršenja vrati na rad, odnosno u službu sprovodi se primjenom odgovarajućih odredbi člana 209 ovog zakona.

## **Nadoknada plate u slučaju vraćanja zaposlenog na rad**

### **Član 209**

- (1) Tražilac izvršenja koji je podnio prijedlog da bude vraćen na rad odnosno u službu može predložiti da sud donese rješenje kojim će odrediti da mu je izvršenik dužan isplatiti na ime plate mjesečne iznose dospjele od pravosnažnosti odluke pa dok ponovo ne bude vraćen na posao, te odrediti izvršenje radi naplate dosuđenih iznosa.
- (2) Prijedlog za naknadu može se spojiti s prijedlogom za izvršenje radi vraćanja na rad ili može biti podnesen naknadno do završetka izvršnog postupka.
- (3) Rješenje kojim se prijedlog za naknadu prihvata ima dejstvo rješenja kojim se utvrđuje postojanje obaveze izvršenika i dejstvo rješenja o izvršenju. To rješenje može biti sprovedeno prije njegove pravosnažnosti.
- (4) Izvršenik može predložiti da se rješenje iz stava 3 ovog člana stavi izvan snage, ako su se nakon njegovog donošenja izmijenile okolnosti na osnovu kojih je doneseno.
- (5) Mjesečna nadoknada plate određuje se u iznosu koji bi tražilac izvršenja ostvario da je bio na radu. Mjesečna nadoknada obuhvata i plaćanje poreza te drugih davanja po osnovu plate.
- (6) Tražilac izvršenja može svoje pravo na nadoknadu ostvarivati i u posebnom postupku pred sudom.
- (7) Ako je sud djelimično prihvatio zahtjev za isplatu naknade, uputit će tražioca izvršenja da ostatak ostvaruje u postupku pred sudom.

## **XXII – IZVRŠENJE UPISIVANJEM PRAVA U ZEMLJIŠNU KNJIGU**

## **Način sprovođenja izvršenja**

### **Član 210**

Na osnovu izvršne isprave kojom je utvrđena obaveza upisa u zemljišnu knjigu sud određuje da se u zemljišnoj knjizi obavi odgovarajući upis. Upis određen u rješenju o izvršenju sprovodi se po službenoj dužnosti.

## **Upis prava vlasništva kad izvršenik nije upisan kao vlasnik**

### **Član 211**

Kad izvršenik nije upisan kao vlasnik nepokretnosti, upis prava vlasništva tražioca izvršenja na toj nepokretnosti može se obaviti ako tražilac izvršenja, uz prijedlog za izvršenje, podnese dokaz, u skladu sa propisima o upisu prava u zemljišne knjige, da je pravni prethodnik izvršenika lice koje je upisano kao vlasnik.

## **Upis drugog prava kad izvršenik nije upisan kao vlasnik**

### **Član 212**

Kad je tražilac izvršenja izvršnom ispravom ovlašten tražiti u odnosu na izvršenika upis založnog ili nekog drugog prava na nepokretnosti, osim prava vlasništva, tražilac izvršenja može u prijedlogu za izvršenje zahtijevati da se pravo vlasništva upiše na izvršenika, a zatim da se obavi upis njegovog prava, ako podnese dokaz, u skladu sa propisima o upisu prava u zemljišnu knjigu, da je izvršenik stekao pravo vlasništva na toj nepokretnosti.

## **XXIII – IZVRŠENJE DIOBOM STVARI**

### **Fizička dioba**

#### **Član 213**

- (1) Fizičku diobu zajedničke stvari sud će odrediti ako je takva dioba predviđena izvršnom ispravom.
- (2) Pojedine radnje sprovođenja fizičke diobe preduzima, prema okolnostima slučaja, sudija ili sudski izvršitelj.
- (3) Sud će pozvati učesnike da prisustvuju sprovođenju diobe.
- (4) U slučaju potrebe sud će odrediti i vještačenje.

### **Dioba prodajom**

#### **Član 214**

Ako na osnovu izvršne isprave zajedničku stvar treba, radi njene diobe, prodati, prodaja će se obaviti na način propisan ovim zakonom za izvršenje na pokretnoj ili nepokretnoj stvari, osim ako se stranke o pojedinim pitanjima drukčije ne sporazumiju.

### **Određivanje načina diobe rješenjem suda**

## **Član 215**

- (1) Sud odlučuje, po propisima o vlasničko-pravnim odnosima, hoće li se dioba obaviti fizički ili prodajom, ako izvršnom ispravom način diobe nije određen niti su se stranke o tome sporazumjele.
- (2) Dioba će se obaviti prodajom ako se u izvršnom postupku utvrdi da fizička dioba, određena izvršnom ispravom, nije moguća ili je moguća samo uz znatno smanjenje vrijednosti stvari.
- (3) Ako nije moguća ni dioba prodajom, suvlasnici mogu, nakon obustave izvršnog postupka, tužbom zahtijevati diobu isplatom svog suvlasničkog udjela, po propisima o vlasničko-pravnim odnosima.

## **Troškovi postupka**

### **Član 216**

- (1) Troškove sprovođenja izvršenja po odredbama glave XXIII ovog zakona, snose svi sudionici srazmjerno vrijednosti svojih udjela u zajedničkoj stvari.
- (2) Stranka koja je prouzrokovala posebne troškove dužna ih je nadoknaditi onim strankama koje su ih imale.

## **XXIV - OSTVARENJE POTRAŽIVANJA NA DAVANJE IZJAVE VOLJE**

### **Bezuslovno potraživanje**

#### **Član 217**

- (1) Ako je izvršenik odlukom koja ima svojstvo izvršne isprave obavezan na davanje izjave volje, smatra se da je izjavu sadržaja kao u izvršnoj ispravi dao pravosnažnošću te odluke.
- (2) Ako je izvršenik sudskim ili upravnim poravnanjem obavezan na davanje izjave volje, smatra se da je izjavu sadržaja kao u poravnanju dao danom dospijeća njegove obaveze.

### **Uslovno potraživanje**

#### **Član 218**

Ako ispunjenje potraživanja na davanje izjave volje zavisi od ispunjenja neke obaveze tražioca izvršenja ili kojeg drugog uslova, smatra se da je izvršenik dao izjavu volje kad tražilac izvršenja ispuni svoju obavezu ili kad bude ispunjen koji drugi uslov.

## **Dio treći**

## **OBEZBJEĐENJE POTRAŽIVANJA**

## **XXV– OPĆE ODREDBE**

### **Primjena odredbi o izvršenju**

#### **Član 219**

Na obezbjeđenje potraživanja (u daljnjem tekstu: obezbjeđenje) prema dijelu trećem ovog zakona na odgovarajući se način primjenjuju odredbe ovog zakona o izvršenju radi ostvarenja potraživanja.

### **Sredstva obezbjeđenja**

#### **Član 220**

Kao sredstva obezbjeđenja mogu se odrediti samo sredstva predviđena ovim ili drugim zakonom.

### **Nedopustivost obezbjeđenja**

#### **Član 221**

Obezbjeđenje nije dozvoljeno na stvarima i pravima koji po ovom zakonu ne mogu biti predmet izvršenja, osim ako odredbama dijela trećeg ovog zakona nije drukčije određeno.

## **XXVI – OBEZBJEĐENJE PRINUDNIM ZASNIVANJEM ZALOŽNOG PRAVA NA NEPOKRETNOSTI**

### **Uslovi zasnivanja**

#### **Član 222**

Na osnovu izvršne isprave kojom je utvrđeno novčano potraživanje predlagač obezbjeđenja ima pravo tražiti obezbjeđenje tog potraživanja zasnivanjem založnog prava na nepokretnosti protivnika obezbjeđenja.

### **Način zasnivanja založnog prava**

#### **Član 223**

- (1) Na nepokretnosti upisanoj u zemljišnoj knjizi založno pravo zasniva se uknjižbom.
- (2) Pri uknjižbi založnog prava u zemljišnoj će se knjizi naznačiti izvršivost potraživanja radi obezbjeđenja koje je uknjižba određena.
- (3) Ako je predlagač obezbjeđenja prije nego što je potraživanje postalo izvršno već stekao na osnovu ugovora založno pravo za to potraživanje na istoj nepokretnosti ili

je založno pravo predbilježeno, sud će, na prijedlog predlagača obezbjeđenja, odrediti da se u zemljišnoj knjizi zabilježi izvršivost potraživanja.

- (4) Ako protivnik obezbjeđenja nije upisan u zemljišnoj knjizi kao vlasnik nepokretnosti, predlagač obezbjeđenja dužan je uz prijedlog dostaviti ispravu podobnu za upis prava vlasništva protivnika obezbjeđenja.

### **Dejstvo uknjižbe i zabilježbe**

#### **Član 224**

- (1) Uknjižba založnog prava i zabilježba izvršivosti potraživanja imaju takvo dejstvo da se izvršenje na toj nepokretnosti može provesti i prema trećem licu koje je tu nepokretnost kasnije steklo.
- (2) U slučaju iz stava 1 ovog člana, izvršenje na nepokretnosti odredit će se protiv lica koje je upisano kao vlasnik, i to na osnovu izvršne isprave na osnovu koje je u zemljišnu knjigu upisano založno pravo i zabilježba izvršivosti, te izvoda iz zemljišne knjige iz kojeg proizilazi da je to lice upisano kao vlasnik nakon upisa založnog prava i zabilježbe izvršivosti.

## **XXVII - SUDSKO OBEZBJEĐENJE NOVČANOG POTRAŽIVANJA ZASNIVANJEM ZALOŽNOG PRAVA NA OSNOVU SPORAZUMA STRANAKA**

### **Prijedlog za obezbjeđenje**

#### **Član 225**

Radi obezbjeđenja novčanog potraživanja predlagača obezbjeđenja sticanjem založnog prava na određenim predmetima obezbjeđenja, predlagač obezbjeđenja i protivnik obezbjeđenja mogu saglasno tražiti od suda da odredi i provede u korist predlagača obezbjeđenja:

1. uknjižbu založnog prava na nepokretnosti protivnika obezbjeđenja,
2. pljenidbu nepokretnosti koje nisu upisane u zemljišne knjige po pravilima po kojima se sprovodi izvršenje radi naplate novčanog potraživanja na tim nekretninama,
3. pljenidbu pokretnih stvari protivnika obezbjeđenja,
4. pljenidbu novčanog potraživanja protivnika obezbjeđenja,
5. pljenidbu dijela primanja protivnika obezbjeđenja po osnovu rada ili službe,
6. pljenidbu dijela penzije, invalidnine ili naknade izgubljene zarade,
7. pljenidbu potraživanja koju protivnik obezbjeđenja ima na računu kod banke ili na štednoj knjižici,

8. pljenidbu potraživanja da se predaju ili isporuče pokretne stvari ili da se preda nekretnina,
9. pljenidbu drugih imovinskih odnosno materijalnih prava,
10. pljenidbu isprava o dionici i drugih vrijednosnih papira te njihovo povjeravanje na čuvanje,
11. pljenidbu dionica za koje nije izdata isprava o dionici te osnivačkog i drugih udjela u pravnom licu.

### **Ročište u povodu prijedloga i sporazum stranaka**

#### **Član 226**

- (1) Na prijedlog jedne ili obje stranke sud će odrediti ročište, na kojem će u zapisnik utvrditi sporazum stranaka o postojanju potraživanja predlagača obezbjeđenja i vrijeme njenog dospijeca te njihovu saglasnost da se radnjama obezbjeđenja iz člana 225 ovog zakona, zavisno o predmetu obezbjeđenja, obezbijedi to novčano potraživanje zasnivanjem založnog prava. U sporazumu stranke mogu utvrditi i vrijednost predmeta obezbjeđenja koja će u izvršnom postupku biti osnova za utvrđivanje vrijednosti predmeta obezbjeđenja radi njegovog unovčenja.
- (2) Potpisani zapisnik o sporazumu stranaka iz stava 1 ovog člana ima snagu sudskog poravnjanja.
- (3) Stranke mogu obezbijediti i nenovčano potraživanje predlagača obezbjeđenja tako da u sporazumu iz stava 1 ovog člana utvrde njenu novčanu protuvrijednost. Obezbjeđenje će se odrediti i sprovesti radi obezbjeđenja novčane protuvrijednosti nenovčanog potraživanja. Ako stranke u sporazumu iz stava 1 ovog člana drukčije ne odrede, nenovčano potraživanje ne prestaje sklapanjem tog sporazuma.
- (4) Nakon dospijeca nenovčanog potraživanja iz stava 3 ovog člana, predlagač obezbjeđenja može, po svom izboru, tražiti izvršenje radi ostvarenja nenovčanog potraživanja ili izvršenje radi naplate njene nenovčane protuvrijednosti. Ako se u postupku izvršenja radi naplate novčane protuvrijednosti nenovčano potraživanje predlagač obezbjeđenja makar i djelimično namiri, prestaje u cijelosti njegovo nenovčano potraživanje i smatrat će se da predlagač obezbjeđenja ima prema protivniku samo novčano potraživanje koje odgovara nenamirenom dijelu novčane protuvrijednosti nenovčanog potraživanja.

### **Određivanje i sprovođenje obezbjeđenja**

#### **Član 227**

- (1) Na osnovu sporazuma iz člana 226 ovog zakona, sud će rješenjem odrediti mjere obezbjeđenja iz člana 225 ovog zakona i preduzeti sve potrebne radnje radi njihovog sprovođenja, u skladu s odredbama ovog zakona o izvršnim radnjama kojima se u izvršenju radi naplate novčanog potraživanja stiče založno pravo na određenim predmetima izvršenja.

- (2) Rješenje iz stava 1 ovog člana ima važnost rješenja o obezbjeđenju.
- (3) Sprovedenjem radnji obezbjeđenja iz stava 1 ovog člana predlagač obezbjeđenja stiče založno pravo na određenom predmetu obezbjeđenja.

### **Primjena drugih odredaba ovog zakona**

#### **Član 228**

Na obezbjeđenje novčanog potraživanja zasnivanjem založnog prava na nepokretnosti protivnika obezbjeđenja, na osnovu sporazuma stranaka na odgovarajući se način primjenjuju odredbe članova 220 i 221 ovog zakona.

### **Određivanje i sprovođenje izvršenja**

#### **Član 229**

- (1) Na prijedlog predlagača obezbjeđenja sud će rješenjem, kad utvrdi da je sporazum stranaka iz člana 226 ovog zakona postao izvršan, radi namirenja obezbijeđenog novčanog potraživanja predlagača obezbjeđenja odrediti i sprovesti izvršenje na predmetima protivnika obezbjeđenja na kojima je na osnovu sporazuma stranaka stečeno založno pravo, prema odredbama ovog zakona o izvršenju na stvarima, odnosno pravima izvršenika.
- (2) Rješenje iz stava 1 ovog člana ima važnost rješenja o izvršenju.
- (3) Zabilježba izvršenja na nekretnini ima pravno dejstvo od dana uknjižbe založnog prava na nekretnini u postupku obezbjeđenja.
- (4) U postupku izvršenja radi naplate novčanog potraživanja obezbijeđenog založnim pravom prema odredbama glave XXVII ovog zakona, radnje kojima je založno pravo stečeno neće se ponavljati već će imati pravno dejstvo od dana sticanja založnog prava u postupku obezbjeđenja.

### **Obezbjeđenje sticanjem založnog prava na stvarima i pravima drugih lica**

#### **Član 230**

- (1) Ako je drugo lice saglasno da se na njegovoj stvari ili pravu zasnjuje založno pravo radi obezbjeđenja novčanog potraživanja predlagača obezbjeđenja, to će se lice pozvati na ročište iz člana 226 ovog zakona, a sud će u zapisnik s tog ročišta, u sporazum stranaka o obezbjeđenju, unijeti i njegovu izjavu o toj saglasnosti.
- (2) Potpisani zapisnik iz stava 1 ovog člana ima važnost sudskog poravnjanja i prema licu koje se saglasilo da se na njegovoj stvari ili pravu zasnjuje založno pravo.

- (3) Založno pravo na predmetu trećeg lica stiće se na način na koji se stiće na predmetu protivnika obezbjeđenja.
- (4) Na osnovu zapisnika iz stava 1 ovog člana predlagač obezbjeđenja može radi naplate obezbijedenog potraživanja neposredno predložiti izvršenje protiv lica iz te odredbe na predmetu na kojemu je radi obezbjeđenja njegovog potraživanja zasnovano založno pravo.
- (5) Odredba člana 229 ovog zakona primijenit će se na odgovarajući način i u slučaju iz stava 4 ovog člana.

## **XXVIII – OBEZBJEĐENJE PRETHODNIM IZVRŠENJEM**

### **Uslovi za određivanje izvršenja**

#### **Član 231**

Radi obezbjeđenja nenovčanog izvršenja koje se ne može obezbijediti predbilježbom u javnoj knjizi, sud može na osnovu presude donesene u parničnom postupku, odrediti prethodno izvršenje, ako tražilac izvršenja učini vjerovatnom opasnost da bi se zbog odgode izvršenja dok presuda ne postane izvršna, izvršenje onemogućilo ili znatno otežalo te ako da obezbjeđenje za štetu koju bi izvršenik mogao pretrpjeti zbog takvog izvršenja.

### **Postupak po prijedlogu za prethodno izvršenje**

#### **Član 232**

- (1) Prije nego što odluči o prijedlogu tražioca izvršenja, sud će održati ročište radi rasprave o prijedlogu i obezbjeđenju.
- (2) Ako se stranke o tome ne sporazumiju, sud će, ako prihvati prijedlog za izvršenje, po slobodnoj ocjeni odrediti visinu obezbjeđenja i rok u kojem treba biti dato. Dok obezbjeđenje ne bude dato, ne može se započeti sa sprovođenjem izvršenja.
- (3) Ako obezbjeđenje ne bude dato u određenom roku, sud će obustaviti izvršenje.
- (4) Na zahtjev izvršenika, koji učini vjerovatnim da bi zbog izvršenja pretrpio nenadoknadivu ili teško nadoknadivu štetu, sud može odbiti prijedlog za izvršenje ili njegovo odbijanje usloviti davanjem primjerenog obezbjeđenja u određenom roku. Ako izvršenik ne da obezbjeđenje u određenom roku, sud će donijeti rješenje o izvršenju.

## **XXIX – OBEZBJEĐENJE PRETHODNIM MJERAMA**

### **Uslovi za određivanje prethodne mjere**

#### **Član 233**

- (1) Prethodna mjera određuje se radi obezbjeđenja novčanog potraživanja na osnovu:

1. odluke suda ili upravnog organa koja nije postala izvršna,
  2. poravnanja zaključenog pred sudom ili organom koji odlučuje u upravnom postupku, ako potraživanje koje je u njemu utvrđeno još uvijek nije dospjelo.
- (2) Sud će na osnovu isprava iz stava 1 ovog člana odrediti prethodnu mjeru ako predlagač obezbjeđenja učini vjerovatnom opasnost da bi se bez tog obezbjeđenja onemogućilo ili znatno otežalo ostvarenje potraživanja.

### **Pretpostavljena opasnost**

#### **Član 234**

- (1) Smatra se da opasnost u smislu odredbe člana 233 ovog zakona postoji ako je određivanje prethodne mjere predloženo na osnovu:
1. rješenja o izvršenju na osnovu vjerodostojne isprave protiv kojeg je blagovremeno podnesen prigovor,
  2. presude donesene u krivičnom postupku o imovinskopravnom zahtjevu protiv koje je dozvoljeno ponavljanje krivičnog postupka,
  3. odluke koja se mora izvršiti u inostranstvu,
  4. presude na osnovu priznanja protiv koje je izjavljena žalba,
  5. poravnanja zaključenog pred sudom ili organom koji odlučuje u upravnom postupku, koje se pobija na način predviđen zakonom.
- (2) U slučaju iz stava 1 tački 4 i 5 ovog člana sud može, na prijedlog protivnika obezbjeđenja, prethodnu mjeru usloviti davanjem obezbjeđenja od strane predlagača obezbjeđenja za štetu koju bi protivnik obezbjeđenja mogao pretrpjeti njenim određivanjem.

### **Obezbjedenje potraživanja čije rate nisu dospjele**

#### **Član 235**

- (1) Obezbjedenje prethodnom mjerom za nedospjele rate potraživanja po osnovu zakonskog izdržavanja, potraživanje po osnovu naknade štete za izgubljeno izdržavanje zbog smrti davaoca izdržavanja i potraživanja po osnovu naknade štete zbog narušenja zdravlja ili umanjenja, odnosno gubitka radne sposobnosti, određuje se samo za rate koje će dospjeti u jednoj godini.
- (2) U slučajevima iz stava 1 ovog člana pretpostavlja se da opasnost postoji ako se protiv protivnika obezbjeđenja već moralo voditi izvršenje radi naplate dospjele rate ili je takvo izvršenje predloženo.

## **Vrste prethodnih mjera**

### **Član 236**

- (1) Kao prethodne mjere sud može odrediti:
  1. predbilježbu založnog prava na nepokretnosti protivnika obezbjeđenja ili na pravu uknjiženom na nepokretnosti,
  2. koju od mjera obezbjeđenja iz člana 225 tački od 2 do 10 ovog zakona,
  3. zabranu pravnom licu koje obavlja poslove platnog prometa da protivniku obezbjeđenja ili trećem licu, po nalogu protivnika obezbjeđenja, isplati s njegovog računa novčani iznos za koji je određena prethodna mjera.
- (2) Sud može na prijedlog predlagača obezbjeđenja odrediti, s obzirom na okolnosti slučaja, dvije ili više prethodnih mjera, ako je to potrebno. Sud može, ako su za to ispunjeni uslovi predviđeni ovim zakonom, uz prethodnu mjeru odrediti i koju privremenu mjeru.
- (3) Sprovođenjem prethodne mjere predlagač obezbjeđenja stiče založno pravo na predmetu obezbjeđenja.
- (4) Iznos novčanih sredstava protivnika obezbjeđenja kod pravnog lica koje obavlja poslove platnog prometa, za koji je određena zabrana isplate, ne može se prenijeti s tog računa dok zabrana traje, osim radi namirenja obezbijeđenog potraživanja.

### **Prodaja zaplijenjenih pokretnih stvari i prenos potraživanja protivnika obezbjeđenja**

### **Član 237**

- (1) Sud će odrediti prodaju zaplijenjenih pokretnih stvari koje su podložne brzom kvarenju ili ako postoji opasnost od znatnog pada cijene tih stvari.
- (2) Prodaja popisanih stvari obaviti će se po odredbama ovog zakona o izvršenju na pokretnim stvarima.
- (3) Ako je prethodna mjera određena pljenidbom potraživanja, sud može, na prijedlog predlagača obezbjeđenja ili protivnika obezbjeđenja, odrediti da se na predlagača obezbjeđenja prenese zaplijenjeno potraživanje radi naplate ili drukčijeg ostvarenja, u slučaju u kojem postoji opasnost da se to potraživanje, zbog zakašnjenja u njegovu ostvarenju, neće moći naplatiti ili drukčije ostvariti ili da će se izgubiti pravo na regres prema trećim licima.
- (4) Iznos koji se dobije prodajom pokretnih stvari ili naplatom potraživanja čuvat će se u sudskom depozitu dok se ne obustavi prethodna mjera ili dok predlagač obezbjeđenja ne predloži izvršenje, a najduže trideset dana pošto potraživanje postane izvršno. Druge koristi dobivene ostvarenjem potraživanja položiti će se u sudski depozit ako je to moguće, ili će se na koji drugi način odrediti njihovo čuvanje do obustave prethodne mjere, odnosno dok predlagač obezbjeđenja ne predloži izvršenje, ali najduže trideset dana pošto potraživanje postane izvršno.

## **Rješenje o određivanju prethodne mjere**

### **Član 238**

- (1) U rješenju kojim se određuje prethodna mjera moraju, uz ostalo, biti naznačeni iznos potraživanja koje se obezbjeđuje, sa kamatama i troškovima, mjera obezbjeđenja i vrijeme za koje se ona određuje.
- (2) Vrijeme za koje se prethodna mjera određuje može trajati najduže do proteka osam dana nakon nastupanja uslova za izvršenje.
- (3) Ako vrijeme iz stava 1 ovog člana protekne prije nego što odluka na osnovu koje je određena prethodna mjera postane izvršna, sud će, na prijedlog predlagača obezbjeđenja podnesenog sudu prije isteka vremena za koje je mjera određena, produžiti to vrijeme uz uslov da se nisu promijenile okolnosti pod kojima je mjera određena.
- (4) Rješenje o određivanju prethodne mjere mora biti obrazloženo.

## **Ukidanje prethodne mjere**

### **Član 239**

- (1) Sud će na prijedlog protivnika obezbjeđenja obustaviti postupak i ukinuti sprovedene radnje:
  1. ako protivnik obezbjeđenja položi sudu dužni iznos potraživanja koje se obezbjeđuje, s kamatama i troškovima,
  2. ako protivnik obezbjeđenja učini vjerovatnim da je potraživanje u vrijeme donošenja rješenja o određivanju prethodne mjere već bilo naplaćeno ili dovoljno obezbijeđeno,
  3. ako je pravosnažno utvrđeno da potraživanje nije nastalo ili da je prestalo,
  4. ako odluka na osnovu koje je prethodna mjera određena bude ukinuta u povodu pravnog lijeka odnosno ako sudsko poravnanje na osnovu koga je prethodna mjera određena bude stavljena van snage.
- (2) Sud će obustaviti postupak i ukinuti sprovedene radnje ako u roku od osam dana od dana proteka vremena za koje je prethodna mjera određena ne bude udovoljeno uslovima za prinudno izvršenje.
- (3) U slučajevima iz stava 1 tačkaka 2, 3 i 4 i stava 2 ovog člana, troškove prouzrokovane određivanjem i sprovođenjem prethodne mjere predlagač obezbjeđenja dužan je nadoknaditi protivniku obezbjeđenja.
- (4) U slučajevima iz stava 3 ovog člana protivnik obezbjeđenja može protiv predlagača obezbjeđenja tražiti nadoknadu štete u postupku obezbjeđenja najkasnije u roku od trideset dana od dovršetka postupka, a nakon toga u parnici.
- (5) U postupku obezbjeđenja, postojanje i visinu štete iz stava 4 ovog člana utvrđuje sud rješenjem, na prijedlog protivnika obezbjeđenja.

(6) Prigovor protiv rješenja iz stava 5 ovog člana zadržava njegovo izvršenje.

### **Obustava u slučaju da predlagač obezbjeđenja ne traži izvršenje**

#### **Član 240**

Ako se pretpostavke za izvršenje radi naplate obezbijeđenog potraživanja ispune prije isteka vremena za koje je određena prethodna mjera, sud će, na prijedlog protivnika obezbjeđenja, obustaviti postupak i ukinuti sprovedene radnje ako predlagač obezbjeđenja ne podnese prijedlog za izvršenje u roku od petnaest dana od nastupanja tih uslova.

### **XXX - PRIVREMENE MJERE**

#### **1. Opće odredbe**

#### **Prijedlog za određivanje privremene mjere**

#### **Član 241**

- (1) Privremena mjera može se predložiti prije pokretanja i tokom sudskog ili upravnog postupka te nakon završetka tih postupaka, sve dok izvršenje ne bude sprovedeno.
- (2) U prijedlogu za određivanje privremene mjere predlagač obezbjeđenja mora istaći zahtjev u kojem će tačno označiti potraživanje čije obezbjeđenje traži, odrediti kakvu mjeru traži i vrijeme njenog trajanja te, kada je to potrebno, sredstva obezbjeđenja kojima će se privremena mjera prinudno ostvariti te predmet obezbjeđenja, uz odgovarajuću primjenu pravila ovog zakona o sredstvima i predmetu izvršenja. U prijedlogu se moraju navesti činjenice na kojima se zasniva zahtjev za određivanje privremene mjere te predložiti dokazi kojima se ti navodi potkrepljuju. Predlagač obezbjeđenja dužan je te dokaze, po mogućnosti, priložiti uz prijedlog.

#### **Rješenje o određivanju privremene mjere**

#### **Član 242**

- (1) U rješenju o određivanju privremene mjere sud će, ako je to potrebno s obzirom na vrstu mjere i svrhu koja se njome treba postići, odrediti na prijedlog predlagača obezbjeđenja i sredstva kojima će se ona prinudno ostvariti te predmet obezbjeđenja, uz odgovarajuću primjenu pravila ovog zakona o određivanju sredstava i predmeta izvršenja u rješenju o izvršenju.
- (2) Ako je radi ostvarenja naloga ili zabrane koji su izrečeni u rješenju o određivanju privremene mjere potrebno naknadno odrediti sredstva prinude iz stava 1 ovog člana ili već određenim sredstvima dodati nova ili ih zamijeniti drugima, predlagač

obezbjeđenja može predložiti, u istom postupku, da se na osnovu već izrečenih naloga ili zabrana odrede ta sredstva.

- (3) Rješenje o određivanju privremene mjere ima dejstvo rješenja o izvršenju.
- (4) Na rješenja iz stava 2 ovog člana na odgovarajući se način primjenjuju odredbe ovog zakona o rješenju o izvršenju.
- (5) Rješenja iz stavova 1 i 2 ovog člana moraju biti obrazložena.
- (6) U slučaju određivanja privremene mjere po službenoj dužnosti sud će na odgovarajući način primijeniti odredbe stavova od 1 do 4 ovog člana.

### **Dozvoljenost privremene mjere**

#### **Član 243**

- (1) Privremena mjera može se odrediti i radi obezbjeđenja nedospjelih i uslovnih potraživanja.
- (2) Privremena mjera nije dozvoljena ako postoje uslovi za određivanje prethodne mjere kojom se može postići ista svrha obezbjeđenja.

### **Pravni lijekovi**

#### **Član 244**

- (1) Protiv rješenja o određivanju privremene mjere protivnik predlagača može izjaviti prigovor u roku od tri dana od dana dostavljanja rješenja.
- (2) O prigovoru odlučuje Apelacioni sud u roku od osam dana od dana podnošenja prigovora.
- (3) Prigovor se ne dostavlja na odgovor.
- (4) Prigovor ne odlaže izvršenje rješenja iz stava 1 ovog člana.

## **2. Privremene mjere radi obezbjeđenja novčanog potraživanja**

### **Uslovi za određivanje privremene mjere**

#### **Član 245**

- (1) Privremena mjera radi obezbjeđenja novčanog potraživanja može se odrediti ako predlagač obezbjeđenja učini vjerovatnim postojanje potraživanja i opasnost da će bez takve mjere protivnik obezbjeđenja spriječiti ili znatno otežati naplatu potraživanja time što će svoju imovinu otuđiti, prikriti ili na drugi način njom raspolagati.
- (2) Predlagač obezbjeđenja ne mora dokazivati opasnost iz stava 1 ovog člana ako učini vjerovatnim da bi predloženom mjerom protivnik obezbjeđenja pretrpio samo neznatnu štetu.

- (3) Smatra se da opasnost iz stava 1 ovog člana postoji ako bi se potraživanje imalo ostvariti u inostranstvu.

### **Vrste privremenih mjera radi obezbjeđenja novčanog potraživanja**

#### **Član 246**

- (1) Radi obezbjeđenja novčanog potraživanja može se odrediti svaka mjera kojom se postiže svrha takvog obezbjeđenja, a naročito:
1. zabrana protivniku obezbjeđenja da otuđi ili optereti pokretne stvari, oduzimanje tih stvari i njihovo povjeravanje na čuvanje predlagraču obezbjeđenja ili trećem licu,
  2. oduzimanje i polaganje gotovog novca, vrijednosnih papira i sl. u sud,
  3. zabrana protivniku obezbjeđenja otuđenja ili opterećenja svoje nepokretnosti ili stvarnih prava koja su na nekretnini uknjižena u njegovu korist, uz zabilježbu te zabrane u zemljišnu knjigu,
  4. zabrana dužniku protivnika obezbjeđenja da dobrovoljno ispuni svoju obavezu protivniku obezbjeđenja te zabrana protivniku obezbjeđenja da primi ispunjenje te obaveze odnosno da raspoláže svojim potraživanjima,
  5. nalog pravnom licu koje obavlja poslove platnog prometa da protivniku obezbjeđenja ili trećem licu, na osnovu naloga protivnika obezbjeđenja, uskrati s dužnikova računa isplatu novčanog iznosa za koji je određena privremena mjera.
- (2) Privremenom mjerom ne stiče se založno pravo.
- (3) Zabrane iz stava 1 ovog člana smatraju se provedenim dostavom licu kojem su izrečene odnosno zemljišnoknjižnom odjeljenju suda.
- (4) Otuđenje i opterećenje pokretnina iz stava 1 tačke 1 ovog člana, koje protivnik obezbjeđenja obavi protivno zabrani bez pravnog su dejstva, osim ako ima mjesta primjeni pravila o zaštiti poštenog stjecatelja.
- (5) Dejstvo zabilježbe zabrane iz stava 1 tačke 3 ovog člana je u tome što predlagrač obezbjeđenja može predložiti izvršenje radi naplate svog potraživanja kad ono postane izvršno na nepokretnosti uknjiženoj u zemljišnoj knjizi ili na pravu uknjiženom na nepokretnosti, na koje se zabrana odnosi, bez obzira na to što je nakon te zabrane treće lice, na osnovu dobrovoljnog raspolaganja protivnika obezbjeđenja, steklo i uknjižilo u zemljišnu knjigu neko svoje pravo. Izvršenje na nepokretnosti, odnosno pravu uknjiženom na nepokretnosti, predlagrač obezbjeđenja može predložiti direktno protiv lica koje je uknjiženo kao vlasnik nepokretnosti odnosno nosilac stvarnog prava uknjiženog na nepokretnosti, na osnovu izvršne isprave kojom je protiv protivnika obezbjeđenja utvrđeno njegovo potraživanje radi obezbjeđenja kojeg je zabrana zabilježena te dokaza da je lice protiv kojeg se izvršenje predlaže steklo vlasništvo nepokretnosti, odnosno pravo na nepokretnosti, nakon zabilježbe zabrane.

- (6) Dejstvo zabrana iz stava 1 tački 4 i 5 ovog člana je u tom što predlagač obezbjeđenja može od dužnika protivnika obezbjeđenja, odnosno pravnog lica koje obavlja poslove platnog prometa, tražiti u parnici nadoknadu štete koju su mu nanijeli postupivši protivno zabrani. Predlagaču obezbjeđenja pripadaju i druga prava protiv tih lica po općim pravilima obligacionog prava o zabranjenim, odnosno protivpravnim radnjama.

### **3. Privremene mjere radi obezbjeđenja nenovčanog potraživanja**

#### **Uslovi za određivanje privremene mjere**

##### **Član 247**

- (1) Radi obezbjeđenja nenovčanog potraživanja može se odrediti privremena mjera ako predlagač obezbjeđenja učini vjerovatnim postojanje svog potraživanja i opasnost da bi bez takve mjere protivnik obezbjeđenja spriječio ili znatno otežao ostvarenje potraživanja, posebno time što bi promijenio postojeće stanje stvari.
- (2) Privremena mjera može se odrediti i kad predlagač obezbjeđenja učini vjerovatnim da je mjera potrebna da bi se spriječilo nasilje ili nastanak nenadoknadive štete.
- (3) Odredbe člana 245 stavova 2 i 3 ovog zakona primjenjuju se i pri određivanju privremenih mjera radi obezbjeđenja nenovčanih potraživanja.

#### **Vrste privremenih mjera radi obezbjeđenja nenovčanih potraživanja**

##### **Član 248**

- (1) Radi obezbjeđenja nenovčanih potraživanja može se odrediti svaka mjera kojom se postiže svrha takvog obezbjeđenja, a naročito:
1. zabrana otuđenja i opterećenja pokretnih stvari na koje je upravljeno potraživanje, njihovo oduzimanje i povjeravanje na čuvanje predlagaču obezbjeđenja ili trećem licu,
  2. zabrana otuđenja i opterećenja dionica, osnivačkog i drugih udjela na koje je upravljeno potraživanje, uz zabilježbu navedene zabrane u odgovarajući popis, a po potrebi i u sudskom upisniku; zabrana korištenja ili raspolaganja pravima po osnovi takvih dionica, odnosno udjela; povjeravanje dionica odnosno udjela na upravu trećem licu,
  3. zabrana otuđenja i opterećenja drugih prava na koje je upravljeno potraživanje, uz povjeravanje uprave tim pravima trećem licu,
  4. zabrana otuđenja i opterećenja nepokretnosti na koju je upravljeno potraživanje ili stvarnih prava upisanih na nepokretnosti na koja je upravljeno potraživanje, uz zabilježbu zabrane u zemljišnu knjigu; oduzimanje nekretnine i njeno povjeravanje na čuvanje i upravu predlagaču obezbjeđenja ili trećem licu,

5. zabrana dužniku protivnika obezbjeđenja da protivniku obezbjeđenja preda stvari, prenese koje pravo ili obavi koju drugu nenovčanu radnju na koju je upravljeno potraživanje,
  6. zabrana protivniku obezbjeđenja da preduzima radnje koje mogu nanijeti štetu predlagачu obezbjeđenja te zabrana da se provedu promjene na stvarima na koje je upravljeno potraživanje,
  7. nalog protivniku obezbjeđenja da obavi određene radnje potrebne da bi se sačuvale pokretne stvari ili nepokretne stvari ili da bi se održalo postojeće stanje stvari,
  8. ovlaštenje predlagачu obezbjeđenja da zadrži stvari protivnika obezbjeđenja koje se kod njega nalaze i na koje se potraživanje odnosi, sve dok se parnica pravosnažno ne završi,
  9. ovlaštenje predlagачu obezbjeđenja da sam ili preko trećeg lica obavi određene radnje ili nabavi određene stvari, posebno radi uspostave prijašnjeg stanja,
  10. privremeno vraćanje zaposlenog na rad, plaćanje nadoknade za vrijeme radnog spora, ako je to neophodno za njegovo izdržavanje i izdržavanje lica koja je po zakonu dužan izdržavati.
- (2) Ako je to neophodno radi sprečavanja nastanka nenadoknadive ili teško nadoknadive štete, nasilja ili ako je iz drugih važnih razloga to potrebno radi obezbjeđenja pravnog reda, sud može odrediti mjeru kojom će privremeno urediti sporni odnos među strankama.
- (3) Zabrane iz stava 1 ovog člana smatraju se provedenim dostavom licu kojeg se tiču, odnosno zemljišnoknjižnom odjeljenju suda.
- (4) Dejstvo zabilježbe zabrane iz stava 1 tačke 4 ovog člana je u tome što se upisima obavljenim u zemljišnoj knjizi, na osnovu dobrovoljnog raspolaganja protivnika obezbjeđenja, nakon upisa zabilježbe zabrane, mogu steći u odnosu prema predlagачu obezbjeđenja kakva prava na nepokretnosti ili pravu na njoj upisanom samo ako predlagач obezbjeđenja bude pravosnažno odbijen sa svojim zahtjevom u postupku koji je pokrenuo radi ostvarenja potraživanja za čije je obezbjeđenje zabilježba upisana. Na osnovu izvršne isprave stečene u postupku koji je pokrenuo protiv protivnika obezbjeđenja radi ostvarenja potraživanja za čije je obezbjeđenje zabilježba zabrane upisana te dokaza da je lice koje je steklo određeno pravo na nepokretnosti ili pravu upisanom na nekretnini na osnovu dobrovoljnog raspolaganja protivnika obezbjeđenja to pravo steklo nakon upisa zabrane, predlagач obezbjeđenja može direktno protiv tog lica tražiti izvršenje radi ostvarenja svog prava utvrđenog izvršnom ispravom.
- (5) Dejstvo je zabrana iz stava 1 ovog člana, osim one iz tačke 4 ovog člana, u tome što lica kojima je zabrana izrečena odgovaraju predlagачu obezbjeđenja za štetu koju su mu nanijeli tim što su, nakon dostave zabrane, postupili protivno zabrani. Lica kojima je zabrana izrečena mogu se osloboditi svoje odgovornosti tako da polože u sud predmete na koje se zabrana odnosi ako su za to podesni ili tako da ih predaju čuvaru ili upravitelju kojeg na njihov prijedlog odredi sud.

- (6) Odredbe člana 246 stavova 3 i 4 ovog zakona primjenjuju se na odgovarajući način i na privremene mjere radi obezbjeđenja nenovčanog potraživanja.
- (7) Privremene mjere iz ovog člana ne smiju u cijelosti obuhvatiti zahtjev koji se njima obezbjeđuje, osim u slučaju iz stava 2 ovog člana.

#### **4. Zajedničke odredbe**

##### **Obezbjeđenje umjesto privremene mjere**

###### **Član 249**

- (1) Predlagač obezbjeđenja može u prijedlogu za određivanje privremene mjere ili naknadno izjaviti da se, umjesto privremene mjere, zadovoljava davanjem određenog obezbjeđenja od strane protivnika obezbjeđenja.
- (2) Davanje obezbjeđenja umjesto privremene mjere može se odrediti i na prijedlog protivnika obezbjeđenja. Okolnost da je protivnik obezbjeđenja predložio obezbjeđenje ne odgađa sprovođenje obezbjeđenja dok se o tom prijedlogu ne odluči.
- (3) Ako protivnik obezbjeđenja da obezbjeđenje, sud će obustaviti postupak i ukinuti već sprovedene radnje.

##### **Obezbjeđenje kao uslov za određivanje privremene mjere**

###### **Član 250**

- (1) Sud može na prijedlog predlagača obezbjeđenja odrediti privremenu mjeru i kad nije učinio vjerovatnim postojanje potraživanja i opasnost ako prethodno, u roku koji mu je sud odredio, da obezbjeđenje za štetu koja bi protivniku obezbjeđenja mogla nastati određivanjem i sprovođenjem privremene mjere. Ako predlagač obezbjeđenja ne da obezbjeđenje u određenom roku, sud će odbiti prijedlog za obezbjeđenje.
- (2) Sud može, na prijedlog protivnika obezbjeđenja, prema okolnostima slučaja, postupiti po odredbi stava 1 ovog člana i kad je predlagač obezbjeđenja učinio vjerovatnim postojanje potraživanja i opasnosti. Ako predlagač obezbjeđenja ne da obezbjeđenje u određenom roku, sud će obustaviti postupak i ukinuti sprovedene radnje. Okolnost da je protivnik obezbjeđenja zatražio davanje obezbjeđenja ne odgađa sprovođenje postupka obezbjeđenja dok se ne odluči o njegovom prijedlogu.
- (3) Obezbjeđenje se određuje do isteka roka do kojeg protivnik obezbjeđenja može u postupku obezbjeđenja zatražiti nadoknadu štete.

##### **Određivanje više privremenih mjera**

###### **Član 251**

Sud može, s obzirom na okolnosti slučaja, odrediti i više privremenih mjera, ako je to potrebno.

### **Vrijeme za koje se određuje privremena mjera**

#### **Član 252**

- (1) U rješenju kojim se određuje privremena mjera odredit će se i trajanje te mjere, a ako je mjera određena prije podnošenja tužbe ili pokretanja kojeg drugog postupka - i rok u kojem predlagač obezbjeđenja mora podnijeti tužbu odnosno prijedlog za pokretanje drugog postupka, radi opravdanja mjere.
- (2) Sud će, na prijedlog predlagača obezbjeđenja, produžiti trajanje privremene mjere, uz uslov da se nisu promijenile okolnosti pod kojim je ta mjera određena.
- (3) Prijedlog iz stava 2 ovog člana može se podnijeti samo prije nego što protekne vrijeme za koje je privremena mjera određena.

### **Ukidanje privremene mjere**

#### **Član 253**

- (1) Ako predlagač obezbjeđenja u određenom roku nije podnio tužbu odnosno nije pokrenuo drugi postupak radi opravdanja privremene mjere ili je vrijeme za koje je određena privremena mjera proteklo, sud će, na prijedlog protivnika obezbjeđenja, obustaviti postupak i ukinuti sprovedene radnje.
- (2) Na prijedlog protivnika obezbjeđenja postupak će se obustaviti i ukinuti sprovedene radnje ako su se okolnosti zbog kojih je mjera određena kasnije promijenile tako da više nije potrebna.
- (3) Postupak će se obustaviti i ukinuti sprovedene radnje u slučajevima navedenim u članu 239 stavu 1 ovog zakona.

### **Naknada štete protivniku obezbjeđenja**

#### **Član 254**

- (1) Protivnik obezbjeđenja ima prema predlagaču obezbjeđenja pravo na nadoknadu štete koja mu je nanesena privremenom mjerom za koju je utvrđeno da je bila neosnovana ili koju predlagač obezbjeđenja nije opravdao.
- (2) U tome se slučaju na odgovarajući način primjenjuju odredbe člana 239 stavova 5 i 6 ovog zakona.

### **Primjena odredbi o obezbjeđenju prethodnim mjerama**

#### **Član 255**

U postupku osiguranja privremenim mjerama na odgovarajući se način primjenjuju odredbe člana 237 i člana 238 stavova od 2 do 4 ovog zakona.

## **Dio četvrti**

### **XXXI - PRELAZNE I ZAVRŠNE ODREDBE**

#### **Izvršenje odluke stranog suda**

##### **Član 256**

Do donošenja odgovarajućeg zakona Distrikta, izvršenje na osnovu odluke stranog suda odnosno tijela može se odrediti i sprovesti u Distriktu samo ako ta odluka ispunjava pretpostavke za priznanje i izvršenje propisane međunarodnim sporazumom ili posebnim zakonom.

#### **Izvršenje odluke entiteta Bosne i Hercegovine**

##### **Član 257**

Do donošenja odgovarajućeg zakona Bosne i Hercegovine, izvršnom ispravom iz člana 22 ovog zakona, smatra se i izvršna odluka suda ili drugog organa entiteta Bosne i Hercegovine.

#### **Postupci u toku**

##### **Član 258**

Postupak izvršenja i obezbjeđenja započet do dana početka primjene ovog zakona okončat će se po odredbama ovog zakona.

#### **Prestanak važenja odredbi drugih zakona**

##### **Član 259**

Danom početka primjene ovog zakona prestaje primjena zakona i drugih propisa o izvršnom postupku koji su se primjenjivali na teritoriji Distrikta do dana početka primjene ovog zakona.

#### **Stupanje na snagu Zakona**

##### **Član 260**

Ovaj zakon stupa na snagu osmog dana od dana objavljivanja u Službenom glasniku Brčko distrikta Bosne i Hercegovine, a početak će da se primjenjuje od 1. aprila 2001. godine.